



~ محمد راضي ~



الْقَتْلُ
بِسَبَبِ
الْوَفَاةِ

تشكيل للنشر والتوزيع



لتحويلك إلى الجروب أضغط هنا



لتحويلك إلى الموقع أضغط هنا

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



تَشْكِيلٌ لِلنَّشْرِ وَالتَّوْزِيعِ

Email publish@tashkeel-publishing.com

Website www.tashkeel-publishing.com

Mobile 201006250473 FB/Tashkeel

رقم الإيداع: 2019 / 27030

الترقيم الدولي: 4-20-6737-977-978

تصميم الغلاف : أحمد فرج

التدقيق اللغوي: ضياء فريد

الإخراج الفني : ضياء فريد

المدير العام : سيد شعبان

جميع الحقوق محفوظة للناشر

وأي اقتباس أو تقليد، أو إعادة طبع أو نشر دون موافقة كتابية
يعرض صاحبه للمساءلة القانونية، والآراء والمادة الواردة
وحقوق الملكية الفكرية بالكتاب خاصة بالكاتب فقط لا غير.

القتل
يسبب
الوفاة

محمد راضي



إهداء

إلى من سألتني ذات يوم:

- إنت تعرف معنى هاكونا ماتاتا؟
- لأ.. ولو تعرفي عرفيني.
- يعني لا توجد مشاكل.
- دي بأنهي لغة؟
- شرق وسط أفريقيا.
- مالوما عاموما بوهارا.
- يعني إيه؟
- يعني معلوماتك العامة مبهرة.
- ودي بأنهي لغة؟
- لغة راضي.. لسه مألّفها حالاً.

إلى/ بومبا: «رنا حشيش» لا توجد مشاكل.. ولن.
تيمون.. «صديقك الصدوق»



شكر إلى

أحمد أبو رية..

محمد تركي..

محمد مجدو..

محمد عزب..

مي إبراهيم..

ياسمين عبد الغني..

مريم.

وشكر خاص إلى: ياسمينا السعدني.



أبو مودة

أمام مبنى شركة «كلاشينكوف» للأمن والحراسة، تتوقف سيارة مرسيدس سوداء بالكامل، حتى الزجاج أسود بسبب الفاميه، يفتح باب السيارة الأمامي سائقٌ يشبه الفنان محمد رجب في فيلم كلاشينكوف؛ فتنبعث من الكاسيت موسيقى لأغنية غير واضحة بسبب خفوت الصوت. ما إن لمست قدما السائق الأرض حتى هروول متجهًا إلى الباب الخلفي ناحية الشركة، ليفتحه لرئيسه «رجب أبو مودة»، وهو رجل سابق بالجيش «الشت لاندي»، تقاعد عام ٢٠٠٨ بعد واقعة شهيرة حدثت له في سينما كانت تعرض فيلم «كلاشينكوف»، بطولة الفنان المصري محمد رجب، وكان «أبو مودة» -العقيد آنذاك- يجلس مع عشيقته في الصف الأخير من قاعة السينما، وكلما قتل الفنان محمد رجب أحد أهدافه ازدادت إثارة أبو مودة وأخذ يُقبل عشيقته. ومع نهاية الفيلم وتسارع أحداثه ازدادت إثارته أكثر واستغرقتة القُبل؛ حتى إنه لم يشعر بحلول النهاية إلا عندما أضيئت القاعة، لي شاهد عشيقين أمامه يقبلان

بعضهما. أمعن النظر فيهما لعله يتعلم طريقة جديدة للقبل ولكنه رأى ما صعقه!

فقد كانت المفعول بها هي زوجته، وكان الفاعل «عم عبده»
بواب قصره. صرخ فيهما فانتفضا هلعًا:

- أبو مودة: أنا مش مصدق عنيا!

- الزوجة: رجب!

- أبو مودة: آه رجب يا خاينة، ضاقت بيكي مالمقيتيش غير عم
عبده البواب؟

- عم عبده: آني ماليش دعوة يا أبو مودة بيه، سيادتك عارف
إني عبد المأمور.

- أبو مودة: دا أنا اللي عبد المأمور يا عم عبده. أنا شُفتك بعيني
بتبوس مراتي!

- عم عبده: ست هانم هي اللي ضحكت عليا وقالت لي: تعالى
معايا يا عم عبده وهاجيب لك مصاصة، وبعدين جابتنى
هنا، والظاهر كده إن مافيش مصاصة في المكان دا، فادتنى
شفايفها أمصر فيها شوية لغاية ما نطلع وتجيب لي مصاصة
بحق وحقيق.

- أبو مودة:!

- عم عبده: عاوزين حاجة؟ آني ماشي بقى، سلامو عليكمو.

- أبو مودة: استنى هنا، رايح فين؟

- عم عبده: رايح أجيب مصاصة.

- أبو مودة «محدثا زوجته»: عاجبك كدا؟
- الزوجة: إنت عامل غلبة ليه؟ هو انت يعني اللي جاي السينما تعمل عمرة؟! ما انت كمان كنت بتمص في الأمور!
- عم عبده: إنت كنت بتمص في الأمور وزعلان عشان بمص في مراتك؟ خلاص يا سعادة البيه محلولة، ماتزعلش نفسك، خد مراتك وامشوا وسيبني أنا مع الأمور، وبكدا نبقي رجعنا كل حاجة لأصلها.
- أبو مودة: أنا مش مصدق نفسي، مش مصدق إنك تخونيني مع دا! دا أهبل، بواب وفلاح وأهبل كمان.
- الزوجة: هو دا بس اللي فارق معاك؟ يعني لو ما كانش بواب وفلاح وأهبل كنت هتقبل الموضوع عادي؟
- أبو مودة: إنتي ليكي عين تتكلمي يا فاجرة؟ (ثم يخرج مسدسه) لازم تموتوا، كلكم لازم تموتوا.
- عم عبده: طيب مش هتسألني نفسي في إيه قبل ما تموتني؟
- أبو مودة: همممممم إنت راجل كبير برضه وماينفesch أرفض لك طلب. نفسك في إيه يا عم عبده؟
- عم عبده: مصاصة.
- أبو مودة:!
- عم عبده: عاوز مصاصة. أنا عارف إن مافيش هنا، فممكن تخليني أمص الأمور وأمري لله!

وعلى صوت الفنان آدم، يشدو بأغنية تتر نهاية الفيلم: «كل واحد عنده سر جوه منه ومداريه، ١٠٠ حقيقة ومداريها عن أقرب الناس ليه...»، قتل أبو موة «الأمورة» وبعدها قتل زوجته، ثم عم عبده، ثم من في السينما جميعًا، وحاول قتل العاملين بها لولا نفاذ ذخيرة مسدسه، وحضور الشرطة «الشت لاندية» وإلقاء القبض عليه، ولأنه لا يزال على قوة الجيش الشت لاندي تم تسليمه للشرطة العسكرية. وطوال التحقيق كان لا يرد على أسئلة المحققين إلا بجملته واحدة:

- أنا ما كنتش رجب أبو موة وقتها. روح الأستاذ كلاشينكوف

لبستي!

أودع - إثر تكراره جملته تلك - مصحة نفسية لبعض الوقت، ثم أطلق سراحه؛ لكن من خرج من المصحة لم يكن أبو موة القديم، كان نسخة طبق الأصل من محمد رجب في فيلم كلاشينكوف! قص شعر رأسه وحلق لحيته، وارتدى نظارة سوداء على بذلة باللون نفسه، وأصبح يقلد محمد رجب في الفيلم؛ فيلقي الكثير من الإفيهات، معظمها - إن لم يكن كلها - ثقيل الظل.

ولم يتوقف تأثيره بالفيلم عند ذلك الحد، فبتحويشة عمره افتتح شركة أسماها «كلاشينكوف»، في ظاهرها شركة أمن وحراسة، لكنها في الباطن شركة للقتلة المأجورين، كان النظام القديم - الذي ترأسه الرئيس بعرو، رحمه الله - يتعاون معه لتصفية المعارضين والخصوم والخونة أعداء الدولة، ويفخر أبو موة دومًا بأنه كان «دفعه» وليد التيس، الرئيس الحالي لشت لاند، والذي جاء خلفًا لبعرو بعد اختفائه في تمرد الخونة يوم ٢٨ فبراير.

ينزل أبو مودة من سيارته فيتضح أن الصوت الخارج من الكاسيت هو صوت الفنان آدم، يصدح بأغنية: «كل واحد عنده سر جوه منه ومداريه...» التي جعلها النشيد الوطني لشركة كلاشينكوف. يقف بجوار السيارة ناظرًا إلى مبنى شركته بفخر واعتزاز؛ ثم ينظر باحترام تجاه سطح الشركة حيث يرفرف علمٌ أبيض يتوسطه لوجو عبارة عن الصورة التي رسمتها الفنانة شيري عادل للأستاذ محمد رجب في الفيلم، وأسفلها بخط أندلسي كتبت كلمة «كلاشينكوف». يقف «انتباه» لتحية العلم الكلاشينكوفي، وفي الخلفية تصدح من السيارة «وانت أقرب حد ليا، يا حبيبي لو عليا، كنت أقول لك بس خايف، أيوه خايف وأعمل إيه؟». تمر دقائق وهو يقف بجلال، لا يلتفت حتى إلى السائق الذي يمر من خلفه، ويميل ليحضر الحقيبة الجلدية من الكرسي الخلفي للسيارة، ويعتدل ثم يغلق باب السيارة، ويتبع أبو مودة الذي بدأ يتحرك باتجاه مبنى شركته بثقة كممثل هوليوودي على الريد كاربت.

يمر برجل أمن - يشبه هو الآخر الفنان محمد رجب في كلاشينكوف - واقف كتمثال قُدَّ من صخر. يتوقف أمامه ويلقي نظرة على وجهه ويبتسم برضا؛ بعد أن تأكد بنفسه من أنه حلق لحيته هذا الصباح. يهم بالانصراف فتقع عيناه على شيء يجعله يتوقف مرة أخرى، وتتحول ملامح وجهه من الرضا إلى العبوس:

- إيه دا؟

قال رجل الأمن دون أن يتحرك منه شيء باستثناء شفتيه:

- أفندم!

أشار أبو مودة برأسه إلى صدر رجل الأمن ناحية قلبه، وقال:

- لوجو شركتنا مايل حوالي ٩ ملي كاملين!

نظر رجل الأمن إلى لوجو الشركة وهو يرتجف، بينما استأنف أبو

مودة:

- إنت عارف دا معناه إيه؟

ارتبك رجل الأمن وارتعشت ركبته وبدأت مسامه تفرز العرق

بغزارة دون أن ينطق، فمد أبو مودة يده وأشار بسبابته إلى صورة الفنان

محمد رجب الموضوع على اللوجو، وقال:

- معناه إن الأستاذ هيجي له صداع.

وأطلق ضحكة طويلة تعجب لها رجل الأمن والسائق؛ لكنهما

شاركاه الضحك مجاملةً، فقطع ضحكته فجأة؛ ثم قال بحدة وغضب:

- سلم خدمتك لحد من زمايلك وتعالالي مكتبي.

وترك رجل الأمن يبكي وانطلق مكماً سيره لتنهال فوق رأسه مياه

قدرة، فينظر إلى الأعلى ويقول بغضب:

- ابن الجزمة اللي ع السطح يجي لي مكتبي حالاً.

ويدخل من البوابة الضخمة التي وضع عليها شعار الشركة.

محاسن الصدف

محاسن الصدف، إعلامية سابقة وابنة الشهيد خالد بقري؛ أحد مذيعي النظام السابق، والذي اختفى في نفس الظروف التي اختفى إثرها الرئيس بعروور وقادة حكمه وإعلامه؛ أي تمرد الخونة في ٢٨ فبراير. تعشق محاسن والدها، ودائمًا ما تتحدث عنه بفخر واعتزاز؛ كونه أحد الشهداء الذين ضحوا بحياتهم فداءً للوطن، ودائمًا ما تدمع عيناها حينما يذكر اسمه أمامها تأثرًا بذكراه، ولكنها لم تستطع أن تسامحه على ما فعله بها، حينما أسماها «محاسن الصدف» اسم مركب.. محاسن الصدف خالد بقري! فاسمها يسبب لها العديد من المواقف المحرجة، فكثيرًا ما تسير في شوارع شت لاند وتقابلها سيدة تفتح ذراعيها وتصيح: - يا محاسن الصدف.

وبالتالي تفتح محاسن ذراعيها لتستقبل حضن السيدة، إلا أن الأخيرة تتجاوزها وتحتضن أخرى خلفها وهي تكمل: - عاش من شافك يا اختي.

وهكذا.. تكرر الأمر كثيرًا حتى قررت محاسن أنها لن ترد على من يقول «يا محاسن الصدف» أبدًا، لأنها لم تستطع معرفة ما إذا كان ناطق الجملة يناديها أو يرحب بآخر! لكن عدم ردها تسبب لها في متاعب أكثر، فكلما ناداها رئيسها:

- يا محاسن الصدف.

ولم ترد، يصب غضبه عليها على اعتبار أنها لا تقدره! أصبحت محاسن في حيرة من أمرها، لا تعرف كيف تتعامل مع الأمر؛ حتى إنها فكرت في تغيير اسمها، ولكنها كانت شخصية عامة ذات يوم وإعلامية مشهورة وكانت معروفة في المجتمع الشت لاندني كله على أنها «محاسن الصدف»، وحتى الآن يعرفها بعض الناس رغم تقلص شهرتها بسبب الحادثة التي وقعت قبل سنوات. تلك الفضيحة التي أنهت مسيرتها كإعلامية قديرة ابنة إعلامي سابق وشهيد حالي، والتي أطلق عليها إعلاميًا «الفضيحة المعذبة»، تسترجع محاسن تلك الحلقة الشهيرة في ذاكرتها:

- أعزائي المشاهدين، في الجزء الأول من حلقتنا النهاردا، معانا حالة خاصة عملت حاجة مجنونة، وقررنا نستضيفها عشان تحكي لكم عملت كدا ليه، ممكن تعرفي السادة المشاهدين بحضرتك؟

- ماعلش أنا مش هاقدر أقول اسمي، بس ممكن تعتبريني «المعذبة س. أ».

- أيوه يا معذبة بس احنا في برنامج تلفزيوني، يعني وشك باين للناس دلوقتي. فليه ما طلبتيش منا نعمل تورية طالما مش عايزة حد يعرفك؟!!

- حضرتك مش فارق معايا الناس تشوف وشي أو لأ.. أنا بس مش حابة أقول اسمي، فياريت تحترمي رغبات ضيوفك.

- طيب إنتي حرة، ندخل في موضوع حلقتنا عشان أنا والمشاهدين عندنا فضول نعرف ليه.. ليه عرضتي جوزك للبيع على أوليكس؟

- فايض عليا يا أستاذة.

- نعم؟!!

- فايض عليا ومش محتاجاه في حاجة.. حاولت أتبرع بيه لجمعية رسالة؛ ضحكوا وقالوا مش عايزين. حاولت أدور على عصابة من عصابات تجارة الأعضاء بس ماعرفتش أوصل لهم، عشان إنتي عارفة إننا بنعيش في الأمن والأمان في عهد الرئيس التيس الله يديه الصحة.

- الله يديه الصحة ويرحم الرئيس بعروور وقادة حكمه وكل شهداء التمرد الخسيس وأولهم بابا ال...!

- آمين. في النهاية ما لقيتتش قدامي غير أوليكس، فسورته وكتبت مواصفاته ونزلته.

- مش عارفة ليه حسيت فجأة كدا إنك بتكلميني عن طقم حلل!

- والله لو طقم حلل ما كنت هافرط فيه أبداً، إنتي عارفة الحلة بقت بكام في عهد الرئيس التيس؟

- إحم! أيوه بس دا جوزك!
- خديه يا اختي، خديه وهاتي لي جوز كوارع.
- بس دا ج....
- طيب خديه وهاتي لي جوز حمام.
- يا مدام.
- جوز شرابات طيب؟ أي جوز وخلص، اللي يطلع من ذمتك.
- اهمدي بقى خليني أكمل، دا جوزك ومكتوب قدامي إن عندك عيال منه، فإزاي يهون عليك تبيعيه؟ أو مال اتجوزتیه ليه من الأول!؟
- أبويا كان شاري من أبوه جاموسة عُشر، وماكانش معاه فلوس يكمل تمنها، فقالوا يعملوا بدل عشان البيعة ماتبوظش.
- هممممممم، وفكرة إنك تبيعيه على أوليكس دي جات لك منين؟
- من بنات....
- بنات أفكارك؟
- لا بناتي أنا، رينا رازقني بشهى ونهى، فمش هاسيبهم وأروح أستشير بنات أفكارك يعني.
- !؟
- ولا حتى بنات أي واحدة تانية، دا أنا بناتي عباقرة زي أمهم.
- أيوة يعني إيه وصلك للمرحلة دي؟ عمل إيه اللي مايتسماش جوزك؟ كان بيعاملك وحش وللا ما بيصرفش عليك؟

- لا ما عملش حاجة، بس الحاج أمين الله يرحمه قال لي:
- يا بت يا سميحة اللي اشتراكي بالرخيص بيعيه ببلاش، وهو
- اشتراني بجاموسة يعني.
- الحاج أمين مين يا سميحة؟
- الحاج أمين أبويا، إيه دا؟ إنتي عرفتي اسمي منين؟
- ما انتي لسه قايلاه حالاً!
- همممم، ما أخذتش بالي، بس مش مهم، هو مافيش غيري
- اللي سميحة في البلد يعني؟ دي البلد كلها سمايح.
- كلها إيه؟
- سمايح، جمع سميحة، المهم إن ماحدث يعرف أنا سميحة
- مين فيهم، عشان ما قلتش اسم أبويا.
- أبوكي الحاج أمين؟
- يا فضيحتي؟ إنتي عرفتي اسم أبويا كمان!
- ما انتي اللي لسه قايلاه حالاً يا ولية؟ وبعدين بطلي تتعاملي
- معايا كأنك في برنامج راديو، وفكك من جو «المعذبة س. أ»
- دا عشان إنتي مش متصلة بالأستاذ أسامة منير، إنتي في برنامج
- تلفزيوني، يعني وشك ظاهر للناس من أول الحلقة، من قبل
- حتى ما تقولي اسمك.
- والنبي إيه؟
- والنبي أيوه، نرجع بقى لموضوع حلقتنا يا سميحة، لما جوزك
- مش عاجبك كدا ليه مافكرتيش تخلعيه؟

- وليه أخلعه لما ممكن أبيعه وأكسب من وراه فلوس؟
- نظرية برضه، في نهاية حلقتنا نحب نحذر كل راجل من مصير
جوز سميحة، إحنا مابقيناش ستات ضعيفة زي زمان، فكل
راجل يخاف على نفسه.

لم تظهر محاسن على التلفاز كمذبة بعد ذلك اليوم، بعد أن
أطلق زملاؤها وزميلاتها حملة هجوم ممنهجة، يتهمونها خلالها بزعة
استقرار البلد عن طريق شحن النساء ضد الرجال والتحريض على قتل
الرجل الشت لاندي، لتصبح الدولة أحادية الجنس وتفنى. ووصل الأمر
ببعض الإعلاميين إلى استضافة «المعذبة سميحة أمين» شخصياً،
لتعترف أمام الرأي العام بأن محاسن اتفقت معها على أن تقول هذا
الكلام، لترفع من نسبة مشاهدة برنامجها!

هذا هو السبب الظاهري للأمر، ولكن في الحقيقة كان هناك سبب
آخر وراء معاقبتها، وهو غضب سيادة الرئيس «وليد التيس» منها بسبب
الجزء الثاني من الحلقة نفسها، تلك الحلقة الشؤم التي كانت سبباً في
إنهاء مسيرتها الإعلامية بعد أن تجرأ ضيفها وقارن فعله بفعل الرئيس
«التيس».

- ودلوقتي بعد ما شُفنا مأساة «المعذبة سميحة أمين» اللي
عارضة جوزها للبيع على أوليكس، معانا في الجزء الثاني
من حلقتنا أستاذ خميس العيل، اللي مقدم طلب عشان يلغي
العيال! الكلام دا مظبوط يا أستاذ خميس؟
- أيوه يا ست المذبة، أنا طالب نلغي العيال ومصمم على طلبي.

- ويا ترى الموضوع ليه علاقة باسمك؟
- مش فاهم.
- يعني إنت اسمك خميس العيّل وعاوز تلغي العيال! هل دا ليه علاقة بدا وللا دي مجرد صدفة؟
- لا دا ليه علاقة بدا ولا أنا أعرف دا ولا دا، وشيلي دا عن دا يرتاح دا من دا.
- إيه اللي انت بتقوله دا؟
- مش عارف إيه دا، بصي، أنا عيّل من زمان.
- صدفة يعني؟
- لأ عيّل مش صدفة، صدفة دي عيلة تانية، لكن عيلتي اسمها العيّل، قبل حتى ما أتولد وأكبر وأفكر وأقرر ألغي العيال.
- وعائز تلغي العيال ليه يا خميس؟ دول زينة الحياة الدنيا!
- أيوه هما زينة الحياة الدنيا فعلاً، بس لما تبقى الحياة فيها فلوس والدنيا فيها خير، غير كدا حياة دي هتبقى خالتك ودنيا هتبقى أمك.
- !؟
- والعيال مش هيبقوا زينة ولا هركليز حتى.
- واضح إنك لطيف!
- الله يزيد لطفك «ويرفع يده بجانب رأسه في إشارة لكونها مجنونة».

- طيب إنت مش عاجبك الأطفال ماتخلفش وخلص، بس
سيب غيرك يخلف، مش لازم تلغيهم نهائي يعني!
- أنا كنت باقول زيك كدا، بس المشكلة مش في عيالي، أنا
أصلاً مش متجوز.

- يعني انت مش متجوز وبتشتكي من العيال!؟

- العازب يا ست المذبة بيعاني من الأطفال ضعف المتجوز.
- إزاي بقى؟

- في المواصلات مثلاً الطفل بيقعد دايمًا على حجر أبوه، ودا
معناه إني - كشخص عازب قاعد باحترامي - مضطر أستحمل
عبث إيد الطفل دا في قفايا، ومجبر أستقبل رياله وقرفه
بابتسامة لزجة عشان في الأول والآخر he is akid يعني،
بس أنا من جوايا متغاض ونفسي أعمل منه مطب صناعي،
وأفضل رايح جاي فوقيه بالعربية لحد ما أساويه بالأسفلت،
ومايعرفوش يشيلوه غير بسكينة معجون.

- يا ساتر!

- في السينما، تفتكري الأب والأم بيزعجهم عياط ابنهم؟
أبدًا والله، أصل دا عياط منهم فيهم فمتعودين عليه؛ إنما أنا
- كعازب داخل يبوس البنت مديحة بشلة اللي شاقطها - بابقى
نفسي أمد إيدي في بؤ العيل من دول، أطلع لسانه بحنجرته
بالبلعوم وأعملهم سلسلة مفاتيح، أو أديهم لدكتور تجميل يملا
بيهم الفراغ اللي في بشلة مديحة.

- أحيه!

- وللا في الجامع، حتى الجامع، بيت ربنا المقدس، الأطفال
بيعملوا فيه حاجات غير آدمية. عمرنا ما سمعنا عن طفل خلى
أبوه راعع وضربه بالشلوت، بس بتلاقي العيال واخدين وضع
الشلوت ضد الغريب عنهم أول ما يبدأ يركع، ويا ريتها بترسى
على شلايت يا ست المذيعه.

- هو فيه إيه أكثر من الشلايت؟

- الصوابع، الصوابع بيكون ليها دور رهيب في الموضوع
(بيعيط)، وتلاقي الطفل الوسخ اللي بي....

- إحم، إحناع الهوا.

- وتلاقي الطفل الوسخ اللي بيعمل كدا فيكي واقف في حضن
أبوه ويخرج لك لسانه بعد ما بي....

- اهدا يا عيل.

- وللا البامبرز ي....

- إنت مش قلت إنك مش متجوز؟! مالك ومال البامبرز؟!!

- ما هي الأم بتشيل البامبرز من مؤخرة الواد من هنا وهوب
ترميه باللي فيه في الشارع، قال يعني بتقرف، فالبامبرز يختار
السينجل دونًا عن كل الناس ويلبس في راسه (بيبربو من
العياط)، ولو ربنا ستر ومالبسش في راسه بيتكعبل فيه وهو
ماشي، ولو ما اتزحلقش على البيبي وهدومه باظت، الكوتشي
أبو ٥٠٠ جنيه ببيوظ وريحته بتبقى وحشة (بيشم نفسه
وعياطه يزيد).

- خلاص اهدا طيب ماتعملش في نفسك كدا.
- أنا عايز ألغي الأطفال، مش هاهدا ولا أنام غير لما يتلغوا، بصي؛ قولي لهم يربوا كلاب، الكلاب حلوة والله؛ الكلب آخره إيه يعني؟ يهوهو؟ عادي، لو وطيت على طوبة هالاقية اختفى قبل ما أرفع راسي عشان أحدفة، الغوا العيال والنبي، الغوهم أو صدروهم للخارج.
- بس لازم الناس تخلف يا أستاذ عشان إعمار الكون، دي سنة ربنا في الخلق.
- طيب ما يعملوا تعديل جيني ويخلفوا أرانب! تخيلي بعد ١٠٠ سنة تبقى دولتنا أول دولة أرانب في العالم، الأرانب حلوين والله وشكلهم كيوت، على الأقل لو زهقت من أرنب هادبحة، إنما لو زهقت من طفل هاعمل إيه؟!
- أنت غريب يا خميس، عاوز تلغي الأطفال كدا ببساطة؟
- وإيه يعني يا ست المديعة؟ هو أنا أول واحد يلغي حاجة ما ينفعش تلغي؟
- تقصد إيه؟
- أقصد إن الرئيس التيس لغى يوم التمرد، وخلي شهر فبراير ٢٧ يوم، وطبّلتوله عادي!
- أيوه بس الرئيس التيس عمل كدا لأن دا اليوم المأساوي في تاريخ شت لاند الحديث، دا اليوم اللي اتقتل فيه كل قادة النظام السابق بقيادة الرئيس بعروور الله يرحمه على إيد الخاين والعميل سيريال كيلر، يعني سيادة الرئيس التيس كان بينفذ

مهمة وطنية بأنه يلغى يوم مأساوي في تاريخنا عشان يشيل
الأحزان من ذاكرة الشعب.

- ما انا العيال مأساة في حياتي برضه، وبعدين بغض النظر عن
السبب، في النهاية النتيجة إنه لغى يوم من شهر، فأنا باطالب
بالمساواة في تحقيق رغبتى كمواطن شت لاندي، وتلغوا
الأطفال، وأعتقد إن دي حاجة أسهل من إلغاء يوم في شهر
فبراير القصير أصلاً.

عقب انتهاء الحلقة مباشرة استدعاها مدير قناة «خوازيق» التي
تعمل بها؛ ليخبرها أنه تلقى أوامر بمنعها من الظهور إعلامياً مرة أخرى،
وعليها أن تحمد الله على أنها لم تلقَ مصير ضيفها -العيل- الذي يعتبر
في عداد الأموات الآن، فالشيء الوحيد الذي شفع لها عند سيادته هو
اسم والدها الشهيد. ها هي تذكر معروفًا آخر لوالدها الذي -حتى وهو
ميت- أنقذها من الموت، فلتغفر له ذنب اسمها وتتعايش مع الأمر!
ولكن الأمر أحال حياتها جحيمًا، فبعد أن أصبحت مراسلة في
القناة نفسها، تحول اسمها إلى مزحة من زملائها، أشبه بمزاولة يزاولها
بها المصور الذي يتبعها لتصوير التقارير للقناة؛ والمخرج؛ وحتى سائق
العربة الثان التابعة للقناة يزاولها باستخدام الاسم، كلهم على طريقة
سيدات الشارع، ما إن يراها أحدهم حتى ينادي «يا محاسن الصدق»
فتلتفت إليه لتجده يحتضن الآخر ويبتسمان بسماجة!



سعيد الحظ

«سعيد الحظ»، لا، ليست صفة كما تعتقد، إنه اسم ضابط شرطة، (ولأبرضه مش أخو محاسن الصدف ولا يعرفها). «سعيد الحظ» هو المواطن الوحيد الذي لم يكن له من اسمه نصيب - ولا حتى برقع جنيه شت لاندني - فهو الضابط الوحيد في الشرطة الشت لاندية الذي عمل بجميع إداراتها، من المرور للآداب للمباحث... إلخ، ليس لكفاءته ولكن لأنه في كل إدارة يعمل بها يفشل فشلاً ذريعاً، فينقل إلى أخرى ليفشل ثانية، وهكذا. وسعيد لا يعترف بغبائه أبداً، ودائماً ما يبرر فشله لكونه سيئ الحظ لا أكثر.

كان متساهلاً مع السائقين في الكمائن، يوقف أحدهم:

- معاك رخص؟

- آه يا باشا.

يهم بإخراج الرخصة فيمنعه سعيد:

- خلاص أنا مصدقك، اتكل على الله.

يتركه يمضي ويوقف آخر:

- رخصتك سارية وللا منتهية.

يرتبك الرجل ولا يرد، فيهدئه سعيد:

- قول ماتخافشي.

- منتهية يا سعادة الباشا، بس والله هاجدها.

- خلاص أنا مصدقك، اتكل على الله.

وهكذا حتى ذاع صيته بين المارين من المنطقة التي ينصب فيها
كمينه بشكل دوري، فأصبحوا يتعاملون معه كأنه غير موجود:

- عربيتك دي؟

- لا يا باشا سارقها.

- خلاص أنا مصدقك اتكل على الله.

بطريقته تلك لم يحزر مخالفة واحدة في حياته المهنية، ولم يتسبب
في دخول جنيه شت لاندي واحد في خزينة الدولة.

ولما علم رئيسه بالأمر وبخه وطلب منه تغيير طريقته والتعامل
بقسوة مع المواطنين، لينصب في اليوم التالي كميناً بمكان آخر، ويقرر
تنفيذ تعليمات رئيسه، فيوقف شاباً يقود دراجة بخارية، ثم يطلب منه
الرخص:

- سعادتك أنا رخصي سليمة، وبطاقتي سليمة، ومكنتي سليمة،

وهدومي سليمة، ودماعي سليمة، ورجلي سليمة، وإيدي سليمة.

- !؟

- والدنيا سليمة، وانا وانت، والناس اللي جاية، والناس اللي

رايحة، والناس اللي فوق، والناس اللي تحت.

- إنت هتغنّي لي يا روح أمك؟! إيه، شغال شاويش في فرح؟
- لأ شغال في سيرك يا باشا.
- شغال إيه في السيرك، قرد؟
- لأ بلياتشو.
- غريبة! اللي يشوفك وانت ماشي بالموتوسيكل على عجلة واحدة يفتكرك قرد! إنت اسمك إيه؟
- عوض يا باشا.
- وبتعمل حصان بالموتوسيكل ليه يا عوض؟ مش خايف تقع تنكسر رقبتك؟
- يا باشا باقول لك بلياتشو، يعني بامشي ع الحبل وأنا مغمض عيني ومش باقع!
- وماشي من غير خوذة ليه يا عوض؟
- يعني إيه خوذة سعادتك؟!
- خوذة يا عوض اللي بتتحط على الدماغ عشان تحميها.
- يا باشا باقول لك شغال في سيرك، يعني بامشي ع الحبل من غير خوذة تحمي دماغي. تفتكر هاحتاج أحميها وانا ماشي على طريق عريض زي دا؟
- همممم، بلاش دماغك، الخوذة دي فيها حته إزاز عشان تحمي عينك من التراب.
- أنا بامشي في الأماكن القليلة اللي مافيهاش تراب.
- إيه الأماكن القليلة دي؟ عاوز تقول إن بلدنا مش نظيفة؟!
- إنت اتجننت يا عوض!

- يا باشا لأ، قصدي إني بلياتشو، يعني أكثر مكان بامشي عليه هو جبل السيرك، وما فيش تراب فوق زي ما انت عارف.
- إيه علاقة دا بالخوذة؟
- ما انا مش هاحتاج الخوذة عشان أنا بلياتشو.
- أنا حاسس إنك بتعايرنا عشان إنت بلياتشو وإحنا بني آدمين!
- يا باشا ما أقصدش والله.
- طول ما اللي زيك عايشين في البلد دي، عمرها ما هتتقدم. إنت إرهابي ياله؟
- يا دي النيلة! يا باشا إرهابي إيه بس؟ أنا بلياتشو!
- ولا بس حفاظة ليه؟
- بتجيلي الحظ.
- كده عندنا ٣ جرايم، إرهاب، ومعايرة رجال الشرطة أثناء ممارستهم لعملهم يانهم بني آدمين وانت بلياتشو، وقيادة دراجة بخارية مع ارتداء حفاظة بدل الخوذة.
- يا باشا والله أنا باحب بلدي.
- بلدي وللا افرنجي.
- إفيه دا يا باشا؟
- آه.
- طيب احبسني، احبسني وارحمني من الإفبهات دي.
- مش هاحبسك لأ يا عوض، أنا هاجيب لك إعدام لأنك قتلت خمسة.

- خمسة! فين دول؟
- خمس عساكر أهم (يخرج مسدسه ويطلق النار على خمسة عساكر ليسقطوا أمامه).
- إيه يا باشا جو الأستاذ خالد الصاوي في فيلم أبو علي دا؟
- حرام عليك، هو أنا عملت إيه يعني؟
- كدا عندنا خمس جرايم.
- هما أربعة بس، أنا مركز: إرهاب، ومعايرة رجال الشرطة أثناء ممارستهم لعملهم يانهم بني آدمين وأنا بلياتشو، وقيادة دراجة بخارية مع ارتداء حفاظة بدل الخوذة، وقتل خمس عساكر.
- نسيت أهم جريمة يا عوض، الجريمة التي لا تغتفر.
- إيه يا باشا؟
- السخرية من إفيه قاله ظابط شرطة أثناء تأدية عمله.



أبو بخت مايل

«أبو بخت مايل»، أعتقد أنك بت تعلم الآن أن هذا اسم شخص، وأعتقد أنه عيب عليك أن تندهش، فإذا كنت قد تقبلت وجود أشخاص أساميهم «محاسن الصدف» و«سعيد الحظ» فيامكانك ببساطة تقبل شخص يدعى «أبو بخت»، ومن عائلة «مايل» أعرق عائلات شت لاند. «أبو بخت» وعلى عكس «سعيد الحظ» جعل الله له من اسمه نصيبًا. كل يوم يتأكد له أنه أبو بخت مايل اسما ووصفا، فهو طبيب العيون والحاصل على ماجستير في الطب النفسي، ويحاضر طلاب كلية الطب. كان شخصية مرموقة في عهد الرئيس بعرو، وبعد أن تقاضى أول راتب محترم، حدث تمرد فبرابر الذي أطاح بالبعور ونظامه، ليخلفه «التيس» الذي قرر تفادي أخطاء من سبقوه حتى لا يلقي مصيرهم، فأضحت أولوياته هي القضاء على منظومتي الصحة والتعليم نهائيًا، فالشعب المريض الجاهل تسهل السيطرة عليه. ليجد أبو بخت نفسه يتقاضى راتبًا لا يكفي حتى ليشتري مصاصة. يشعر أن هذا عقاب من الله لأنه تسبب في الأذى لطالبه المجتهد عبقرينو:

- قوم يا عبقرينو.
- أنا يا دكتور؟!
- هو فيه عبقري غيرك في أم الجامعة دي؟ قوم قل لنا نبذة عن مشروع التخرج بتاعك، وسمع زمايلك يمكن يستفيدوا.
- أنا ما عملتش حاجة لدا كله يا دكتور، هو مشروع بسيط أصلاً، يادوب اخترعت حبوب الصراحة.
- حبوب إيه يا اخويا؟
- حبوب الصراحة، زي اللي كانت مع الأستاذ فؤاد المهندس في فيلم أرض النفاق.
- يا سيدي! إشجيني كمان يا وله اشجيني. تكونش فاكر نفسك يوسف السباعي؟
- ويوسف السباعي ماله ومال اختراعي بس يا دكتور؟
- ما هو يوسف السباعي يا روح امك هو اللي كتب أرض النفاق!
- هو كتب بس، لكن أنا اخترعت. (بتناكة)
- شاطر يا عبقرينو، شاطر يا حبيبي، بصوا يا ولاد لزميلكم المخترع دا، بصوا لعبقري الدفعة، بصوا له كويس وركزوا في ملامح وشه، عشان تعرفوا المخدرات ممكن تعمل إيه!
- مخدرات إيه يا دكتور؟ أنا باتكلم جد، إنت ليه مش مصدقني؟!
- أصدقك ازاي يا وله؟! إذا كنت أنا دكتورك، ومعلم أجيال قبلك، ومشروع تخرجي كان حلة محشي! هتيجي إنت - يا بتاع انت- تخترع حبوب صراح... ثانية واحدة! الواد اللي جنبك دا نايم وللا وشه هو اللي كدا؟!

- وشه كدا إزاي؟!
- ديزاين وشه شبه النايمين كدا! أو مصاب بمرض النعاس اللي بتسببه ذبابة التيسي تيسي.
- تيسك؟! لأ يا دكتور هو ديزاين وشه شبه النايمين.
- طيب صحيه كدا. قوم يا بني، قوووووم.
- أنا يا دكتور؟
- أيوه إنت، قوم قل لي أنا كنت باقول إيه؟
- أااا، حضرتك كنت بتقول كلام.
- يا سلام؟! يعني ما كنتش باكاكي؟! ما انا أكيد قلت كلام، إيه هو بقى؟
- أاااااا، هو كلام حلو والله يا دكتور.
- كلام حلو إيه؟! هو أنا عامل لك رز بلبن؟ قل لي كنا بنتكلم عن إيه؟
- كنتو بتتكلمو عن تيسك.
- امش اطلع بره.
- يا دكتور...
- ماتناقشنيش، اتفضل بره، بقى انت طالب علم انت؟!
- أو مال يعني طالب القرب منك؟
- بتقول إيه؟!
- باقول اللي سمعته يا عم.
- !

- أنا مش مستغرب انك معقد على فكرة، هتكون سوي ازاي
وانت عشت حياتك تحشي الكتب في دماغك عشان تلم
المنهج، في الوقت اللي كان زمايلك فيه عايشين حياتهم.
هما بيحبوا أكل وانت بتجيب مراجع، هما مقضيينها سينما
وهند رستم، وانت مقضيتها برنامج عالم الحيوان ومتابع موسم
تزاوج سمك السردين.

- !

- عشان تتخرج بامتياز وتتعين معيد بعد واسطة وكوسة؛ كنت
فاكر نفسك زويل بس بعد أول شهر بيظهر القهوجي اللي
جواك ويبقى اسمك «مشاوير»، هات فطار للدكاترة، اعمل
شاي للدكاترة، شطف الدكاترة بعد ما يعملوا حمام. عز...ض
نفسك للخطر عشان الدكاترة، المهم تبقى دكتور زيهم في
الآخر.

- !؟

- ولما بقيت دكتور، بتطلع عقدك علينا وتنتقم منا. مرة
امتحان من بره المنهج، ومرة تلغي شابتر وماذا كروش فتجيب
الامتحان منه، وحاجة منتهى البتنجان بالبلح يعني.

- الواد دا اتجنن وللا إيه؟

- لا يا دكتور ما اتجننش ولا حاجة، أنا بس إديته حباية من
الاختراع بتاعي.

- إديته حباية من إيه؟

- الاختراع بتاعي.

- حبوب الصراحة؟!!
- أيوه.
- هممممم طيب تقدر تبتكر حبوب النجاح؟
- إيه حبوب النجاح دي؟
- حاجة كدا زي حبوب الصراحة بس دي هتخلي الطالب اللي ياخذها ينجح!
- ودي هنعمل بيها إيه؟
- هتاخذ منها إنت وزميلك الصريح دا، لأنني قررت أسقطكو إنتو الاتنين. وحياة هند رستم وسمك السرددين في موسم التزاوج، ما حد منكم ناجح طول ما انا في أم الكلية دي.
- بعد قرار تقليص رواتب العاملين بوزارة التعليم بكل فئاته، يقرر أبو بخت مايل أن يذهب إلى عمله الأصلي، طبيب عيون في مستشفى الرمد، يتحمل كل شيء في سبيل الراتب المتواضع الذي سيضعه على القروش التي يتقاضاها من الجامعة فيضمن ألا يموت جوعًا. تحمل نقص الإمكانيات والأجهزة، تحمل قذارة المستشفى وطاقم التمريض. تحمل رائحة عرق المرضى الفقراء. تحمل كل شيء، حتى حدث ما جعله يقرر الاستقالة:
- إنتي عندك عشي ليلي يا مدام.
- بسم الله ما شاء الله عليك يا دكتور، أنا كنت فاكراك بتكشف ع العيون بس، طلعت بتقرا لغتهم كمان؟
- باقرا لغتهم إزاي يعني؟

- يعني بتبص لعين النبي آدم فتعرف مستقبله وكدا. من أول ما بصيت في عيني عرفت اني عندي عشا ليلي! ما تشوف لي والنبي يا اخويا مين اللي بيسرق بيض الفراخ من على السطح بالليل، أنا شاكة في البت سماسم المقملة، بس عاوزة دليل.

- يا ستي سماسم إيه وعين إيه دي اللي أقرأها؟ باقول لك إنتي عندك عشى ليلي.

- آه طبعا يا دكتور عندي عشا، وإن شاء الله أول ما أروح ها طبخ بطاطس وبتنجان تاكلهم يغمى عليك على طول. نادرن عليا لو ربنا جعل في إيدك الشفا لادوقك طبيخي. بس والنبي يا دكتور تشوف عيني مالها، دا أول ما الليل يهجم مابشوفش خالص!

- ما هو إنتي لو تهمني شوية وتبطلي كلام هافهمك.

- يوه يا دكتور، هو انا اتكلمت ولا فتحت بؤي.

- لا، أنا بافتري عليك. بقى لي ساعة باقول لك: يا مدام إنتي عندك عشى ليلي.

- ما هو لازم العشا يبقى ليلي يا دكتور! هو فيه حد بيتعشى بالنهار؟! كل شوية عشا ليلي عشا ليلي، قال يعني لو اتعشيت الضهر هاخف!

- مش قصدي ع الطفح يا مدام، أنا باقول لك عشى مش عشاء.

- يا خويا ما تقول كدا من الصبح.

- ما انا باقول والله، بس الناس بتفكر بعقلها وانتي بتفكري
بكرشك، عشان كدا لما قلت لك عشى ليلي دماغك راحت
للأكل.

- عندك حق، كان لازم أفهم إن قصدك على صلاة العشا.
خلاص هاصلّي عشان ربنا يشفي لي عيني.
يا ستي والله أنا ما جيت جنب الصلاة.

- أنا كنت شاكة إنك ابن كلب ملحد عشان كدا عمال تبيع
وتشتري فيا من الصبح. ما هو طبعا لازم ماتجيش جنب
الصلاة يا كافر.

- !

- ؟

- يا خمييييييس، تعالى خد الولية دي وهي حته واحدة كدا
عشان دقيقة كمان وهاقطعها وابعها قطع غيار.

(يحضر خميس التمرجي فيصرف الحالة، ويدخل التالية وهي

سيدة جميلة لا يتماشى مظهرها مع قذارة المكان).

- إلحقني يا دكتور.

- خير يا فندم، الجميل بيشتكي من إيه؟

- أنا عندي ورم في المخ.

- لا حول ولا قوة إلا بالله، ربنا يشفيكي يا قمر انتي.

- هو أنا جاية لك عشان تدعي لي؟! أنا لو محتاجة دعاء كنت

رحت لأمي أسهل وأوفر.

- طيب ممكن حضرتك تبطلني لماضة وتحترميني شوية؟
- إنت اللي تصرفاتك عجيبة يا عم، ما تشوف شغلك وانا
هاحترمك.
- إحم، طيب وريني الأشعة عشان أطلع عليها.
- لأ، ما انا ماعملتش.
- طيب نتيجة التحاليل!؟
- ماعملتش برضه.
- أومال عرفتي إن عندك ورم في المخ منين؟
- هات إيدك كدا.
- تمسك يده فيحمر وجهه ويبتسم خجلاً، تضعها على رأسها وتقول:
- حسس.
- نفسي أحسس والله.
- حسس على راسي يا عم هتلاقيها مبلبزة.
- إحم، آه فعلاً مبلبزة.
- طيب.
- طيب إيه؟
- شوف لي حل في الورم اللي في المخ دا، عشان أنا تعبانة ومن
ساعة ما عرفت إنها مبلبزة مش بانام.
- بصي، أنا مش دكتور، أنا فني تحاليل، واليا فطة دي مضروبة،
والشهادة دي كمان مزورة، وأنا ابن ستين كلب عشان اشتغلت

الشغلانة دي أصلاً. وعلى فكرة اللي عندك دا مش ورم في
المخ.


- أومال إيه؟

- هبل، إنتي عندك هبل في المخ. تعالى يا خميس خد الست
دي واكرش العيانيين اللي بره، وقول للمدير اني استقلت.

يقرر استئجار شقة وافتتاح عيادة خاصة، علق على بابها لافتة

تحمل اسمه «الدكتور/ أبو بخت مايل»، وتخصصه «طبيب العيون،

والعطب النفسي» ويعمل في التخصصين!



أبو موة

يخرج من حمام مكتبه يرتدي بُرنُسا ووجهه مبتل بسبب استحمامه بعد سقوط الماء القذر على رأسه وملابسه. يضغط زراً فوق المكتب فيدخل سكرتيره - الذي يشبه الفنان محمد رجب إلى حد ما - ونلاحظ أن أبو موة في اختياره لموظفيه لا يعتمد على الكفاءة أو الأمانة أو الخبرة، طبعاً كل هذه عناصر مطلوبة ولكن الأولوية دائماً تكون لمن يشبهون الفنان محمد رجب في الشكل، أو من يستطيع الماكير تحويلهم إلى نسخ من محمد رجب، خصوصاً في فيلم كلاشينكوف. يمد يده بالبذلة المبتلة للسكرتير الذي يتنحج قائلاً:

- الحاج «غادي» بره.

- البيه تكرم ونزل من ع السطح أخيراً؟

يهز السكرتير رأسه، فيضيف أبو موة:

- دخله حالاً.

- إحم، أدخله قبل محمود وللا بعده؟

- محمود مين؟

- محمود بتاع أمن البوابة اللي حضرتك دَوَّرته مكتب عشان
جاب صداع للأستاذ (ويشير إلى صورة محمد رجب في
اللوجو الموضوع على صدره).

- همممممم، دَخَل الاتنين سوا.

دقائق ويعود السكرتير وخلفه رجل الأمن يرتعد خوفاً، ووراءهما
يدخل رجل خمسيني، واثق الخطوة يمشي ملكاً، نلاحظ أنه الوحيد في
الشركة الذي لا يشبه الفنان محمد رجب، لكنه يشبه الفنانة عادة عادل.
يخرج السكرتير ويتركهما واقفين أمام مكتب أبو موتة، الذي
يجلس على كرسيه ويقول بثقة قاضٍ في محكمة:

- تاني يا عم غادي؟ تاني بتستغل حبي ليك وضعفي قدام

شفايفك اللي شبه شفايف الأستاذه ومصمم تستفزني؟

- غادي!:

- أبو موتة: يا راجل حرام عليك، دا أنا بقيت بادفع مرتبات

للعمال في مغسلة الشروق أكثر ما بدفع مرتبات للموظفين هنا.

- غادي:

- أبو موتة: إنت عارف أنا صابر عليك ليه يا عم غادي؟

- غادي: عارف إنك صابر عليا عشان شبه عادة عادل.

- أبو موتة: همممممم، دا سبب، بس فيه سبب تاني.

- غادي: إيه هو؟

- أبو موتة: اسمك، اسمك بيقتلني ضحك هاهاها ويفتح لي

مجال للقلش والإفيهات.

- غادي: المثل بيقول «لو أخذت من تور لبن هتاخذ من أبو موة إفيها».
- أبو موة: مين اللي قال المثل دا؟
- غادي: أنا لسه مألّفه حالا عشان اقول لك إن دمك يلطش.
- رجل الأمن: عيب كدا يا عم غادي، هتودي نفسك في داهية!
- أبو موة: أنا دمي يلطش يا غادي؟
- غادي: أيوه.
- رجل الأمن: عيب يا عم غادي كدا، دا رجب بيه مسخرة.
- أبو موة:!
- رجل الأمن: إحم، قصدي اللواء رجب بيه أبو موة مسخرة.
- أبو موة: شفت قلة أدبك قللت من قيمتي عند الموظفين ازاى؟
- غادي: يا عم قلة أدبي إيه؟ إنت اللي مُهزأ والله ودمك تقيل.
- رجل الأمن: لا يا عم غادي، لأ، رجب بيه دمه شربات.
- غادي: بس ياله.
- أبو موة: همممم، أنا دمي تقيل يا غادي؟ إيه نسيت الإفيه اللي لسه قالشه على اسمك امبارح؟
- غادي: ما هو بسبب الإفيه دا بالذات باقول لك إنت دمك يلطش.
- أبو موة: إزاى يا جدع؟ دا وائل السكرتير كان هيموت من كتر الضحك.

- غادي: إنت عارف وأنا عارف إن وائل بيجاملك عشان خايف يموت فعلا، بس مش من كتر الضحك.
- أبو موة: وانت مش خايف تموت يا عم غادي؟
- غادي: لأ، أنا عايز أموت والله؛ اقتلني يا أخي، أرحم لي من القرف اللي عايش فيه بسبب إفيهاك دي.
- رجل الأمن: أنا خايف أموت يا رجب بيه.
- أبو موة: إهانتك للأستاذ ذنب لا يغتفر، ولو كنت دخلت هنا لوحدهك كان مستحيل تخرج على رجلك، بس طالما عم غادي هنا فأنا هاسمح لك تقول إفيه على اسمه، ولو ضحككتني هتعيش.
- رجل الأمن: همممممم، طيب خليه يقول اسمه.
- غادي: حتى انت يا وسخ؟
- أبو موة: قول اسمك.
- غادي: غادي.
- رجل الأمن: غادي وللا أوتوماتيك هاهاها.
- أبو موة:!
- غادي:!
- رجل الأمن: إحم، على أساس إنه فيتيس عربية عادي وأتوماتيك وكدا.
- أبو موة:!
- غادي:!
- رجل الأمن: ممكن فرصة تانية؟

- أبو مودة: همممممم، أنا هالع لعة دلوقتي، واللي يخسر منكم هيموت والتاني هيخرج من هنا حي.
- غادي: يا رب أموت.
- رجل الأمن: يا رب أعيش.
- يشير أبو مودة بمسدسه إلى عم غادي ثم ينقله إلى رجل الأمن، قبل أن يعود إلى عم غادي مرة أخرى ويبدأ لعبته قائلاً:
- أبو مودة: غادي عادي ك...!
- غادي: عايز ايه؟
- أبو مودة: مش بانده عليك، دي بداية اللعبة.
- غادي:!
- أبو مودة: غادي عادي كرنب زيادي سيدي محمد البغدادي شاله وحطه كله على دي.
- يدخل رجل الأمن في نوبة ضحكة مفتعلة حينما يسمع أبو مودة يستبدل بحادي بادي، غادي عادي، ويزيد ضحكه حينما تنتهي اللعبة عند عم غادي، ولكنه يقطع ضحكته فجأة حينما يحول أبو مودة المسدس ناحيته ويطلق النار عليه.
- رجل الأمن: أي، طيب، على فكرة انت دمك يلطش فعلاً.
- (ويموت)
- أبو مودة: كنت فاكرنى هاقترك؟! أنا ما اقدرش أعيش من غيرك يا عم غادي، يلا بقى غور من وشي الساغادي.
- غادي:!
- أبو مودة: هاهاهاها اللي هو الساعادي بس الإفيه حكم.
- غادي: يا عم اقتلني يا عم.



محاسن الصدف

كانت شاردة في المشكلات التي يسببها لها اسمها، حين أخرجها مديرتها من شرودها صارخاً؛ لترفع عينيها عن السجادة المفروشة فوق أرضية مكتبه. ينتهي المدير من توبيخها فترد بانكسار:

- طيب يا افندم ممكن حضرتك تتفرج على التقرير بنفسك، وأنا واثقة إنه هيعجبك وهتقدر الكزياتيقتي اللي أنا سجلته.
- أنا آخر مرة سمعت الجملة دي كنتي مسجلة حوار مع معزة وضحكتي الناس علينا، فنقلتك لأسوأ برنامج عندنا في القناة.
- إخص! وأنا اللي كنت فاكرة حضرتك نقلتني للبرنامج دا عشان يستفيدوا من خبراتي ونعلي نسبة المشاهدة!
- نعلي نسبة المشاهدة بيكي إنتي؟ ليه، هو انتي هتعملي تقارير مع صافيناز؟ وللا هتسجلي أفلام بورنو؟ إنتي أسوأ مراسلة عندي يا محاسن، فطبعي يكون مكانك في أسوأ برنامج.

- طيب ممكن حضرتك تشوف آخر تقرير طيب؟ لو مش عشان خاطر يبقى عشان خاطر بابا الشهيد الله يرحمه. شوفه بس وصدقني هتغير رأيك.
- وريني يا ست هانم، عشان خاطر والدك بس. من خلال شاشة معلقة على الحائط يشاهد المدير التقرير:
- أعزائي مشاهدي قناة «خوازيق»، معكم «محاسن الصدق» وبرنامجكم «أسوأ عادات»، حلقة النهارده مثيرة جدًا - طبعا حضرتكم هتفتكروها حلقة شمال بعد «أسوأ عادات» و«مثيرة» دي هاهاه... إحم- لكنها هتكون عن الشخص سيئ الظن، هنشوف مع بعض آراء الناس في الشارع. معانا مواطن هنسأله عن الموضوع، بس الأول نتعرف بحضرتك؟
- سيئ الظن.
- لسه ماوصلناش للموضوع دا، الأول نعرف السادة المشاهدين اسم حضرتك إيه؟
- أنا سيئ الظن.
- طيب كويس إنك شايف نفسك سيئ الظن، عشان محتاجين زيك في حلقتنا، بس أنا مش قصدي صفتك، أنا أقصد اسمك إيه؟
- سيئ.
- سيئ؟!
- لا مش سيئ، اسمي سيئ.

- اسمك سيد الخن؟
- أيووااه. سيئ الظن، الله ينور عليكى.
- الله ينور عليا ويخرب بيتك، ضيعت لي الحلقة في ترجمة اسمك!
- الله ياخذك انتي يا اختي.
- إنت بتدعي علي... ثانية واحدة؟ إنت قلت: «ياخذك» و«يا اختي» والكلمتين فيهم خه ودال؟ ما طلعتش ألدغ يعني؟
- هاه؟
- إنت هتعمل لي فيها عبيط؟ لما انت بتتكلم كويس عايش دور الألدغ ليه؟
- بصراحة أنا باخاف من عينين الناس. إنتي عارفة إن «عضة أسد ولا نظرة حسد»، وإن «العين فلقت الحجر».
- للدرجة دي إنت سيئ الظن؟
- لا، أنا سيد الخن.
- أقصد للدرجة دي إنت سيئ الظن بالناس وبتخاف يحسدوك؟
- يا ست هانم الدنيا الوحشة هي اللي علمتني سوء الظن. الناس بقت وحشة، والأظ بياكل أظوه، يووه قصدي الأخ بياكل أخوه ويشغل حرامي غسيل. والأب بيرمي عياله ويروح يصرف فلوسه ع العاهرات. والزوجة بتظون - يادي النيلة - بتخون زوجها عشان الفلوس.
- إيه الجو الرخيص ده؟ للدرجة دي إنت سيد الظن يا عم سيئ، قصدي للدرجة دي ظني السن يا عم سيد؟

- إنتي فاهمة معنى اللي بتقوليه؟
- أنا فاهمة بس مش عارفة أعبر، المهم إنت فاهمني؟
- آه فاهمك، وهائت لك صحة كلامي عملي مش نظري. شايفة
الراجل العجوز اللي راكب العربية الحمرا اللي سايقاها المزة
الصغيرة دي؟
- آه شايفاهم، أب راكب عربية بنته عادي، فيها إيه دي؟
- الهبل أمثالك هما اللي هيشوفوهم أب وبنته، لكن أنا وأي حد
سيئ الظن عارفين إنه راجل متصابي، سايب بيته وعياله وداير
يتسرمح ورا المزز ويضيع فلوسه عليهم.
- لا يا أخي ماتقولش كدا.
- طيب بصي تاني كدا؟ بيوسها من بؤها أهو! فيه راجل هيوس
بنته كدا؟
- !
- سوء الظن عمره ما قلش مني يا ست المذيعه. شايفة الراجل
اللي بيجري هناك ده؟
- آه، ماله دا كمان؟
- دا حرامي غسيل.
- حرام عليك يا مفتري، دا باين عليه محترم وبيحاول يلحق
الأتوبيس.
- ركزي طيب هتلاقيه بينشل الركاب في الأتوبيس وبعدين ينط
في أول محطة، عشان سرقة الغسيل مابقتش تأكل عيش.

- بسم الله الرحمن الرحيم، دا بيسرق فعلا! إنت مخاوي وللا إيه يا راجل انت؟ دا انت بارع لدرجة ما حدش يتوقعها.
- أقل حاجة عندي. (بتناكة)
- بس فيه ناس ممكن تعتبر دي فراسة مش سوء ظن.
- لأ، سوء ظن، عشان كل توقعاتي بتبقى سيئة. شايفة الست اللي نازلة من العمارة دي؟
- تقصد اللي حاطة Full Make Up. أيوه شايفها، مالها؟
- دي فتاة ليل.
- لا بقى، بطل افترا، كل اللي فات كوم وودي كوم يا عم، دي أعراض ناس.
- المفروض الحاليتين اللي فاتوا يخلوكي تثقي في كلامي.
- ولو، هابعت المصور يحاول يشقها بـ ١٠٠٠ جنيه.
- ١٠٠٠ جنيه كثير، دي بتاخذ ٢٠٠ في الساعة.
- وانت عرفت التفاصيل دي كلها منين؟
- عشان دي مراتي، ولسه حالاً نازلة من عند زبون.
- !?
- مش قلت لك؟ الناس بقت وحشة، والأخ بياكل أخوه ويشغل حرامي غسيل، والأب بيرمي عياله ويروح يصرف فلوسه ع العاهرات، والزوجة بتخون زوجها عشان الفلوس!
- !?

- الست دي مراتي، وحرامي الغسيل دا أخويا وهي مستنياه
دلوقتي عشان ياخذها الأتوبيس الجاي تلغوش ع الركاب
لغاية ما يسرقهم.

- !؟

- والراجل المتصابي اللي كان راكب عربية المزة دا يبقى أبويا،
الراس الكبيرة اللي مدور الليلة دي كلها.

مع نهاية التقرير، ينقل المدير بصره من الشاشة إلى محاسن وعلى
وجهه نظرة اشمزاز:

- ها يا فندم؟ إيه رأي حضرتك؟

- رأي حضرتي في إيه؟

- في الكرياتيفتي اللي أنا مسجلاه دا.

- دا مش كرياتيفتي، دا زفت عليك وعلى اللي مشغلك.

- !

- أعمل فيكي إيه أكثر من كدا؟ نزلتك من مذيعة لمراسلة؟

أرجعك مُعَدَّة من تاني؟

- خلاص يا فندم، والنبي أدّيني فرصة أخيرة.



سعيد الحظ

ويتوالى الفشل، ولأن القانون الشت لاندي يمنع محاكمة اي ضابط؛ فيعاقب سعيد بعد واقعة قتل كل أفراد الكمين حتى المواطن قائد الدراجة بأن ينقل إلى أطراف شت لاند، حيث يعيش «الصادقون» وهم قبيلة لا تكذب أبداً. ويشعر سعيد بالملل من روتين الأيام وتكرار نفس الأحداث، فينصب كميناً ناشداً التسلية.

- شنطة عربيتك فيها حاجة يا حاج؟
- فيها جثة يا حضرة الضابط.
- جثة! جثة مين؟
- جثة ضابط في الكمين اللي فات كان عاوز يقبض عليا.
- يقبض عليك ليه؟
- عشان سألني: «شنطة عربيتك فيها حاجة؟» قلت له بصراحة:
«فيها هروين».
- فين الهروين دا؟
- في جثة الضابط اللي كان عاوز يقبض عليا.

- يعمل إيه الهروين في جثة الظابط!
- بيحل محل الأعضاء.
- الأعضاء!
- آه. الأمعاء الغليظة والبنكرياس والرثتين والكليتين والقلب والكبد... إلخ.
- ودول راحوا فين؟
- لقيتهم مظروطين الدنيا وموسخين شنطة العربية فبعتهم لتاجر أعضاء بين الكمين بتاع حضرتك دا والكمين اللي فات، اللي الظابط فيه كان عاوز يقبض عليا، قبل ما أقتله.
- إنت مش ملاحظ إنك صريح زيادة عن اللزوم؟
- لا أبدًا، أنا بس من «الصادقين» فمابكذبش لأنني باخاف من ربنا، وانت عارف الكذاب بيروح النار، وأنا ناوي إن شاء الله أدخل الجنة.
- اللهم قوي إيمانك يا مولانا. اتفضل امشي وماتنساناش في الدعاء.
- يصل الأمر إلى رؤسائه فيؤبخونه لأنه أضاع عليهم فرصة للقبض على عصابات تتاجر في الأعضاء والمخدرات في ضربة واحدة، كانت ستتسبب حتمًا في مكافأتهم بترقية استثنائية، وأولهم هو.. لكنه غبي. يصير رئيسه على أنه غبي وساذج ولا يصلح للعمل في الشرطة، ولكن سعيد لا يعترف بذلك، فهو شرطي كفاء لولا سوء الحظ الذي يلازمه كظله.

أبو بخت مايل

كانت الأمور في عيادته تسير على ما يرام، على الأقل لم ينم يوماً دون عشاء، حتى جاء اليوم الذي كان بداية النهاية لحياته المستقرة. وفي الجزء المخصص لاستقبال الحالات النفسية داخل عيادته، استقبل أول حالة:

- مالك؟

- مافيش.

- لأ، مافيش دي تقوليها لجوزك أو خطيبك أو حبيبك اللي ملامحه كلها منك يا دوب الاسم متغير، لكن أنا الدكتور النفسي اللي بيعالجك، فلما أقول لك مالك تردي عدل. احكي فيكي إيه؟

- ما انت لو مهتم كنت عرفت لوحدك.

- صبرني يا رب، اسمك إيه طيب؟

- موزة.

- اسم جميل و delicious كدا.

- موزة مش دولسي.
- دولسي إيه وجهل إيه؟ باقول لك delicious يعني لذيذ.
- لذيذ؟! إنت بتتحرش بيا يا دكتور؟
- إنت جاية ترمي بلاكي عليا؟! قولي إيه مشكلتك يا آنسة موزة؟
- موزة مين؟
- إنتي!
- أنا اسمي رمانة.
- ما رُحناش بعيد. أهى كلها فاكهة وكله محصل بعضه يا آنسة رمانة.
- أنا مدام مش آنسة.
- إيه مشكلتك يا مدام رمانة؟
- أنا آنسة مش مدام.
- واضح إنك جاية لي عشان عندك ضعف في الذاكرة. اتطمني، إن شاء الله هارريحك.
- تريحني؟! أنا كنت عارفة إنك هتحاول تتحرش بيا زي كل الرجالة الأوس...
- هو أنا كلمتك أصلاً يا ست إنتي؟!!
- إيه دا؟ يعني إنت ما كنتش تقصد تتحرش بيا؟
- لأ.
- لأ ليه؟ وهتتحرش بيا إمتي؟
- هو انا لازم أتحرش بيكي؟!!

- آه لازم طبعًا. إنت مش راجل وسخ زي باقي الرجالة؟!
- باقول لك إيه، خدي فلوس الكشف من عبده واتكلي على
الله.

- إنت بتطردني؟!!

- آه باطردك، يلا اتكلي على الله، آنستي.

- أنا مدام قلت لك.

- آنستي دي اللي هي بتتقال في نهاية الجلسة «آنستي ونورتي»

مش هينفع أقول لك «مدامتي» عشان انتي مدام يعني!

ثاني حالة:

- افتحي لي قلبك.

- إنت راجل مز والله وأي بنت تتمنى تفتح لك قلبها، بس أنا

قلبي مش ملكي، يا ريتة كان ملكي كنت فتحت هولك.

- إنتي ليه محسساني إنني باقول لك افتحي قلبك عشان أشوفني

موجود فيه وللا لأ؟ أومال لو قلت لك هاتي بوسة كنتي عملتي

إيه؟

- يا عم قول بس ومالكش دعوة.

- بطلي الحاجات اللي في دماغك دي واحكي عشان عندي

حالات غيرك.

- بص يا دكتور، أنا جوزي مش حاسسني خالص.

- جربتي ترقصي له.

- أنا رقاصة أصلاً، ورقصت لأمة لا إله إلا الله، وهو مافيش

فايدة لأنه مش بيغير عليا كمان.

- عنده حق. هو بشكلك دا فيه حد يغير عليكى؟ عامة إحنا
هنفكر مع بعض و...

- هو احنا لسه هنفكر؟! إحنا هنعمل حاجة تانية، ومع بعض
برضه، وأنا هاقول لجوزي عليها يمكن يغير ويحس بيا.

- امشي اطلعي بره.

- آسفة يا دكتور.

- لا، اتفضلي بره، علاجك مش عندي.

- خلاص يبقى آخذ الكشف بتاعي بقى طالما علاجي مش
عندك.

- يا ستي ما انتي دخلتي بالكشف بتاعك و...

- لا، أنا دافعة فلوس عشان أناام معاك واقول لجوزي،
وماقضيتهش المصلحة. هتجيبهم وللا أغتصبك؟

- إديها الكشف يا عبده، وادخل باللي بعده.

تالت حالة:

- اتفضلي احكي مشاكلك.

- لا، أنا مش باحكي مشاكلي غير لبوسي صاحبتى.

- طيب وجاية لي أنا ليه؟ ما تروحي لبوسك.

- بوسي مش بوسك.

- وات ايثر يعني، أهى كلها حاجات قليلة الأدب.

- للأسف كان نفسي أحكي لبوسي بس هي مخاصماني.

- طيب أقدر أعرف مخاصماني ليه؟

- لا أنا مش باحكي مشاكلي غير لبوس...
- طيب المطلوب مني إيه؟
- لما بوسي تجيلك قل لها إن انا باموت فيها وهي السو كيوت
بتاعتي، ووزتي وبطتي و...
- إنتي فاكرة نفسك عند آدمين بيدج «احتواء» وللا قاعدة قدام
أسامة منير؟!
- لأ، أنا عارفة إنك دكتور نفسي أمُور وبوسي بتحبك، ولو
سمحت بقي عاوزة فلوس الكشف بتاعي وابقى خدهم من
بوسي.

- أبوكي لأبو بوسي، فلوس كشف إيه؟
- أنا قبل ما آجي لك لفيت على كل الدكاترة اللي بوسي تعرفهم،
وأخذت فلوس الكشف بتاعي منهم، ومش هاحكي لك ازاي
عشان أنا مش باحكي غير لبوسي.

رابع حالة:

- مالك يا دكتور، ساكت ليه؟
- مش عارف أقول إيه، خايف أسالك مالك أو أطلب منك
تحكي لي؛ وطبعاً مش هاقول لك افتحي لي قلبك، عشان أنا
اتهرت النهارده.

- مش مستاهلة دا كله يا دوك، كفاية تطلب مني أنام لك بس.
- تنامي لي! إيه اليوم الاسود دا؟ فاكرة نفسك في بيت دعارة؟
- إنتي عند دكتور نفسي محترم يا هانم.

- ما انا عشان عند دكتور نفسي مستنياك تطلب مني أنام.

- هي النسوان جرى لها إيه النهارده؟ مين فهّمك إن الدكتور النفسي بينام مع المرضى بتوعه؟
- إنت فهمت إيه؟ أنا أقصد أنام لك ع الشيزلونج قبل ما احكي مشاكلي، بس إنت دماغك رامية شمال!
- معلىش أنا آسف والله، بس اللي شفته النهارده مش طبيعي، واحدة تقول لي جاية أنام معاك، والتانية تقول لي مش هتتحرش بيا؟ والتالته تقول لي بوسي بتحبك. النسوان انحرفوا النهارده.
- آه ما انا عارفة.
- عارفة! عارفة منين؟
- ما انا اللي خليتهم ينحرفوا.
- نعم؟!!
- إزازه البرفان دي فيها خلطة عملها لي شيخ معرفة، والرشة منها بتعلي الرغبة الجنسية عند الستات، وأنا رشيت في أوضة الانتظار اللي بره، وعشان كدا اللي دخلوا هنا اتحرشوا بيك.
- طيب وعملي كدا ليه؟
- كنت باختبرك، باشوفك خاين زي كل الرجالة وللا مش هتضعف قدام الإغراءات.
- مش فاهم!
- إنت عاجبني وعايضة اتجوزك، بس عارفة إن كل الرجالة خاينين، فرحت لشيخ صاحب بركات.

- صاحب بركات بتاع الكورة؟
- كورة إيه؟ أقصد راجل بركة يعني، اخترع لي الاختراع دا
- عشان أحطك في كذا اختبار، والحقيقة إنت نجحت في كل
- الاختبارات. فمبروك هتتجوزني.
- أتجوزك مين يا ست؟ هو أنا أعرفك؟
- بسيطة، أعرفك بنفسي، أنا بوسي.
- بوسك!؟

لا يعرف ما الذي حدث له جعله يوافق على الارتباط بها، أهو
عقلها الذي جعلها تفعل كل هذا لتختبر إخلاص زوجها المستقبلي؟ أم
طريقتها في عرض مسألة الزواج عليه؟ أم كلاهما!
كل ما عرفه أن كل شيء حدث بسرعة، فخلال أسبوع وجد نفسه
في بيتها يطلب يدها.



أبو موة

في حجرة اجتماعاته جلس على رأس الطاولة وحوله موظفوه، وهم
يسمعون متعددة للفنان محمد رجب، نفس قصة الشعر واللحية ولون البشرة،
والبدلات الاسموكن السوداء، فطغى اللون الأسود على الحجرة فصارت
كأنها مشهد في فيلم مصوّر بالأبيض والأسود، لا يلونها غير «عم
صلاح» الجالس على الطاولة ذاتها ولكن في الجهة الأخرى المقابلة
لأبو موة. وعم صلاح أكبرهم سناً، ذو «ستايل» كستايل الفنان صلاح
محمد الله في فيلم كلاشينكوف، أبيض الشعر مثله ويرتدي بنطالا أبيض
وجاكيت أزرق فوق قميص مشجر، مع نظارة برتقالية.

يضع «وائل» السكرتير بعض الأوراق أمام سيده، ويتراجع
لخفوتين ليقف خلفه. يطالع «أبو موة» الأوراق بفتور ولا يلاحظ
إشارات الموظفين لبعضهم في خوف حتى يبتسم عم صلاح قائلاً:
- إنتو خايفين من إيه؟ ما تقولوا إنكم عايزين فلوسكم.

يرفع أبو مودة عينيه عن الأوراق ويدور ببصره متفحصًا موظفيه،
فيبدو عليهم الارتباك ويقول أحدهم نافيًا التهمة عن الجميع:

- إحنا مش عايزين حاجة يا عم صلاح، لو عايز حاجة قول
إنت.

ينظر إليهم صلاح بغيظ ويصمت، فيبتسم أبو مودة ويقول:

- همممممم، أنا عارف إن ليكم مستحقات متأخرة، بس
أديكم شايفين الحال عامل ازاي بعد تمرد فبراير وموت بعروور
الله يرحمه.

- الجميع: الله يرحمه ويرحم شهداء الوطن.

- أبو مودة: الشهيد بعروور الله يرحمه كا...

- الجميع: الله يرحمه ويرحم شهداء الوطن.

- أبو مودة: الشهيد بعروور و...

- الجميع: الله ي...

- أبو مودة: خلاص يا ابني انت وهو، مش عارف اقول الجملة.

يصمت الجميع ويضحك عم صلاح بشدة، فينظر إليه أبو مودة

بغضب قبل أن يستأنف:

- أبو مودة: الرئيس زفت الله يحرقه ونظامه كانوا مصدر الدخل

الثابت الوحيد لكلاشينكوف؛ في عهده ماكانش حد فيكم

بيتبقى له جنيه، مرتباتكم وحوافزكم وكمان مكافآت بعد

تنفيذ أي عملية، حصل؟

- الجميع: حصل يا ريس.

- أبو موتة: أنا كافحت كثير عشان أعمل الشركة دي، وعمري ما دؤرت على مكسب من وراها؛ لأن كان همي كله: إزاي أخدم بلدي؟

بصمت فيصفق سكرتيره الواقف خلفه، فيتبعه الجميع مصنفين باستثناء عم صلاح. بيتسم أبو موتة ويكمل:

- وعشان أخدم بلدي وأحميها قتلت ناس كثير، منهم أصحاب ليا، بأوامر من الشهيد بعروور.

- الجميع: الله يرحمه و...

- أبو موتة: قتلت أصحابي وعمري ما سألت عن السبب. أنا قتلت أخويا بإيدي دي عشان عارض قرار واحد لبعروور، وبعد ما قتله شلته بإيدي دي برضه ودفنته وأنا بابكي. واتنازلت عن أجري في العملية لأنني ما حبيتش بعروور - واللي هيقول الله يرحمه هابعتهوله هناك - يعتبرني باخد دية أخويا.

بصمت متأثراً بالذكرى، فيبكي سكرتيره، ويعلو بكاء الجميع وسط نظرات استنكار واستهجان من عم صلاح.

- أبو موتة: ساهمت كثير في بناء بلدي مع بعروور وماحدثش من الشعب حس باللي عملته، لأنني عمري ما فكرت في شهرة أو أضواء.

بصمت، فيمص السكرتير شفثيه في حسرة، ويقلده الجميع بينما يخرج عم صلاح هاتفه ويفتح فيسبوك.

- أبو موتة: أنا طلعت سلم المجد من آخر درجة.

يصمت منتظرًا رد فعل السكرتير والحضور على الجملة، ولكنه لا يجد ردًا، فيكررها مرة أخرى وهو ينظر إلى سكرتيره الذي يقول:

- أيوه يعني دي حاجة حلوة وللا وحشة؟! عشان مش عارف
أخذ أنهى ري أكشن!

- أبو موتة:!

- السكرتير: يعني دلوقتي أصقف وللا أعيط وللا أمصمص
شفايفي؟

يضحك عم صلاح بشدة، فينظر إليه أبو موتة بغضب، ويتنحج
السكرتير فيتملق الجميع «أبو موتة»؛ موجهين نظرة ازدراء إلى عم
صلاح، فيكمل «أبو موتة» قائلًا:

- دلوقتي مافيش دخل ثابت عشان الرئيس التيس رافض
يتعاون معانا؛ لأنه بيخاف يعمل أي حاجة كان بيعملها بعروور
والشغل القَطاعي اللي بيعي باقسَم فلوسه عليكم.

- عم صلاح: بتقسَم فلوسه ازاي؟ دا انت لوحدهك بتاخذ ٩٠٪
واحنا كلنا بناخذ ١٠٪ وفي الآخر تقول لي بتقسَم علينا؟

- أبو موتة: مالك يا عم صلاح؟

- عم صلاح: مالي؟

- أبو موتة: جاي مُخالف وما رُحتش للماكير يظبط لك لوك
الأستاذ، ولا حتى التزمت بقواعد الشركة وصبغت شعرك
اسود، لأ وكمان عامل لي لوك العدو صلاح عبد الله ولا بس
لي زَيه. كل دا وسايك براحتك عشان سنك؛ لكن توصل لأنك
تحاول تهيج رجالتى عليا؟! دا أنا أدبحك.

- عم صلاح: ولا تقدر تعمل حاجة أصلاً.
- أبو موة: إنت واخذ حبوب الجراءة قبل الفطار النهارده وللا إيه؟
- عم صلاح: لأ.
- أبو موة: ولا بعد الفطار؟
- عم صلاح: ولا فطرت أصلاً.
- أبو موة: أو مال مالك فيه إيه؟ مش خايف أقتلك دلوقتي؟
- عم صلاح: لأ مش خايف، عشان أنا مش هاموت دلوقتي.
- أبو موة: وعرفت المعلومة دي منين؟ إيه، عزرائيل صاحبك؟
- عم صلاح: لأ.
- أبو موة: أو مال واثق كدا ليه إنك مش هتموت دلوقتي؟
- عم صلاح: عشان عرفت ميعاد موتي.
- أبو موة: عرفت ميعاد موتك آه! مش باقول لك عزرائيل صاحبك!
- عم صلاح: مش عزرائيل اللي قال لي والله، دا تطبيق ع الفيس بيحدد لك تاريخ وفاتك، وأنا جربته وقال لي إني لسه هاموت بعد ٢٤ سنة.
- أبو موة: همممممم وريني كدا.
- يسرع السكرتير ويأخذ الهاتف من عم صلاح، ويعطيه لأبو موة الذي يتفحصه ثم يقول:
- آه تصدق صح، مكتوب فعلاً إنك هتموت بعد ٢٤ سنة، بس أنا هاخليهم ٢٤ ثانية.

- ثم يخرج مسدسه من جرابه ويوجهه ناحية عم صلاح غير المبالي
- عم صلاح: اضرب، أنا مش هاموت أصلاً.
 - أبو موة: للدرجة دي واثق فيا؟
 - عم صلاح: لأ، واثق في التطبيق.
 - أبو موة: طيب نجرب (يطلق النار فيموت عم صلاح) الله يرحمه كان راجل أهبل بيصدق تطبيق.
 - يرتعد الجميع خوفاً، فيكمل أبو موة:
 - قال تطبيق قال، مش عارف جبت منين الثقة دي في التطبيق؟
 - هو إنت اللي مخترعه يا... قطع جملته بعد أن خطرت على باله فكرة، وصمت قليلاً ثم مد يده ليلتقط الهاتف من يد السكرتير:
 - وريني كدا.
 - ينظر إلى التطبيق مطولاً وهو يهرش في لحيته، وبعد دقائق من الصمت يقول لسكرتيه:
 - حدد لي ميعاد مع الرئيس التيس، وقول لمكتبه إني لقيت الحل لكل مشاكلنا. قل لهم كدا عشان ناخذ ميعاد بسرعة.
 - ثم يوجه كلامه إلى رجاله:
 - خلاص، مشاكلنا كلها اتحلت يا رجاله.
 - يسأله أحدهم:
 - مشاكلنا كشركة وللا كبلد يا ريس؟
 - بيتسم بثقة، قبل أن يجيب بصوت خفيض ونبرة هادئة كالحكام:
 - وهي البلد والشركة إيه؟ ما هم واحد.

محاسن الصدف

كان رئيسها في مكتبه يتابع بثًا مباشرًا لقناته «خوازيق» وبرنامجها الأشهر «الشت لانديون يتساءلون»، حينما هاتفه سكرتيره يبلغه أن محاسن الصدف تسجل تقريرًا من الشارع وتطلب بثه لايف؛ فيطلب رئيسه أن يحدثها هاتفياً، فيطلب السكرتير رقمًا ويعطي الهاتف للمدير:

- خير؟

- كل خير يا فندم، أنا في الشارع دلوقتي وقدام مني عربية بتبيع سلع بأسعار رخيصة، ومعلقين يافطة أسعار عجب، إزازة الزيت بـ ٣ جنيه، وكيلو السكر بـ ٢ جنيه وعلبة التونة بجنيه، والغريبة إنه كاتب ع اليافطة (أنا مش عايز أكسب).

- مش عايز يكسب إيه؟ دا بالأسعار دي المفروض يكتب (أنا قاصد أخسر).

- مش عارفة.

- داهية تكون بضاعة منتهية الصلاحية!

- مش عارفة.

- هو إيه اللي مش عارفة مش عارفة! علقتي وللا إيه؟
- إحم، أنا باقول يا افندم نستغل الفرصة ونطلع لايف مع كام مواطن ونرصد فرحتهم بالأسعار، عشان نرد على أعداء الوطن اللي بيقولوا إن الأسعار غالية في عهد رئيسنا العظيم.
- همممممم هي فكرة حلوة، بس احنا حاليًا في الجزء الديني للبرنامج فمش هينفع تخرجي لايف، بس ممكن تسجلي ونبقى نذيع بعدين عادي.
- يا افندم حضرتك أستاذنا كلنا، وعارف إن اللايف بيدي مصداقية أكثر للتقرير، وبسيب انطباع إيجابى عند المشاهدين.
- أفتعيني، جهزي نفسك وأنا هأمرهم يدخلوكي مع آخر اتصال تليفوني بالشيخ محمد.
- وأمر سكرتيره بإبلاغ الشيخ بالمستجدات، ليستقبل الشيخ آخر اتصال:
- ناخد آخر اتصال معنا النهارده، الأخت هالة، السلام عليكم ورحمة الله وبركاته.
- آلو، أنا فرحانة أوي عشان باسمع صوتك يا شيخ محمد.
- دا على أساس إنك بتسمعي صوت محمد حماقي! إيه استفسارك؟
- جوزي بيخونني يا مولانا.
- وإيه المشكلة؟

- تقف أمام أحدهم فتسد الطريق عليه وتحاوره عنوة:
- ومعانا أحد المشترين من على عربية المش عايز يكسب، صباح الخير يا حاج.
 - صباح النور يا بنتي.
 - اشتريت إيه من ع العربية؟
 - وانتِ مال أمك!
 - إحنا تليفزيون يا حاج.
 - تليفزيون من غير كاميرات؟! إنتي فاكراني مغفل؟
 - الكاميرا مع المصور في العربية.
 - همممممم، آه إنتو برنامج الكاميرا المستخبية.
 - نعم؟
 - برنامج الكاميرا المستخبية.
 - هاه؟ آه إحنا الكاميرا الخفية.
 - وحضرتك بقى الأستاذ إبراهيم نصر؟
 - دا شكل الأستاذ ابراهيم نصر بدمتك؟
 - همممممم بصراحة لا، الأستاذ إبراهيم نصر ماكانش حلو كده.
 - الله يحفظك.
 - إنتي شكل الأستاذ إبراهيم عيسى.
 - لا يا حاج، أنا اسمي محاسن الصدف.
 - عاشت الأسامي، محسوبك أهلاً وسهلاً.

- إنت بتهزر يا حاج؟
- والله إنت اللي بتهزر يا أستاذ إبراهيم.
- إبراهيم مين؟
- إبراهيم نصر.
- إبراهيم نصر مات، الله يرحمه.
- تبقي انتي أخوه، إبراهيم عيسى.
- إنت شايف إن كلامك دا يمشي؟
- آه يمشي عادي، أصل واضح جدًا إنكم اخوات. عندكم نفس الكرش، وكمان الأسماء.
- أسماء مين؟!!
- إنتي إبراهيم وهو إبراهيم تبقوا إخوات طبعًا، وللا انت فاكرني مغفل يا إبراهيم؟
- لا يا حاج أنا اللي مغفل، يووووه أنا اللي مغفلة عشان سألتك. اتكل على الله يللا واسرح من هنا.
- مش سارح، أنا واقف في ملك الحكومة.
- طيب على ذكر الحكومة: ممكن تكلمنا عن تجربتك في التبضع؟
- تبعض! لاااااا إنتي شفتي الزحمة افكرتيني جاي هنا عشان البعبضة؟!!
- بعبضة إيه بس يا حاج؟ أنا عايزاك تكلمنا عن جودة السلع والأسعار.

- أسعار زالفل، وسلع زالفل ولا كلمة. الله يبارك له «ربيع هود» ويعلي مراتبه.
- تقصد الله يبارك له الرئيس التيس.
- لا، أقصد ربيع هود.
- ربيع هود مين؟
- ربيع بيه هود لو سمحتي.
- ربيع بيه دا يبقى وزير التموين الجديد؟
- لا، دا واد مجدع ابن حنتي، كان شغال في هايبر، ولقى الأسعار كل يوم بتزيد قام سرق الهايبر، سرق الأغنيا عشان يدي الغلابة.
- إوعى يكون قصدك روبن هود؟
- آه عارفه أنا الواد روبي هود بتاع أمريكا دا، بيقلد ربيع بتاعنا، حتى الاسم مختاره زي ربيع بس على أمريكاوي. لكن ربيع بقى أصلي، بيحقق العدالة الاجتماعية بجد والتسعيرة ما بتكدبش؛ دا يا دوب بيطلع دخانه وعرق رجالته، أنا أكاد أجزم - وأشبشب كمان - إنه مش بيكسب من ورانا.
- بس برضه اسمه حرامي يا حاج!
- يا بنتي ما بلدنا كلها حرامية، بس بيسرقوا قوت الفقير ويحطوا في جيب الغني، سيبوا مرة واحدة الفقير يسرق. والله العظيم لو شت لاند فيها كام حرامي زي ربيع، كنا هنبقى أغنى دولة في العالم.

تسببت في اختفاء الشيخ محمد والمواطن وربيع هود وإغلاق
المنارة نهائيًا، وللمرة المليون يشفع لها والدها الشهيد وينقذها، فتعترف
بفعلها وتقرر أنه (حلو كدا، هاتجوز وأقعد في البيت بقى).

كلما فكرت في الزواج خطرت على بالها ذكراه، حببها الأول
والأخير الذي عرفته صدفة أيام كانت طالبة في كلية إعلام، وتعمل مراسلة
لجنت التمرين بإحدى القنوات، وكانت تفضل الانتقال بالميكروباص
على نصبح قريبة من الناس فتكتسب خبرات من احتكاكها بهم، وفي
الميكروباص قابلته:

- لو سمحتي يا أستاذة، بعد إذنك شعرك بس!
- ماله شعري يا أستاذ؟ فيه إيه؟!
- حضرتك فاتحة الشباك على الآخر، وشعرك طائر في وشي!
- ما تلم نفسك يا أفندم!
- طيب ما تلمي انتي شعرك أسهل!
- وانت مالك؟! دي حرية شخصية!
- هو أنا باقول لك اتحجبي؟! إنتي حرة يا ستي، بس يا تقفلي
الشباك يا تلمي شعرك!
- بس انا عاجبني شعري وهو طائر ومهفهف كدا؟
- هو احنا بنصور إعلان شامبو؟!
- !
- ومالك فرحانة بشعرك كدا ليه؟ دا انتي فارداه ببطاس وحاطة
له سمنة روابي، وهو طائر في وشي فشامم ريحة معفنة أوي
بصراحة.

- اسم الله عليك يا أكرت، دا انت المفروض تتعاقد مع شركة
من اللي بيصنعوا سلك المواعين عشان يستخدموا شعرك في
صناعتهم.

يتدخل (السواق) في الحوار قائلاً:

- الأستاذ الأكرت والأستاذة اللي فرحانه بشعرها، لو مابطلتوش
خناق هنزلكم انتم الاتنين وادوس عليكم، لاحظوا إن معاكم
سواق أقرع، يعني ما عندوش حاجة خالص.

تضحك على ذكر الواقعة التي كانت سببًا في تعارفهما. عشقته
وأدخلته أماكن «ماكانش يحلم يعدي من قدامها المعفن»، مطاعم
وكافيهات كبرى، عرّفته طريقها وكانت هي من تدفع الحساب. كانت
ساذجة وصدقت أنه يحبها، رغم أن كل تصرفاته كانت تؤكد استغلاله
لها؛ فهو لم يخرج جنيهاً شت لاندياً من جيبه وهي معه، بل كثيرًا ما كان
يطلب منها نقودًا على سبيل السلف ولم يردّها أبدًا. أعماها حبها له عن
رؤية تلك الوقائع، ولم تُفق من غفلتها إلا بعد أن اختفى فجأة؛ ثم تراه
بعد فترة يجلس في أحد الكافيهات التي «ماكانش يحلم يعدي من
قدامها المعفن» وحيدًا، وينظر إلى الباب كأنه في انتظار شخص، ما
إن رآته حتى نسيت غيابه واقتربت منه وهي تبتسم، لكنه ارتبك لرؤيتها
نظرت في يده فرأت دبلة فضة تلمع!

- أحمد!

- ماما محاسن!

- آه محاسن، مالك اتخضيت كدا ليه كأنك شفت عفريت؟ وإيه

اللي في صباعك دي!؟

- دي... دي... دي دايرة.
- دايرة إيه؟! إنت بتستعبط؟ دي دبلة!
- هما غيروا أسماء الأشكال الهندسية وللا إيه؟ على أيامنا كان اسمها دايرة!
- إنت بتشتغلني، صح؟ دي دبلة وانت لابسها في إيدك. عارف دا معناه إيه؟
- معناه إني حاطط في إيدي شكل هندسي كان يسمى قديمًا دايرة وأصبح يسمى دبلة لسبب مجهول!
- وحياة أمك؟! -
- وإيه اللي دخل أمي في الموضوع دلوقتي؟ هو انتي فاكرة ان أمي فيثاغورس فباخلد ذكراها وألبس أشكال هندسية تقديرًا لعبقريتها الفذة وخدماتها الجليلة للعالم كله. ما عدا طلبة الثانوية العامة عشان بيتنفخوا مذاكرة!
- إنت بتتوّه في الكلام؟
- هاه!
- لما أكون باكلمك تسيب الموبايل من إيدك وترتكز معايا، دي دبلة يا أحمد، دبلة فضة في إيدك اليمين. بطل استهبال عشان انت عارف كويس دا معناه إيه.
- معناه إني مواطن شت لاندي وياقلد المصريين القدماء اللي اخترعوا ما يسمى «صهر المعدن» للحصول على عدة أشكال، من معادن استخرجوها من باطن الأرض كالذهب

والفضة، فعملوا منها حُلي وعملات ثم استبدلوا بها نظام
المقايضة اللي كان قائم، وبعدين تخلوا عن الذهب والفضة
في مقابل الصكوك الورقية، ومن هنا بدأت فكرة الفلوس اللي
أنا شخصيًا باحبها جدًا، بس حب من طرف واحد.

- يعني إيه حب من طرف واحد؟

- يعني أنا باحب الفلوس بس الفلوس ما بتحبنيش.

- وإيه دخل دا بكلامنا؟

- كلام إيه؟

- مش فاكرة، لأ استنى افكرت، كنا بنتكلم عن الدبلة.

- حاجات كتير دبلت لما الاتحاد السوفيتي انهار، أنقاض بتقوم

فوقها حضارات وعجلة الزمن بتدور، أصل الكرة الأرضية

مش هتقف لمجرد إن فيه حاجة دبلت يعني.

- أنا مش فاهمة حاجة!

- دا طبيعي وسط الجو العام المشحون بالتوتر بين الدول، وغلاء

الأسعار، القيامة هتقوم صدقيني.

- إنت بتغير موضوع الدبلة؟

- إن دبلت الوردة ريحتها فيها، بس كلنا هنموت في الآخر

قولي لي: إيه في الدنيا دي دايم؟ سنين عايم ما سُفتش بر.

- هتعمل فيها بهاء سلطان وتغني لي؟! الأسلوب دا مش نافع

- ما دام الأسلوب دا مش نافع، وإيه الدافع أدوق المر؟

- برضه؟! قلت لك سيب الموبايل وانت بتكلمني.

(تخطف الموبايل من يده فتجد في الخلفية صورته وبجواره

الله)

- الله الله! مين اللي جنبك في الصورة دي؟
- دي، دي، دي، دي فتاة.
- فتاة إزاي يعني؟
- فتاه، أصله كان غريب عن المنطقة وكل ما يسأل حد يتوهه.
- إنتي عارفة الناس في شت لاند بيفتوا في كل حاجة.
- إنت بتقول إيه يا بني؟ تطلع إيه البنت دي؟
- أنا مش دارس طب، بس باقرأ كتير فعندي قدر معقول من المعلومات العامة ممكن أفيدك بيه. البنت دي تطلع كائن حي من فصيلة الإنسان، بتتكون من لحم ودم وعظام وأعضاء أخرى. تستنشق الهواء لكي تحيا شت لاند ثلاث مرات زي ما الرئيس بعروور قال في خطابه الشهير وبهير وسمير غانم أبو دنيا، لفي بينا يا دنيا، دوخينا ي...
- أنا دُخت فعلاً!
- إنتي كويسة يا آنسة!؟
- مش عارفة! هو أنا فين؟! وإنت مين؟
- أنا كنت معدي لقيتك دايدة فقلت أتطمئن عليك، بس واضح إنك تمام. أسيبك بقى، سلام عليكم.



أبو مودة

- عاوزين نعمل بروتوكول تعاون بين شركتنا وبين حكومة سيادتك يا ريس، زي ما كان حاصل أيام النظام السابق.
- بس أنا لغيت التعاون مع أي حد كان النظام السابق بيتعاون معاه؛ عشان مش عاوز يحصل لي زي ما حصل للرئيس بعروور الله يرحمه.
- وهو الرئيس بعروور الله يرحمه حصل له إيه؟
- هيحصل له إيه يعني أكثر من إننا بقينا بنقول اسمه مقترناً بـ «الله يرحمه»!؟
- بس الرئيس بعروور الله يرحمه لسه عايش.
- «الله يرحمه» و«لسه عايش»! إنت شايف إنها تمشي؟
- أقصد عايش في قلوبنا، عايش في ذاكرة الشعب وكل يوم بيترحموا عليه بعد ما جربوا حكمك.
- وماله حكمي إن شاء الله؟

- إحم، القصد يعني يا ريسنا، أنا جاي لك بحلول تخليك
تتجنب مصير الرئيس بعروور الله يرحمه.

- حلول إيه؟

- مش الرئيس بعروور بقى «الله يرحمه» بسبب غضب الشعب
عشان غلاء الأسعار وتدهور الوضع الاقتصادي... إلى آخر
المشكلات اللي كلنا عارفينها؟

- آه.

- طيب أنا جايب لك حل للمشكلات دي كلها، حل هيزود
دخل الفرد ويخلي الشعب كله - أو اللي هيتبقى منه - أغنيا،
وكل ما الشعب يغتني ويعيش في رخاء، كل ما حضرتك
تتجنب مصير بعروور الله يرحمه.

- آه فعلاً.

- لأ وكمان التاريخ هيثذكرك بكل خير، كفاية إنك الرئيس
الوحيد اللي جعل كل أفراد شعبه أغنيا.

- قول الحل طيب.

- بعد تفكير وبحث مطول مني توصلت لأحسن طريقة عشان
نحسن اقتصاد البلد ونزود دخل الفرد.

- إنت هتفضل ترغي كدا كثير؟ هات لي من الآخر.

- هممممم هنقلل عدد الشعب، فتقل الكثافة السكانية وتزيد

فرص العمل ويزيد دخل الفرد وتزيد سرعة عجلة الإنتاج و...

- مش واخذ بالي!

هابسَظها لك، دلوقتي لو فيه عربية راكب فيها اتنين وعربية
تانية راكب فيها سبعة، أنهي عربية فيهم اللي هتوصل أسرع؟
حسب نوع العربية، يمكن اللي راكبها اتنين دي فيات واللي
فيها سبعة تكون فيراري فتوصل أسرع.

همممممم طيب بلاش دي، لو فيه واحد مرتبط بـ ٦٧
بنت وواحد مرتبط بنت واحدة. مين فيهم اللي هيخسر؟
اللي ماشي مع بنت واحدة طبعًا.

إزاي بس يا ريس؟

عشان اللي ماشي مع ٦٧ بنت هييوس أكثر منه.

بغض النظر عن البوس والوساخة اللي في دماغك، أنا باقول
لك مين اللي هيخسر مش مين اللي هييوس، وبالتالي بتاع
الـ ٦٧ بنت هيصرف فلوس كتير على هدايا ودباديب ودواوين
شعر ومحزن، وطبعًا هايغزمهم على أكل، فهيخسر أكثر من أبو
واحدة بس.

ما يمكن هما اللي يصرفوا عليه ويجيبوا له هدايا، وكل واحدة
منهم هتجيب هدية أغلى من الثانية عشان يحبها أكثر ويفكس
للتانيين، وكدا يبقى أبو واحدة بس هو اللي خسر!

يا ريس ركز معايا والنبي وماتبقاش تيس.

ما أنا تيس فعلاً.

قصدي التيس الحيوان اللي هو بي... بي... بيحب النعجة.

ماتخليش عشمك في صداقتنا القديمة ينسبك نفسك يا أبو
موتة، إنت بتكلم رئيس شت لاند دلوقتي.

- والله ما أقصد، أنا كان غرضي أوصل لك المعلومة بس، إيه
قلت إيه؟

- قلت إيه في إيه؟ أنا لحد دلوقت مش فاهم حاجة!

- طب هابسطها لك على طريقة الفنان المصري هاني رمزي
دلوقتي معانا طبق كشري وفيه عشرة بياكلوا منه، ومعانا طبق

تاني واحد بس اللي بياكله. تفتكر مين هيشبع؟

- ما يمكن العشرة أكلتهم ضعيفة وطبقهم كبير فيشبعوا، والواحد
زي الجاموسة وطبقه صغير فمايشبعش!

!

!

- بلاش أم الأكل خالص. واحد معاه علبة سجائر مافيهاش
غير سيجارتين، وواحد تاني معاه علبة كاملة، عشرين سيجارة،
مين فيهم اللي هاي...

- أبو عشرين سيجارة هايموت أسرع.

- لأ، أنا ما بتكلمش عن اللي هايموت، أنا كنت هاسأل عن اللي
هيوقر.

- أبو سيجارتين.

- إزاي بس؟ ما السيجارتين هيخلصوا بسرعة ويروح يجيب
علبة كاملة بفلوس.

- لأ طبعا، أبو سيجارتين كل ما يقعد مع واحد هيشحت
منه سيجارة ويقول له: «والله ما معايا غير سيجارتين بس

هشربهم في الحمام قبل ما أنام» فيصعب على اللي قدامه
ويدي له سيجارة.

- بص يا ريس، بص يا حبيبي، من الآخر عشان الشعب دا
يعيش كويس لازم نضحى بشوية منه، لازم ناس تموت عشان
الناس التانيين يعيشوا.

- أيوه يعني نقول للناس يموتوا أنفسهم وللا نعمل إيه؟

- إنت ماتعملش حاجة خالص، إنت وافق بس وامضي عقد
معايا وشركتي هي اللي هتعمل.

- طيب فهمني هتعمل إيه؟

- أنا في دماغي فكرة أبليكيشن هـ...

- بس الأبلكاش دا ضعيف وبيتكسر بسرعة، ماعملتش نوع
تاني ليه؟ زان مثلاً.

- والله إنت اللي زان وابن زان.

- بتبرطم بتقول إيه؟

- أبلكاش وزان إيه يا ريس؟ هو أنا باتكلم مع بدوي النجار،
أبليكيشن دا يعني تطبيق.

- ومين اللي طبقه؟!

- طبقه! هو أنا جايب لك المكواة؟ دا تطبيق على الموبايل، زي
الفيسبوك والواتساب.

- ساب إيه؟

- هو مين؟

- الواد.
- مش فاهم!
- إنت مش بتقول الواد ساب!
- يا ديني! بلاش الواتساب، تطبيق زي التليجرام.
- جرام وللا كيلو؟ أهاهاهاهاهاها.
- بعيداً عن السخافة دي ممكن تسمح لي أشرح لك تفاصيل فكرتي بدون مقاطعة خالص، بعد إذنك؟
- اتفضل.
- فكرتي ببساطة هي برنامج تدخل عليه يقول لك ميعاد موتك، هنحط لينكاته على كل مواقع التواصل الاجتماعي، وأي حد هيدخل عليه هنحدد له ميعاد معين يموت فيه و...
- وانت اتفقت مع عزرائيل ع الكلام دا؟
- !؟
- ما هو اللي هتحدد له ميعاد دا هينتظر موته، فماينفعلش بجهاز نفسه ومايموتش يعني!
- لا يا ريس هيموت، ماتقلقش.
- أيوه يعني اتفقت مع عزرائيل؟
- اسمعني للآخر: هنحدد لكل شخص ميعاد معين عن طريق المعلومات اللي هتتاح لنا عنه، يعني مثلاً لو راجل فوق الخمسين هنحط له ميعاد بدري عن شاب في العشرينات.
- آه صح، عزرائيل أغلب شغله مع كبار السن فعلاً.

عزرائيل مالوش دعوة بالموضوع يا ريس، وسييني أكمل
والنبي: في البداية الناس هتتعامل مع الموضوع بعدم جدية،
لكن مع موت الناس في المواعيد اللي احنا حددناها فعلاً،
هيفتكروا إن البرنامج بيتنبأ بموتهم، وهيبداوا يتكلموا عنه
كحدث عظيم بيشفوف الغيب.

وانت هتتعرف مواعيد الموت من مين طالما عزرائيل مالوش
دعوة بالموضوع؟

مختصين هما اللي هيحددوا الوقت والرجالة بتوعى هما اللي
هينفذوا عمليات القتل.

قتل مين؟

الشعب.

!

أي حد يدخل ع التطبيق دا من الشعب هندي له ميعاد يموت
فيه، وممكن - عشان ننجز - ندي في يوم واحد أكثر من
ميعاد. والرجالة عندي قدها وقودود وياما نفذوا عمليات في
عهد الرئيس بعروور الله يرحمه.

ما هو دا اللي مخوفني، خايف أنا كمان أبقى «الله يرحمه»
زي بعروور.

لا يا ريس، الميزة المرة دي إن الناس هتقبل الموضوع، دول
هيستنوا الموت كمان، وفي خلال سنتين ثلاثة وقبل نهاية فترة
حكمتك هنكون قتلنا ربع الشعب - دا غير اللي هيموتوا موة
ربنا - فتبدأ فترة حكمتك الثانية على نضافة.

- نضافة ازاي؟

- عدد قليل من الشعب يسهل السيطرة عليه، وهياقي سلع متولدا
وسكن ووظائف، وكمان موارد الدولة هتكفيه وتفيض.

- وإيه المطلوب مني؟

طلب أبو موة من الرئيس مهندسًا عبقريًا في الكمبيوتر يسمع منه
فكرة التطبيق وينفذها، ويستحسن: (مايكونش حد عزيز عليك يا ريس
عشان هنقتله أول ما يخلص)، وطلب خط اتصال مفتوح مع المخبرات
(عشان لما نحتاج معلومات عن الأهداف نلاقيها متاحة لينا). وتجادلا
في الجانب المادي، حتى استطاعا الوصول إلى رقم مُرضٍ للطرفين.

- هأديك في اليوم كله مليون جنيه.

- إنت بتفاصيل معايا يا ريس؟

- لا بأمرك وهتنفذ، وهتكسب لأن البرنامج دا هيتشهر وشت
لاند والعالم كله هيتكلم عنه ويدخل عليه و...

- لأ عالم كله إيه؟ إحنا هنعمل البرنامج دا محلي ومايفتحش
من أي مكان خارج شت لاند.

- ليه؟

- عشان لو العالم كله دخل عليه وناس من بره شت لاند جربوه
مش هنعرف نقتلهم، فالبرنامج هيفقد مصداقيته.

- مش مهم العالم، كفاية إن شت لاند كلها هتدخل عليه، فإحنا
ممکن نستغل البرنامج ونتفق مع رجال الأعمال يعلنوا عن
شركاتهم ومنتجاتهم عندك، وعائد الإعلانات كله ليك إنت
ورجالتك.

سعيد الحظ

وبعد ما ثبت فشله في المرور وعدم وعيه ودرايته بمهامه؛ يتم نقله للعمل في مباحث الآداب، وهناك يرى ويسمع ما جعله طوال الوقت مستأزراً جنسياً؛ إضافة إلى الحملات التي يقودها إلى بيوت الدعارة. صباح أحد الأيام جاءه شاب يشكو إليه أنه «انضحك عليه، جاب واحدة وبعدين اكتشف إنها مفتوحة وملعوب فيها!»، وظل يحدثه عن مواصفاتها، وسعيد يسرح بخياله معتقداً أن محدثه يصف له فتاة؛ ليكتشف في النهاية أنه يحدثه عن «غسالة اشتراها جديدة وطلعت منسلحة قبل كذا»، ولكن التفسير وصله متأخراً بعد أن تخطى مؤشر إثارته الجنسية علامة «Maximum» فأفرغ شحنة غضبه في المواطن وسبب له عاهة مستديمة.

استدعاه رئيسه بعدما علم بالموضوع، ووجه له بعض النصائح الأبوية واختتم كلامه بأن طلب منه أن «لازم تعف نفسك طالما اشتغلت في الآداب، والعفة بتيجي من الجواز، اتجوز يا سعيد». لم يُعر حديثه اهتماماً، فما فعله في ماضيه جعله لا يثق بالنساء، كما جعله من أشد

المعارضين لفكرة الزواج؛ فألقى بالنصيحة وراء ظهره وزاول عمله على نحو طبيعي:

- عاوز أخلع مراتي يا حضرة الظابط.

- وما رحتش لدكتور سنان يخلعها لك ليه؟ هههههه
- !

- مابتضحكش ليه؟

- هاهاهاهاها، حلو كدا وللا أضحك كمان شوية؟

- لأ كفاية، قول بجد عاوز إيه؟

- والله عاوز أخلع مراتي، ورحت المحكمة طلبوا مني أعمل محضر، فجيت أعمل محضر ضد مراتي؛ لأنها ضحكت عليا وخذعتني طول ٥ سنين جواز. أنا اتظلمت كثير يا حضرة الظابط (بيعيط).

- اهدا طيب واحكي لي مأساتك.

- هاحكي لك، بس الأول اوعدني إنك هتخلعني منها.

- أوعدك ازاي بس؟

- قل لي: أوعدك يا مودي إني هاخلك من مراتك.

- المشكلة مش في الصيغة اللي هاقول بيها الوعد يا مودي،

المشكلة في تنفيذه؛ أنا أول مرة أشوف راجل عاوز يخلع

مراته! ما تطلقها وخلص.

- لو طلقتها هادفع دم قلبي مؤخر ونفقة، وبعدين الزمن اتطور

يا افندم، وبقي فيه مساواة بين الراجل والمرأة، والمفروض

القانون كمان يؤمن بالمساواة دي ويخلعني من مراتي.

- طيب قل لي عاوز تخلع مراتك ليه؟
- أخاف ألا أقيم حدود الله.
- شت!
- بجد يا حضرة الظابط.
- إيه اللي بجد يا جدع انت؟ مراتك مابتعرفش؟!!
- أيوة هي دي، مابتعرفش، والله ما بتعرف. وفضلت ضاحكة
- عليا طول ٥ سنين جواز ومفهماني إنها بتعرف.
- هممممم، مكتوب قدامي إنك مخلف منها ولدين وبنات.
- مضبوط.
- جابتهم إزاي طالما هي مابتعرفش!
- يا افندم ما الكلاب مابتعرفش ويتخلف عادي.
- هممممم وجهة نظر برضه. طيب قل لي مابتعرفش ازاي؟ إحم،
- يعني أصل الموضوع آ... إحم، قضيتك غريبة يا مودي! إزاي
- ممكن تكون واحدة مابتعرفش وهي... آ... وهي «مفعول به»
- يعني، فإيه اللي هيخليها ماتعرفش؟!!
- لأ، هي شغالة «مفعول به» الله ينور، فلة شمعة منورة.
- أومال ليه بتقول إنها مابتعرفش؟!!
- أنا أقصد مابتعرفش تبوس.
- نعم؟!!
- ما بتعرفش تبوس حضرتك.
- وهي هتبوس حضرتي ليه؟ هو انا جوزها.

- أقصد حضرتك ما بتعرفش تبوس.
- لأ باعرف أبوس والله، إنت بس اللي عرفتني متأخر، دا أنا كنت شقي أوي بس رينا هداني.
- يا افندم وانا مالي بحضرتك، أنا باقول لك مراتي ما بتعرفش تبوس.
- آه. أومال خلفت منها ازاي؟
- ما الكلاب بتخلف عادي من غير ما تبوس بعضها.
- آه صح، إنت قلت لي المعلومة دي قبل كدا.
- بص يا حضرة الظابط: أنا راجل باقدر البوس جدًا، البوسة عندي حاجة مقدسة و...
- مقدسة ازاي يعني؟ بتعدها وتصلي ليها وكدا؟
- لأ مش للدرجة دي، بس باحترمها، ومراتي مش بتعرف تبوس.
- مش فاهم إيه الصعوبة اللي في البوسة عشان مراتك ما تعرفش تبوس؟! دا هي يا دوب هتخط شفايفها على شفايفك!
- أنا كنت فاهم زي حضرتك كدا، كنت فاكر إن البوسة عبارة عن شفتين يلمسوا بعض ونقعد نزمر.
- تزمروا!
- آه، نزمر مع المص يعني.
- مص إيه يا بني؟ احترم نفسك انت في مكان ليه احترامه.
- أنا آسف بس باشرح لك.
- اشرح بأدب.

كنت فآكر إن البوسة لمس شفآيف وبس، ومرآتي أقنعتني
بكدا، لغآية مآ عرفت إن فية أنواع للبوس.

أنواع!؟

آه فية بوس بالسنان وبوس بال...

الأول بس قل لي إنآ بتتكلم عن مرآتك وللا الغسآلة، عشآن
لو سخنآ ولقيتك بتتكلم عن الغسآلة هآعدمك.

لآ عن مرآتي، هو فية حد بيبوس الغسآلة.

طيب كمل.

فيه بوس بالسنان وبوس عن طريق عض الشـ (بيوشوش سعيد
اللي وشه بقى آحمر).

أيوه (بيعرق).

وفيه البوسة اللي هي أمسك شفتها و... (بيقرب من ودآن
سعيد اللي بيتنفس بسرعة).

حلوة دي، حببتها (بيمسح عرقه).

وفيه بوسة باللسآن، تعرفها؟

لا، (ثم بلهفة) عرفني يآ مدرسة.

اللي هو تدخل لسانك في... (بيكمل همس في ودآن سعيد
فبيقوم يقف).

الله عليك.

استني هآقول لك حآجة كمان في ودنك (بيقرب من سعيد

ويعض ودنه)، وفي كمان دي، فية أنواع تآنية كتير، بس

المكان مش مناسب لشرحها يآ أفندم.

- دا انت اللي افندم.
- يرضيك يبقى دا كله موجود والست هانم مراتي مخبية عليا
- مايرضينيش لأ، بس انت عرفت الحاجات دي مينين؟
- من عشيقتي، علمتني كل حاجة عن البوس.
- يعني بتخون مراتك؟
- ما هي كمان خاننتي لما استغفلتني في موضوع البوس دا.
- هذه المرة قال له رئيسه بجدية وفي شبه أمر، إن عليه أن يبحث عن زوجة إذا أراد الاستمرار في العمل بالشرطة الشت لاندية كلها، وليس في الآداب فقط.

أبو بخت مايل

كان جالسًا معها في إحدى زيارته لبيتها، وكانا يتجادلان في متطلبات الزواج، فقالت له بوسي التي اتضح أن اسمها الحقيقي «بسيونة»، إذ لما مرت سنوات على زواج والداها وتأخر حمل أمها، ذهبت إلى الشيخ سعيد البغل؛ قبل أن يذيع صيته ويصبح مستشارًا روحانيًا للرئيس بعروور، ويستشهد معه وباقي النظام في تمرد فبراير، ووالهما الشيخ بغل على مقام ولي اسمه «بسيوني»، وهناك نذرت أمها نذرًا (لو ربنا رزقني هاسمي المولود على اسمك يا مولانا)، وجاءت أنتي، فأسقط في يدها، لولا أن أنقذهما «بغل» حينما أمرهما أن يسميها «بسيونة»:

- ماما زعلانة منك قوي يا بيخو.
- بطلي تقولي لي بيخو عشان بتعصبي، أنا اسمي أبو بخت، أبووووو بخت مايل.
- ومالك فرحان كدا ليه كأن اسمك مازن؟
- ما بلاش انتي يا بسيوني.

- إحم، طيب ماما زعلانة منك وعمالة تقارن بيني وبين سعاد بنت خالتي و...
 - سعاد الصاروخ دي اللي شبه صافيناز؟!
 - آه.
 - دا كدا المفروض أمك تزعل عليا مش مني؟
 - تزعل عليك ليه؟!
 - عشان لما تقارن بينك وبين سعاد الصاروخ، هتكتشف إنك وحشة وهاصعب عليها فتزعل عليا.
 - أنا وحشة؟
 -
 - إحم، لو هنقارنك بسعاد الصاروخ يعني.
 - بس هي مش بتقارن من ناحية الشكل.
 - ما هو جسم سعاد أحلى برضه، دي واخدة لقب صاروخ يا بنتي، إنتي لو فكروا يدوكي لقب، يا دوب سلسلة مفاتيح مصدية.
 - ماما مش بتقارن بالشكل ولا الجسم، هي زعلانة عشان إنت مش بتجيب لي حاجة، وخطيب سعاد مغرقها هدايا.
 - طيب خلوني أخطب سعاد وهاغرقك هدايا إنتي وأمك وكل قرابيك. دي سعاد الصاروخ يا بنتي!
 - أنا عارفة إن سعاد أحلى بس ادخل علينا مرة بكيلو هريس، صينية بسبوسة، أو حتى علبة جاتوه سواريه.

- الله يرحم أمك، يوم ما أبوكي قال لها جاتوه سواريه؛ كانت
فاكراه بيتكلم عن فستان سهرة، وقالت له يجيبه محتشم
عشان الحجاب.

- عيب كدا يا حبيبي، دي أمي برضه.

- ما هي المصيبة إنها أمك، مش أم سعاد الصاروخ يعني عشان
تحط شروطها.

- ماتنساش إنك طول الوقت عندنا، واكل شارب نايم قايم.

- إنتي بتعايريني؟

- مش باعايرك، بس عايزاك ترفع راسي قدام أهلي وتنفذ اللي
اتفقت مع بابا عليه عشان بيسأل خلصت الشقة وللا لسه،
هو عايزها زي شقة سعاد، خمس أوض وحمامين ومطبخ
أمريكاني و...

- خمس أوض إيه يا بنتي؟ دا انا لما بادخل شقتكم باتكعبل
في العفش ودماعي بتخبط في مروحة السقف وبقاعد على
الكرسي بالجنب عشان ماخدش حيز كبير.

- ماليش دعوة، إنت عايز طنط صفاء تشمت فيا؟

- طنط صفاء مين؟

- أم سعاد.

- سعاد الصاروخ؟

- آه.

- طيب جوزوني سعاد وهاجيب لها فيلا بـ ٣ جناين.

- يا ابني عفش سعاد جاي من إيطاليا، وانا مش أقل منها!
- لأ أقل والله، سعاد صاروخ وانا مش عايز أخرجك تاني وأقول
لك إنك سلسلة مفاتيح مصدية. وبعدين إيطاليا إيه؟! دا انا
شايف أبوكي امبارح بيستلف كنبه قديمة من بتاع الروبابكها
علشان أقعد عليها لما أزوركم!

- خلاص يبقى ع الأقل فرحي يكون في الشيراتون وتجييب
حماقي يغني زي خطوبة سعاد.

- شيراتون وحماقي؟! دا أبوكي عمل فرح امك فوق السطوح
وكانوا بيطلبوا لها على الحلل بالمعالق، تقولي لي حماقي!
دا حماقي نفسه يوم خطوبة سعاد ماكانش على بعضه من
جمالها.

- واضح انك حبيت سعاد.


- ومين مايحبش فاطمة... أقصد مين مايحبش سعاد؟

- يعني مش هتتجوزني!؟

- لأ هاتجوزك طبعًا، بس أنا واخذك على عيبك عشان
ماتكلفينيش كثير، وفي نفس الوقت أبقى قريب من سعاد
وأشوفها كثير. فماتجيش تقولي لي هات لي زي سعاد عشان
دا ظلم! أنا لو معايا أجيب لك زي سعاد كنت اتجوزت سعاد
وخلص.

- إنت عارف معنى اللي بتقوله؟

- آه عارف، إنتي اللي مش فاهماني.



سعيد الحظ

جالس على مكتبه يفكر في كلام رئيسه، «لازم تعف نفسك طالما
الهدفت في الآداب، والعفة بتيجي من الجواز، اتجوز يا سعيد»، ثم
بهر رأسه طارداً الفكرة منها؛ قبل أن يبتسم بسخرية ويتذكر آخر مرة
قالته أنثى في مسألة الزواج وكيف (خلع منها) بأعجوبة، تلك التي
كان داخل عليها بدور الواد الخام اللي مالوش تجارب)، فحاولت
بكل الطرق أن تجعله يتزوجها ولما لم تفلح، جربت آخر طريقة:

- إحنا بقى لنا كتير نعرف بعض يا سعيد، وماحاولتش مرة
واحدة تمسك إيدي حتى.

- سهى! لأ شيلي إيدك يا سهى، قلت لك ١٠٠ مرة إني باقشعر
من المنطقة دي.

- يا سعيد ركز معايا بقى! فكك من جو الأيدي الناعمة وقميص
جدو الكاروهات ده، وركز معايا يا حبيبي، هو انا مش
عاجباك!؟

- لأ طبعا عاجباني يا سهى؛ وإلا ماكنتش صاحبتك.

- طب إيه بقى؟ مش محتاج حاجة تفرفشك؟
- محتاج طبعا، تعالي نم على البنتين اللي واقفين هناك دول.
- هي دي الفرشة بالنسبة لك؟!
- أومال؟
- يا ابني النم على الناس والحاجات دي بتاعتنا إحنا كبنات،
إنما فرشة الرجالة حاجة تانية.
- زي إيه طيب؟
- يلا نلعب عريس وعروسة.
- موافق، بس مين هيقوم بدور العروسة؟
- أمي، أمي يا سعيد هي اللي هتقوم بدور العروسة.
- طيب رني عليها عشان نلعب.
- دا انت طلعت خام أوي.
- مش خام يا سهى، بس أنا عشت طفولة قاسية.
- إيه؟ كانوا بيكهربوك وبيطفوا السجاير في إيدك؟
- لأ مش في إيدي.
- أومال فين؟
- وات ايفر يعني، خلىنا نغير الموضوع، أنا زهقت من شخصيتي
دي، وآديكي قُلتني إني خام، فبجد أنا لازم أتغير.
- برافو يا سعيد.
- يخرب بيت جمال أمك يا سهى!
- برافو.

- شعرك وعنيكي لونهم مجنني!
- أيوه كدا.
- وللا كيرفاتك بقى!
- لولولولي، حبيبي بقى منحرف يا ناس.
- سهى.
- عيون سهى.
- يللا!
- يللا فين يا سعيد؟
- تعالي نشد على الشقة حالاً.
- إنت اتجننت؟!!
- بالعكس، أنا عاقل أوي.
- لأ يا سعيد لأ، أنا ماروحش معاك الشقة غير واحنا مخطوبين
- ع الأقل.
- هتروحي معايا يا سهى، ودلوقتي عشان أنا سخنت.
- لأ اهدا كدا يا سعيد، أنا كنت عايزاك تفك مش أكثر!
- ما احنا هنفك يا سهى.
- يخرب عقلك، إنت بقى لك شهور فاصل شحن وجاي تفوق
- دلوقتي؟! اعقل يا سعيد مش كدا.
- يللا عالشقة يا سهى!
- لأ شقة إيه؟ مش هينفع قلت لك.
- خلاص، هاخش عليكى هنا.

- تخش عليا هنا! إنت سخنت فجأة زي ذكر ضفدع في مودج
- التزواج كدا ليه؟ هو العصير دا فيه فياجرا وللا إيه؟!
- يللا باقول لك أحسن لك، وإلا هادخل عليك في الشارع
- إنت بتهددني يا سعيد؟
- آه يا سهى باهددك، أنا أعرف واحدة رفضت تطلع الشقة
- حببيها، قام لم أصحابه وتناوبوا اغتصابها والاعتداء عليها
- جنسيًا، لغاية ما جالها عقدة نفسية فقلبت نفسها راجل وشال
- التاء المربوطة من اسمها.
- ليه هي كان اسمها إيه؟
- سعيدة يا سهى، كانت سعيدة وبقت سعيد (وبكى).
- بالطبع لم تطلب منه سهى أن يتزوجها بعد ذلك، لم تطلب
- أي شيء أصلاً؛ لأنها اختفت من حياته. ثم بعد كل ذلك، يأتي ربه
- ويطلب منه ببساطة أن يتزوج! بعد كل ما فعل!

محاسن الصدف

منذ أن تركت القناة وهي تشعر بالفراغ، نزلت المول المجاور لشقتها من أهل الـ«شوينج» بغية قتل الوقت، ولكن ظل الملل مسيطراً عليها، فبدأت تحتسي قهوتها في أحد الكافيهات داخل المول. كانت تتأمل وجوه الناس من حولها حتى استقرت عيناها على رجل وامرأة يجلسان على الطاولة المجاورة لها، أخذت تتأمل نظرات الوله والحب التي يتبادلها العاشقان. قارنت نظرات الرجل بنظرات حبيبها المائت التي أدخلته أماكن «ماكنش يحلم يعدي من قدامها المعفن»، مال الرجل على فتاته كأنه يريد أن يقول لها سرًا، ولكن بدلًا من ذلك مال على أذنها بشفتيه، تعجبت «الله الله الله! ما تمسك نفسك أومال. إنت هتدخل عليها هنا وللا إيه؟». وقبل أن تكمل حديثها لنفسها داهمت الشرطة الكافيه وقال ضابط وسيم للرجل:

- إنت مقبوض عليك بتهمة ممارسة الرذيلة في مكان عام.
- الرجل: رذيلة إيه يا حضرة الضابط؟ أنا بهدومي والآنسة آ...

يصمت ثم يحدث الفتاة:

- مش آنسة برضه؟
- الفتاة: لأ، بس لو دا هياثر على علاقتنا إديني نص ما...
- أشترى واحد صيني أركبه وأبقى آنسة.
- الرجل:
- الضابط:
- الرجل: المدام ب...
- الفتاة: مش مدام أنا لسه ما اتجوزتش.
- بنفاد صبر يتوجه الرجل بحديثه للضابط:
- أنا بهدومي يا افندم والبتاعة دي بهدومها برضه! فهنمارس
الرزيلة ازاي واحنا بهدومنا؟
- الضابط: لا، ماتقلقش ما انا عامل حسابي.
- يشير للجنود المرافقين:
- قطع يا بني انت وهو.
- يخرج كل جندي من جيبه «كاتر» ويبدأون تمزيق ملابس الرجل
والفتاة باحترافية شديدة، كأنهم اعتادوا الفعل حتى احترفوه. تسقط
الملابس عنهما، فيتجه أحد الجنود إلى الضابط:
- خلاص يا فندم، نلفهم بالملايات بقي؟
- الضابط: لأ، الملايات دي لما نقبض عليهم في شقة، لكن
احنا هنا في كافييه.
- الجندي: أيوه يعني ناخدمهم ع القسم باللبيسة؟

- الضابط: البسة! لا يا روح أمك، ماينفعش ناخذهم باللِّبسة
عشان لو فضلوا باللِّبسة دقيقة كمان الناس دول هيتحرشوا
بيهم وبيكم ويا أنا كمان، وهنبقى كلنا باللِّبسة.
- الجندي: نعمل إيه طيب؟
- الضابط: لفوهم بمفارش التراييزات.
- استغلت محاسن الحدث، وأخرجت هاتفها وفتحت الكاميرا
والمشهور المشهد السابق، كانت تشعر بنشوة ومنتعة تفوق منتعة ممارسة
الجنس مع توم كروز، ولكن الضابط الوسيم تدخل ليقطع متعتها.
- هاتي الموبايل بتاعك لو سمحتي.
- ليه يا فندم؟ أنا ما عملتش حاجة، والموبايل لابس جراب أهو
ومحترم نفسه مش عريان يعني!
- أنا شُفتك وانتي بتصوري العملية، ودي حاجة تتعارض مع
أمن دولتنا، فبطلب من حضرتك بالذوق تديني الموبايل أمسح
الفيديو بدل ما أضطر آخده حرز في القضية.
- إنت ماتعرفش أنا مين؟
- هممممممم، أنا حاسس اني شفت حضرتك قبل كدا.
- محاسن الصدف.
- لا أنا اللي شفتك مش إنتي. فالمفروض أنا اللي أقول لك
محاسن الصدف.
- إحم، لأ، أنا اسمي محاسن، محاسن الصدف.
- هاهاها، آسف، بس اسمك يضحك، هاهاها، أوي.

- لأ عادي، أنا بطلت أندهش من رد فعل الناس أصلاً، هتفكر
تاني وللا خلصت؟
- لأ خلاص، بس أنا مش فاكر شفت حضرتك فين، إنتي معانا
في الداخلية؟
- للأسف ماحصلش الشرف، بس أكيد حضرتك شفتني في
ال«تي في»، أنا كنت مذبة مشهورة وبقيت مراسلة في
«خوازيق».
- آه افكرتك، إنتي المذبة بتاعة فضيحة آ... الست دي اللي
اسمها آ... المتعذبة ع. ن باين؟
- المعذبة س. أ.
- مش هتفرق، المهم إنك بتاعة الفضيحة، أنا سعيد الحظ.
- وإيه اللي في الفضيحة يخليك سعيد الحظ؟
- لا، اسمي سعيد، سعيد الحظ.
- إنت مش قلت إنك خلاص خلصت تريقة على اسمي؟
- لأ يا فندم مش باتتريق والله، أنا اسمي فعلاً سعيد الحظ
(بيوريها الكارنيه)
- يعني عمال تقلش على اسمي من الصبح وفي الآخر تطلع
سعيد الحظ؟ أنا أسعد يا سيدي.
- (يزيح الجاكت فيظهر مسدسه داخل جرابه) اسمي حضرة
الظابط سعيد الحظ، فاحترمي نفسك.
- سعيد باشا الحظ، أنا أسعد والله.

إحم، سيادتك عايز تاخد الفيديو ليه؟ دا ممكن يكون سبب
في شهرة حضرتك، ويكون سبب في رجوعي تاني للقناة،
عشان خاطري سيبه.

خاطرك إيه يا بنتي؟ هو احنا بيننا سابق معرفة أصلا عشان
أعمل لك خاطر؟

هيبقى بيننا، هنعرف بعض ونبقى أصحاب ونخرج سوا كمان،
فاعمل لي خاطر دلوقتي وخده بعدين بأثر رجعي وفايدة ٤٪.

دا على أساس اني هأديكي فلوس بالربا؟ إنتي عبيطة بس
صعبتي عليا، وهاسيب لك الفيديو دا عشان ترجعي شغلك،
وإكرامًا لذكرى أبوكي الشهيد اللي قدم خدمات جلية للوطن.

رغم شعورها بغصة في حلقها بسبب إنقاذ والدها لها مرة أخرى؛

لأن في الوقت نفسه تشعر بسعادة ما بعدها سعادة، ليس فقط بسبب
وصولها على فيديو قد يعيدها إلى عملها مرة أخرى، ولكن لأن قلبها
الذي نالته، أحبت «محاسن الصدف» الضابط الوسيم «سعيد الحظ».



أبو موة

الأغنياء مُحصنون ومحرم المساس بهم، هذه هي القاعدة في شت
الأمم، وعليه فقد بدا لأبو موة أن فكرته ستفشل. فهو يعلم أن الأمر
سيستقطب مواطنين من كل فئات الشعب، الفقراء والأغنياء. وبالطبع
إذا أعطى غنيًا موعدًا لموته ولم يقتله، سيؤثر ذلك في مصداقية برنامجه
عند الناس. ولم يستطع إقناع متخذي القرار بقتل الكل - أغنياء وفقراء -
فأصبحت فكرته في سبيلها إلى الفشل، لولا اقتراح من سكرتيره:

- إحنا هنديهم الميعاد بناءً على حالتهم الاجتماعية اللي هتوصل
لنا من المعلومات المخبرانية، الفقرا هنديهم المواعيد القريبة
في أول ٣ سنين مثلاً، وندي الأغنيا مواعيد بعيدة أوي، أقرب
ميعاد يكون بعد ١٠ سنين، ووقتها يحلها حلال، يا عالم
هيحصل إيه.

- طيب افرض ادينا واحد ميعاد بعد عشر سنين مثلاً ومات قبل
كدا؟

- همممم، يبقى نراقب أي حد يدخل ع البرنامج طول الفترة
الباقية في حياته، ولو حصل جديد زي موت الهدف مثلا
هنؤمر مجموعة احتواء الأزمتا تتدخل وننقله المستشفى
ونخلي دكتور من بتوعنا يقنع أهله إنه هيفضل ميت إكلينكا
لغاية ما يفارق الحياة نهائياً في الميعاد اللي حدده البرنامج
ولاقت الفكرة إعجابه لأنها «هترحمهم من الصدام مع الأعداء»
وهتزود مصداقية البرنامج عند الناس لما يلاقوا توزيعه التواريخ مختلفا
ومتنوعة وعلى مدار العمر، مش مقتصرة على الوقت الراهن بس، ثم
تواصل مع الرئيس ومخابراته وأخبرهم الحل، ورحبوا جميعهم. وأحضر
المهندس وتم حبسه في غرفة كالسجن، ليس فيها غير لاب توب متصل
بالإنترنت، وجندي جالس بجواره ليمنعه إذا حاول إفشاء السر. ولما بدأ
التطبيق وعلمهم طرق تشغيله، قتلوه.

وبدأت المهام، وتم توزيع مواقيت الموت على المواطنين، وكانت
طرق القتل متنوعة لكي لا تثير الريبة؛ فمرة عن طريق حادث سيارة
ومرة عن طريق الإلقاء من فوق سطح أحد المباني... وهكذا. ومن
يصعب قتله بتلك الطرق التي تبدو كحوادث، يتم اللجوء إلى الحلول
العسكرية كالقتل رمياً بالرصاص أو قنصاً.

العجيب كان تقبل الناس للأمر كأنه قضاء رباني، فلم يشك أحد
قط أن هناك من يقف خلف الأمر. وأصبح الأمر سهلاً على موظفي
كلاشينكوف، فابتكروا حيلاً عدة كلها تنم عن ذكائهم، فمثلاً كان
الموظف يذهب إلى الهدف في بيته ويطرق الباب:

- جوزك فين؟

- جوه.
- بيعمل إيه؟
- بيعمل بي بي على نفسه لأنه هيموت النهارده.
- ولما هو عارف إنه هيموت النهارده مانزلش الشارع ليه؟
- وينزل ليه؟
- عشان يموت.
- أنا عارفة يا اخويا هو خايف من إيه؟ طيب و حياة حبييك النبي
- أنا زهقت من العيشة ونفسي أموت. دي مقابلة عزرائيل نفسه
- أرحم من العيشة في البلد دي، بس أنا لسه معادي ماجاش.
- طيب انت عارف، والله أنا هافر ح لو قابلت عزرائيل، إيه يعني
- اللي يخوف في الموضوع....
- للأسف أنا مش فاضي أسمع قصة حياتك. خُشي قولي لجوزك
- إني مستنيه، وخليه يغير البنطلون المبلول.
- هو بنطلون واحد؟ دا بل كل بناطيله وقاعد لافف نفسه
- بالملاية جوه زي اللي مستني بوليس الآداب. أنا عارفة يا
- اخويا رجالة إيه دي؟ ولما هو بيخاف ومش قد الموت بيدخل
- على البرنامج ليه؟ والله أنا هافر ح لو قابلت عزرائيل و...
- عرفت إنك هتفرحي لو قابلتي عزرائيل. انجزي بقي اندهي لي
- جوزك عشان مش فاضي.
- أقول له مين طيب؟
- قولي له عزرائيل.

تساقط البول من أسفل عباؤها، فقال:

- مالك؟ ما كنتي عاملة فيها بروسلي من شوية!

ازداد تساقط البول، فقال متأففاً:

- إيه الناس القذرة دي اللي كل ما أقول لحد منهم إني عزرائيل

يبيل نفسه؟ هي ناقصة قرف؟!

سقطت على الأرض، إما ميتة وإما مغشياً عليها، لا يهتم، المهم أن

الهدف أصبح بمفرده، دخل إليه، فرآه وسأله:

- إنت مين؟

- أنا عزرائيل.

أصيب بسكتة قلبية مات إثرها.

وكأي حدث جلل كان هناك معارضون للفكرة فلم يجربوا البرنامج

قط، بل طالبوا بإيقافه، ونظموا مسيرات للضغط على الحكومة لتنفيذ

طلبهم؛ فأطلقت الحكومة مؤيديها وحدث اشتباك بين الطرفين أدى إلى

مقتل جميع المعارضين بعدما حاوهم رجال الشرطة بسياج أمني من

العساكر!

كان كل شيء يسير على ما يرام، حتى لاحت في الأفق بوادر تمرد

داخلي من رجال كلاشينكوف. وعلى الفور دعا أبو موة رجاله لاجتماع

طارئ، وطلب من المخابرات تنفيذ مهام رجاله خلال ساعة الاجتماع.

حتى لا تحدث عطلة للعمليات. وفي الاجتماع خاطب رجاله:

- مالكم؟

- الجميع: مافيش يا ريس، إحنا زي الفل.

- المر إلى أحدهم وقال بنبرة ذات مغزى:
- أنا سمعت إن فيه حد مش عاجبه اللي بيحصل.
- الرجل: إحم، عاجبني، والله عاجبني يا ريس.
- أبو موة: بس؟
- الرجل: بس إيه؟
- أبو موة: لأ، أنا اللي مستنيك تقول لي بس إيه؟ جملتك دي من الجمل اللي ببيجي بعديها «بس».
- الرجل: بس أنا صعبان عليا إننا بنقتل الناس.
- أبو موة: يا سلام! ما انت طول عمرك بتقتل الناس، وللا انت قبل كدا كنت بتبيع لهم دباديب؟
- لم ينطق الرجل، فأضاف محدثًا الجميع:
- وللا هي الفلوس كترت معاكم فشبعتموا وقررتوا تتخلوا عن شت لاند؟ هتخلوا عن خدمة وطنكم؟
- الرجل: خدمة وطننا ازاى بس؟ نخدم وطننا واحنا بنقتل شعبه؟
- أبو موة: لأ، نخدم وطننا بإننا نقلل الكثافة السكانية، فالدخل القومي يزيد والرئيس يقدر ينهض باقتصاد البلد، واللي عايش يعيش في نعيم وعز.
- الرجل متلعثمًا: آآ...
- أبو موة: قول عاوز تقول إيه؟
- الرجل:

- أبو موة: قول ماتخافشي، أنا اديتك الأمان.

- الرجل: لو كلامك صحيح يا ريس، ليه بنقتل الفقرا بس وسايبين الأغنيا؟

- أبو موة: بنقتل الفقرا عشان هما تعبانين في حياتهم، بنراهم من عذاب العيشة وسط الغلاء والأوضاع دي، وأهو كدا بشوابه. وللا إيه يا رجالة؟

- الجميع: اللي تشوفه يا ريس.

- أبو موة: لما نقتل الفقرا بنرحمهم من نار الدنيا ونوديهم الجنة بإيدنا، عملا بالمقولة اللي بتقول: (الفقراء يدخلون الجنة) يعني هَمَّا كدا كدا داخلينها بس احنا بنعجل بحدوث دا، ورينا يجازينا خير عن اللي بنعمله.

- الرجل: عن إيه؟

- أبو موة: عن قتلنا الفقرا يا بني.

- الرجل: مين اللي قال المقولة دي؟!؟

- أبو موة: أنا لسة قايلها حالا! فهل يعني معقول إننا نكون مسبيين في دخول الناس دي كلها الجنة، وندخل النار؟ ربنا أكيد مش هينسى مجهوداتنا يا رجالة.

يصمت قليلاً ثم ينادي سكرتيره:

- يا وائل.

- السكرتير: نعم يا ريس.

- أبو موة: هات لي سجادة الصلاة.

السكرتير: مافيش يا ريس!
أبو مودة: اتصرف يا وسخ، وافرشها في اتجاه القبلة عشان
ماعرفهاش، ودي أول مرة أصلي.



سعيد الحظ

لا يعرف ماذا حدث له، منذ أن رآها ولم يعد على طبيعته. منعه
من أن يعترف لنفسه بحبه لها رغم أن كل تصرفاته تؤكد ذلك، فهي
تأكله في عقله لا تغادره أبدًا كمحتل احتل بلدًا مبنيا من الذهب. وقلبه
يخبر على ذكر حديثهما القصير ويسترجعه كثيرًا دون ملل، وهو الملول
يطلبه من استرجاع الأشياء؛ باستثناء صورتها وأفلام البورنو.

جاهد كي لا يقترب منها، ولم يقدر. فهاتف أحد أصدقائه في
بهار أمن الدولة الشت لاندي، وحصل على رقم هاتفها؛ ثم هاتفها
استفسرًا عما إذا كانت قد عادت للعمل أم لا، قبل أن يتطرقا للحديث
عن كل شيء، وفي النهاية اعترف لها بحبه واعترفت كذلك.

نام ليلته سعيدًا، ونسي للمرة الأولى سوء الحظ الملازم له، ليصحو
في اليوم التالي على مكالمة هاتفية من رئيسه يخبره فيها بفصله من
الداخلية كلها، وليس من فرع الآداب فقط. استفسر عن السبب فعلم
أن الفيديو الذي صورته محاسن وبشته قناة «خوازيق» هو السبب، فقد
أساء لصورة الداخلية الشت لاندية أمام المجتمع الدولي، وتعرض السيد

الرئيس لضغوط أقال على أثرها السيد الوزير من منصبه، وفُصِّل هو
عمله!

سبَّ محاسن وسبَّ رئيسه ووزير الداخلية وسبَّ حظه ومنع الناس
من سبَّ سيادة الرئيس فسبَّ المجتمع الدولي كله. وجلس في البيت
عاطلاً فيما عادت محاسن إلى عملها!

كان يقابل محاسن يومياً، وكانت يومياً تحدثه في أمر الزواج
وبعد مرور شهر بالتمام والكمال على علاقتهما قالت له:

- مش واخذ بالك إننا بقالنا شهر نعرف بعض يا سعيد!
- معاكي حق، أنا برضه شايف إن حلو لغاية كدا ونلم العدة بغير
- إيه نلم العدة وأسلوب المعلمين دا؟
- مالوش لازمة الكلام دا بقي، طالما نويتي تفارقي يبقى مش
- هيفرق معاكي أسلوبى.
- إنت بتتلكك؟ مين قال اني نويت أفارق؟
- ما هي الجملة بتاعتك دي «بقالنا شهر نعرف بعض» بييجي
- بعديها «حلو لغاية كدا ونفركش».
- ليه؟ ليه لازم ييجي بعدها «نفركش»؟ ما يمكن أقول لك
- ناخد الـ next step؟
- وأبوكي الشهيد قبل ما يبقى شهيد كان عارف إنك بتقول
- next step والكلام دا؟
- سعيد لو سمحت ماتغلطش في بابا، ومش كل ما اكلمك من
- ارتباطنا تغير الموضوع، دي مابقيتش عيشة دي!

أنا برضه شايف إنها مابقيتش عيشة، وحلو أوي لغاية كدا ونلم
العدة بقى.

يادي أم العدة اللي داخت معاك، مش هنلم حاجة يا عم، أنا
عايزة أتجوزك!

هتدفعي لي كام؟

يا نعم؟! هو مين مفروض يدفع للتاني؟

إنتي طبعا، أنا هاضحي وأسيب بنات كتير عشانك.

أيوه عايز أدفع لك مهر يعني؟

والله مش هيفرق معايا المسمى إيه، تسميها مهر براحتك،

تسميها بدل تفرغ - بحكم إنني هابقى بتاعك لوحدك - ماشي،

تسميها تعويض مادي - عن حرיתי اللي هاضحي بيها -

ماعنديش مشكلة. كله بيس، المهم أقبض.

١٠٠ ألف كويس؟

همممممم رغم إن سناء عرضت عليا مبلغ أكبر بس انا

موافق عليكى.

دا عشان بتحبني أكثر من سناء صح؟

لأ، عشان سناء واخدة بشلة ٢٤ سنّي في وشها، وانا مش

هاعرف أعيش مع واحدة خارجة من فيلم Saw بصراحة!

طيب تمام، المهم نتجوز.

أيوه بس أنا مابتجوزش بقسيمة وكلام من دا.

أومال؟!!

- أنا باتجوز بعقد.

- موافقة يا سيدي، رغم إنني ما كنتش متخيلة أبدًا إنني عايشة بعقد عرفي!

- مش عقد عرفي، لأ، دا عقد اتفاق.

- ماشي عقد عقد، المهم أبقى مراتك.

- هتبقي مراتي لو وافقتي على شروطه.

- شروط مين؟

- شروط العقد. إحنا كدا اتفقنا على الشق الأصعب عندنا

وهو الشق المادي. فاضل كذا بند بسيط عشان نحط النقاط

الحروف بس.

- اتفضل.

- البند الأول: أنا مش بتاع خلفه وبامبرز ولبن نيدو والذي

- موافقة.

- البند الثاني: ليا يوم في الأسبوع أخرج فيه مع أصحابي نتسبح

- موافقة.

- البند الثالث: مدة اليوم الواحد المنصوص عليها في البند الثاني

قابلة للزيادة حسب رغبة الطرف الثاني، اللي هو أنا يعني.

- موافقة.

- البند الرابع: بعد العمل بالبند الثالث، مافيش بقى رايح فري

وجاي منين، وأنزل ع القهوة براحتي طالما مش مقصر في

واجباتي المنزلية.

موافقة.

البند الخامس: أنا مش ملزم بأي واجبات منزلية أصلاً.

اللي تشوفه.

!؟

ساكت ليه؟ ما تكمل البنود!

بادور على حاجة أقولها لك عشان ترفضني ونفركش الجواز

اللي أنا حاسس إنني اتدبست فيها دي.

لا اتظمن مش هارفض أي حاجة، فخش على البند الأخير

واخلص.

هممممم طيب البند الأخير: مدة العقد سنة ويمكن تجديده


حسب رغبة الطرف الثاني، اللي هو أنا.

ولو الطرف الثاني اللي هو إنت، ما حبش يجدد بعد سنة؟

في الحالة دي يعتبر العقد لاغي.

يعني إيه؟

يعني تبقي طالق.



- اسم الله عليك، هو انت لاقى تاكل؟ دا لولا إنا كنا بنا الله كل يوم عندنا، كان زمان جالك السل.
- إنتي بتعايريني يا بسيونة؟ نسيتي انك كنتي هتبوسي إيه عشان اتجوزك؟ ماسألتيش نفسك إيه اللي يخلي دكتور الدنيا زبي يوافق يتجوز واحدة زيك؟
- عشان بتحبني.
- لأ، عشان أكون قريب من سعاد الصاروخ.
- اتلم، إنت جنبك بوسي اللي تضرب سعاد بالجزمة.
- طيب يا جزم... يوووه أقصد يا بوسي، ما تخلي أمك تحبس الطير دا اللي بهدل المعازيم، ذكر البط دا اللي فاكر نفسه كلب بلدي وماشي يعرض في الناس! دا قرم المأذون من طير لا مؤاخذة يا مولانا!
- مانقدرش نجبهم عشان دي أوامر الشيخ عكموس.
- الشيخ مين؟
- عكموس صاحب البركات، أشهر شيخ في شت لاند، اللي عملي التركيبه اللي رشيت منها في عيادتك عشان النسوان تسخن وأختبرك.
- ومال اسمه عامل زي أسماء آلهة الإغريق كدا ليه؟
- يا بني الشيخ عكموس دا ابن الشيخ بغل اللي كان مساعدا الرئيس بعروور، ياااااه.
- إنتي هترجعي وللا إيه؟

- أرَجِّع إِيه بَس؟ أَنَا افْتَكَّرْت الشَّيْخ بِغَل فَحْنِيَت لِلْمَاضِي.
- لِيه، كُنْتِي عَاشِقَاه فِي الضَّلْمَة؟
- يَا ابْنِي عَاشِقَاه إِيه؟ دَا أَبُويَا!
- أَبُوكِي؟! أُوْمَال الأَقْرَع دَا يَبْقَى مِين؟
- يُووَوُووَوُوو الشَّيْخ بِغَل، دَا هُو سَبَب إِنِّي جِيْت الدُّنْيَا أُصْلًا.
- أَيُوه مَا دَا يُؤَكِّد نَفْس المَعْلُومَة - إِنَّهُ أَبُوكِي يَعْنِي - وَدَا هِيُودِينَا لِنَفْس السُّؤَال: الأَقْرَع اللِّي عَمَال يَتَأَمَّر عَلِيَا مِنْ يَوْم مَا عَرَفْتَكُم دَا، يَبْقَى مِين؟
- إِنَّت فَاهِم غَلَط، الشَّيْخ بِغَل هُو السَّبَب فِي إِنِّي جِيْت الدُّنْيَا، بَس مَا كَانَش مِتْجُوز أُمِّي.
- آه يَا وَسْخَة! وَيَتَقُولِيهَا عَادِي كَدَا؟ أَنَا كُنْت شَاكِك مِنْ الأَوَّل إِنَّكَ بِنْت حَرَام.
- يَا ابْنِي اللهُ يَخْرِب بَيْت دِمَاغِك اللِّي حَادِفَة شَمَال دِي، أَبُويَا وَأُمِّي قَعَدُوا سَنِين مَش بِيخْلِفُوا، وَلَفُوا عَلَي دَكَاتْرَة كَثِير وَمَا حَصَلْش حَمَل؛ قَامُوا وَوَلَاد الحَلَال دَلُوهِم عَلَي الشَّيْخ بِغَل، فَأَبُويَا خَد أُمِّي وَوَدَاهَالَه، وَرَجَعَت مِنْ عِنْدَه حَامِل.
- أَحْيِيَه! يَعْنِي مَش كَفَايَة إِنْ أَبُوكِي عَارِف، لَا دَا مُودِيهَا لَه بِنَفْسَه كَمَا!

قَبْل أَنْ تَفْسِر الأَمْر، ظَهَرَ عَلَي السُّطْح مَجْمُوعَة رِجَال ضَخَام الحِجْم، مُسَلِّحِينَ. انْتَفَض المَعَارِيز وَرَفَعُوا أَيَادِيَهُمْ لِأَعْلَى، فَتَسَاقَطت عَلَي الأَرْض قُطْع الحَشِيش وَمَجْمُوعَة «بُرَاشِيم» تَكْفِي لِفَتْح صِيدَلِيَة،

ثم دخل رجل أربعيني مهيب يرتدي جلبابًا ساطع البياض مكويًا بعناية
تنهد المعازيم وأنزلوا أياديهم قبل أن يقفوا في طابور أمام الرجل يقفون
يده وهو يمسح على رؤوسهم. نهضت بوسي من جوار عريسها وهي تقول
- الشيخ عكموس وصل.

- هو الترحيب دا كله عشان الشيخ عكسوم، كمعوس، معكوس
- عكموس.

- وات ايفر، الترحيب دا كله عشان الشيخ يبقى أخوكي؟
- أخويا ازاي؟

- مش أمك راحت لأبوه ون... وعمل معاها زي التور ما بيعمل
مع البقرة اللي بتروح له؟

- لا مش أخويا، إنت فهمت غلط برضه، والترحيب دا عشان
الناس تاخذ بركة سيدنا، سيبي بقى عشان ألحق آخذ لي شوية
بركة قبل ما تخلص.

- طيب خدي لي شوية معاكي.

كان هو الوحيد الذي لم يتحرك ليأخذ بركة مولانا، فذهب إليه
بنفسه ومد يده مصافحًا، فقال أبو بخت مقدمًا نفسه بفخر:

- أنا أبو بخت مايل، دكتور عيون وأخصائي طب نفسي.

- شحات يعني؟

- طيب ما انت دجال يعني.

- أنا مش هأذيك عشان دا يوم فرحك وكدا، بس كنت فاكر

إنك هتحنيني، خصوصًا لما تعرف إن أبويا الشهيد هو السبب
في وجود عروستك.

- دا سبب يخليني أكرهك وأكره أبوك الشهيد.
- همممممم، طيب ولو عرفت إن أبويا الشهيد هو اللي اختار اسمها «بسيونة»؟
- هاكرهه وأكرهك أكثر.
- طيب ولو عرفت إن أنا السبب في الجوازة دي؟
- لا ما انا عارف وباكرهك.
- ولو قلت لك إنني شيخ وليا بركات وأقدر أسخطك دكر بط زي دا كدا، هتجيني؟
- لأ، مش هصدقك.
- دا عشان العلام بوظ لك دماغك، قرابتك في الكتب بوظت عقلك وخلتك تصدق إن الأرض كروية زي البطيخة، مع إن الحقيقة الأرض مبسوفة.
- مبسوفة وللا زعلانة؟ هاهاها.
- لو قلت الإفيه دا تاني هاسخطك دكر بط زي دا.
- ولا يهمني.
- همممممم، إنت تعرف إن دكر البط دا كان كلب وأنا اللي سخطته كدا عشان بس تجرأ وهو هو عليا؟
- أخذت بالي إنه مريب فعلاً، بس كلامك دا يتعارض مع العلم والمنطق.
- علم ومنطق، آه، طيب عمومًا زي ما قلت لك، أنا مش هازعلك يوم فرحك، بس هاقول لك حاجة: إنت بعد جوازك بأسبوعين هتجي لي عشان تشتغل معايا.

ثم تتم ببضع كلمات مبهمة واختتمها بجملته:

- عليك لعنة عكموس.

- عكموس؟

- عكموس دا اسمي، وهو اسم من أسماء الحمار.

- صدق من سمّاك، اسم على مسمى فعلاً.

وقبل أن يغادر العكموس غاضباً، أشار إلى ذكر البط، فأخرج الأخير لسانه ونبح كالكلاب، ليعلو هتاف المعازيم ويرتعد أبو بخت مايل رعباً.

وبعد أول أسبوع زواج كان قد صرف آخر جنيه شت لاندي معه، فاضطر إلى النزول للعيادة. وكانت المفاجأة أنه وجدها خاوية خالية من المرضى - على غير العادة - تعجب وسأل التمرجي، فقال له إن الحال كذلك منذ ليلة عرسه، لم يحضر مريض واحد، لا لكشف العيون ولا للاستشارة النفسية، كأن لعنة أصابت العيادة!

ظل الوضع على ما هو عليه عدة أيام أخرى، حتى اضطر أبو بخت مايل إلى البحث عن عمل ليقدر على تغطية نفقاته وزوجته. كان ينزل إلى الشارع ويدور على المحلات وكان الرد شبه ثابت تقريباً: «يا ابني هو انا لاقى آكل عشان أشغلك وأديك مرتب؟ إحنا في عهد التيس يا حبيبي؟» فيعود إليها خائب الرجاء.

كان في عيادته ذات يوم، وقال له التمرجي إنه لن يأتي للعيادة مرة أخرى؛ لأنه وجد عملاً آخر، سيستقبل الزبائن في أحد مراكز «عكموس أبو سرباتع» الروحانية المنتشرة في جميع محافظات الجمهورية الشت لاندية.

لذكر لعنة عكموس وخطر بياله أن يذهب مع تمرجه للعمل عند
الشارع، ولكن منعه كبرياؤه الذي لم يصمد كثيرا أمام الجوع والحاح
السبيل، فذهب إلى عكموس منكسرا، وزاد انكساره لما رفض الشيخ
أن يلمه، وعاد من عنده خائب الرجاء. استوقفه عجوز في الشارع:

- يا أستاذ يا أستاذ.

- أفندم.

- أنا مش شحات والله، بس عندي ابني - في سنك كدا -
محجوز في مستشفى عشان بيعمل عملية والفلوس اللي معايا
مش هتقضي.

- لا حول ولا قوة إلا بالله.

- ظروف البلد وحشة، والإيد قصيرة والعين بصيرة، وكل
الكليشيات اللي انت عارفها دي، والحوجة مرة وياما أدبت
جدعان حتى أسأل الأستاذ أحمد شيبية.

- إنت بتهزر وللا بتشتغلني؟

- أشتغلك؟ الله يسامحك. بقى عمال أقول لك ابني محجوز في
المستشفى وعملية وبتاع، وانت تقول لي بهزر!

- ما هو أصل ما فيش شحات يقول كلامك دا بصراحة!

- يا ابني أنا ما عنديش خبرة في الشحاتة عشان لسه بادئ، أنا في
سنة أولى شحاتة زي الأستاذ سمس شهاب كدا.

- إيه علاقة سنة أولى شحاتة بسمس شهاب؟

- ما هو كان معايا في نفس السنة، سنة أولى برضه بس تخصص
تاني غير الشحاتة، كان سنة أولى جرح.

- ههههه، مش باقول لك بتهزر. دي الكاميرا الخفية صح؟
- كاميرا خفية؟! إخييه دي كسرة النفس وحشة بشكل
- ماكانش العشم يا ابني.
- خلاص يا والدي أنا آسف، خد دول طيب.
- إيه دول؟ ٢٠ جنيه! ليه هو أنا باشحت منك؟
- !؟
- آه صحيح دا انا باشحت منك، ما تشخلل جيبك شوية يا ابني
- دي العيشة مرة والدوا غلي و...
- عايز كام يا حاج؟
- اللي يطلع من ذمتك.
- ما اللي طلع من ذمتي عشرين جنيه مش عاجيبينك! الله يرحم
- أيام ما كان الشحات بياخد الجنيه ويقعد يدعي بيه لغاية ما
- بؤه يتعوج!
- الأيام دي يا ابني كان الجنيه يشتري باكو شاي وكيلو سكر
- دلوقتي علبة شاي تويننجز بريكفاست بـ ١٢١ جنيه!
- وانت عرفت منين نوع الشاي دا أصلاً؟! وعارف سعره كمان؟
- دا أنا أغلى شاي شربته كان شاي العروسة!
- إحم، ماتغيرش الموضوع، هزها شوية بقى، إنت عارف البلد
- في حالة اقتصادية زفت.
- ما هي الحالة الزفت دي عليك وعليا. بص، أنا معايا في جيبني
- مطواة سوستة أمريكي و ١٠٠ جنيه هاقسمها معاك بالنص،
- إنت خمسين وأنا خمسين.

- خمسين جنيه بس!
- إنت ليه محسسنى إنك مداينى؟!!
- مش القصد يا ابني، بس الخمسين جنيه دول مايعملوش حاجة، إنت عارف الدولار بقى بكام جنيه شت لاندي؟ بـ ١٠/٥٥ بيع وبـ ١٠/٧٥ شرا.
- كمان عارف سعر الدولار بالمليم؟! إنت متأكد إنك شحات مش مكتب صرافة?!!
- يا ابني والله عملية ابني هي اللي خلتي مهتم بسعر الدولار.
- وانت مالك ومال الدولار؟ هو انت هتسفر ابنك يعمل العملية في ألمانيا وللا إيه؟
- لا، هيعملها في لبنان.
- ودي عملية إيه بقى إن شاء الله؟
- عملية تجميل، أصل الواد مناخيره كبيرة شوية، فعاملة له عقدة نفسية، وعشان أفرحه هاسفره لبنان يعمل مناخير نانسي.
- عاوز يعمل مناخير نانسي! قلت لي بقى، عارف إيه دي؟
- دي المطواة السوستة الأمريكي.
- شطور، ندوس بقى ع الزرار دا السوستة تنظر السلاح دا، أقوم غازك في كرشك دا واريح البشرية منك.
- آه، دم. كده تقتلني وانا قد أبوك؟ ماكانش العشم يا بني.
- اخرس بقى واقلع الجلابية المقطعة دي.
- هتعمل بيها إيه؟

- هنبدل الأدوار مع بعض، بسرعة عشان فيه راجل جاي
بعيد أهو.

-!؟

- يا أستاذ، يا أستاذ، أنا مش شحات والله، بس عندي أهو
ما انت شايف في سن حضرتك ومش محجوز في مش
ولا حاجة، هو نايم ورايا أهو بس عنده عملية بطن مطوي
زي القلب المفتوح كدا، والفلوس اللي معايا مش هتفسي
فكنت عشمان منك في عشرين ألف جنيه عشان انت عارف
شاي توينتجز بقي بـ ١٢١ جنيه والدولار بـ ١٠/٥٥ بيع
١٠/٧٥ شرا.

عاد إليها محملاً بغنائمه في نهاية اليوم، فأحب الموضوع وتحويل
إلى شحات، وبجانب الشحاتة كان يقلب رزقه، فيجمع «السيارس» من
الشوارع التي يعمل بها، ويضعها في جوال يحمله على كتفه، ولما يعود
إلى البيت يعكف على ما جمعه، ليفصل الفلتر عن التبغ عن السلوفان
الخارجية، فيحمص التبغ في حلة ويعيد تعبثه وبيعه، ويجمع السلوفان
في أجولة يبيعه لمصانع الورق، أما الفلتر الإسفنج فكان يصنع مخدات
ودباديب ويحشوها به، وراجت تجارته تلك، فتخلى عن الشحاتة وتفرغ لها.

أبو موتة

ذات مرة اختفى هدف، وأخفى رجال كلاشينكوف الأمر عن
الجميع أملين أن يجدوه قبل نهاية اليوم، ولكنه علم بالأمر صدفةً من
طريق بثته قناة «خوازيق» للمراسلة «محاسن الصدف» التي تغطي
بعض الأهداف منذ بداية اليوم حتى الوفاة، وعلم من كلامها أن الهدف
يخبر من على وجه الأرض، كمن قرر أن يهرب من الموت.

وبالطبع استغلت محاسن الفرصة وبدأت تغطية حدثها الأكثر إثارة
من (الرجل الذي هرب من الموت)! وتابع الشعب الشت لاندي كله
الحدث بشغف لمعرفة من سيفوز، الرجل أم الموت!

وأثار ذلك التصرف ضيق أبو موتة، فأرسل إلى المخابرات مستعلمًا
من مكان الرجل، وجاءت نتيجة البحث سلبية، وهي المرة الأولى التي
يجمع فيها شخص في الاختفاء عن أعين المخابرات، فبضغطة زر
واحدة كانوا يحددون من يريدون عن طريق الأقمار الصناعية، ولكنهم
لك المرة فشلوا كأن الهدف يعيش تحت الأرض! فأمر أبو موتة أحد
رجالهم بمداومة بيت الرجل وإجراء تحقيق مع زوجته عساهم يجدوه:

- جوزك فين؟

- إنت مين؟

- عزرائيل.

بصقت في صدرها:

- بسم الله الرحمن الرحيم، انصرف.

- أنصرف إيه يا ولية، هو أنا عفريت؟ فين المحروس جوزك؟

- مش هنا يا عزرائيل يا اخويا.

- أومال فين؟

- وانا هاعرف أكثر منك برضه؟

ارتبك الرجل، فأخرج هاتفه وطلب رقم أبو موة وانتظر

فأشارت الزوجة إلى الأعلى وقالت متسائلة:

- هو صح؟

لم يفهم الرجل مقصدها فهز رأسه مستفسراً، فاعتقدت أنه

بنعم، فأضافت:

- طيب وحياة حبيبك النبي تخليه يدخلني الجنة وينجح الواو

حسن ابني في الثانوية.

رد على أبو موة:

- ألووو، أيوه يا ريس.

- إيه قلة الذوق دي؟ إزاي تقول له يا ريس حاف كدا؟

- اسكتي يا ولية انتي، أحسن كلمة كمان وهاخد روحك بدل

جوزك.

وضعت يدها على فمها قبل أن تتبول وتسقط أرضاً.

- دلوقتي الهدف مش موجود في البيت، وأنا دخلت ع الولية
مراته دخلة عزرائيل فمش هينفع أسألها عن مكانه، مش ماشية
مع وضعي كعزرائيل يعني، وللا إيه رأيك؟
- هممممم هي قدامك دلوقتي؟

- قدامي بس بلت هدومها وأغمى عليها زي غيرها.
- طيب تعالي لي نشوف هنعمل إيه في المصيبة دي.
- لا مصيبة ولا حاجة، طالما اختفى يبقى نعلن موته وخلاص.
- ولما يظهر تاني ويخرجنا يا حيوان، هيبقى إيه التصرف؟

اجتمع أبو مودة برجاله ورجال المخابرات قبل أن يجتمع بالرئيس
ولكن دون جدوى. لا حلول، وما زاد من توترهم هو الشاشة التي تبث
بمعاينة لايف من بيت الرجل، حيث يجلس ابنه وزوجته المبتسمة كمن
تفهم شيئاً، وأسفل الشاشة عداد تنازلي للوقت المتبقي وهو أقل من
بضعين!

ما الحل؟ عصر أبو مودة ومن معه رؤوسهم، وفشلوا، ثم يأتيهم
العمل على طبق من ذهب، لما عرضت الشاشة مشهداً لرجال ملتحين
يحملون بيت الرجل الذي يتحدى الموت، ويهتفون:

- إلى الكافر اللي بيتحدى إرادة ربنا، لو مظهرتش دلوقتي
هنقتل مراتك وابنك.

تصرخ الأم بهلع:

- الواد مالوش ذنب، وأبوه مش هيشوف الكلام دا أصلاً
ماعندوش تلفزيون في المكا...

تنتبه لغبائها، فتقطع جملتها. يضع أحد الملتحين سكيناً على راسه
الابن:

- قولي جوزك فين وهنسيب ابنك يعيش.

- ما اقدرش، دا جوزي وأبو ابني يا ناس، إزاي أسيبكم
بس؟

- مش هنقتله.

- أومال عاوزين تعرفوا مكانه ليه؟ هتجيبوا له مصاصة؟

- يا ستي ما هو كدا كدا هيموت.

- لما يموت موة ربنا أحسن ما يموت مقتول بإيديكم.

- طيب بلاش تقولي مكانه، روحي له انتي وخليه ينتحر.

- ولو رفض؟

- رقة ابنك قصاد رقة جوزك.

لم تخبرهم بمكانه لخوفها من بطشهم بهم وتعذيبهم إياه قبل ذلك،
فاتفقت معهم على أن يتركوها تذهب إليه لتقنعه بالانتحار أو نكاحه
بنفسها، « طالما كدا كدا ميت فتقتله هي ع الأقل هتبقى أرحم عليه
منهم»، ومن خلال كاميرا صغيرة - ثبتتها محاسن الصدف في سائر
الزوجة التي وافقت على التعاون معهم لتنقذ حياة ابنها - يتابع أبو مولا
والرئيس بثاً مباشراً لحوار الزوجة مع زوجها داخل مخبأه، قصت عليه ما
حدث في غيابه وانتهت قائلة:

- بس يا سيدي، آديك عرفت الأزمة وإنك كدا كدا هتموت زي البرنامج ما قال ف...
- لا مش هاموت، أنا شاكك في موضوع البرنامج دا أصلاً.
- إنت هتكفر؟ استغفر ربنا يمكن يتوب عليك في الساعتين دول قبل ما تموت.
- وأموت ليه؟ أنا صحتي بمب ومستخبي في مكان أمان. قولي لي إيه اللي ممكن يموتني؟
- أنا، أنا هاققتك عشان أنقذ ابني، فالأحسن تقتل نفسك، خليني أسلمهم الجثة ويسلموني الواد.
- مش مهم الواد، هجيب لك واحد تاني.
- هو قميص نوم؟ دا ضنايا.
- ما انا برضه جوزك، أهون عليك يا حبيبتني؟
- حبيبتك؟! آه تهون ولازم تموت.
- ليه لازم يعني؟ هو انتي مشاركة عزرائيل بالنص وأرباحك هتتعطل لو فضلت عايش؟
- لازم تموت عشان ابننا يعيش.
- طب ما يموت هو وأعيش أنا، ع الأقل انتي عارفاني من زمان، إنما ابنك - أبو شخة دا - تعرفيه من إمتي؟
- إنت إيه يا راجل ما عندكش قلب؟! مش صعبان عليك ضناك؟
- لأ عادي، هنجيب غيره قشطة، هاقضي ليلة حمرا معاكي وبعد ٩ شهور يبقى معانا غيره.
- طبعا ما هو انت مش خسران حاجة.

- لأهاخسر راحتى لما هاجي على نفسي واستحمل ربحا مرارا
المعفنة، دا غير المجهود اللي هابذله.
- مجهود إيه يا ابو مجهود؟ دا انت بتتهج من أول بوسة.
- ما دا عشان متجوز فيل.
- وإيه اللي غصبك تكمل مع فيل؟
- لما اخرج من هنا هاطلقك حاضر.
- لأ ما انت لما تخرج من هنا هتخرج ميت أصلاً، فمش هيبقى
عندك وقت تطلقني.
- وهتقتليني ليه بس؟
- عشان ابني يعيش.
- ما قلت لك هاجيب لك غيره بس سيبيني أعيش.
- ما انت ممكن تعيش وما تخلفش.
- نبقى نتبنى طفل.
- التبني حرام.
- نربي كلب.
- !.....
- فكري فيها، الكلب أوفر، لا هيتحتاج بامبرز ولا مدارس
الكلب أكثر نفعاً، كفاية إنه هيحرس بيتنا فنعيش في أمان.
دا غير إنه هيبقى مطيع: سيت هايسيت، كاتش هايكاتش،
وكمان مش هتحتاجي ترضعيه وجسمك يبوظ، أي كلبة غيرك
هترضعه عادي.

- أنا كلبة؟ إنت كدا بتديني أسباب أخرى لقتلك.
- وأهون عليكى بعد كل العمر دا؟! تهون عليكى العشرة ويهون عليكى حبنا؟
- حبنا إيه؟ إنت عمرك ما قُلت لي باحبك أصلاً.
- يا ولية أنا مش مرة قبل كدا قُلت لك صباح الخير؟
- دا لما كنت فاكرني مديرك في الشغل.
- أعمل لك إيه؟ ما هو إنتي اللي شبهه.
- إنت أقصى رومانسية بتعملها في حياتك إنك بتستحمي، ودي كمان ما بتعملهاش غير لما الجيران يشتكوا من ريحتك لبتوع البيئة!
- نسيتي الهدايا اللي باجيبها لك طيب؟
- هدايا؟! هدايا إيه يا دلعدى؟!!
- لسه امبارح جايب لك كيلو بتنجان و كيلو بطاطس.
- ما هو عشان أطفحك انت وابنك.
- وقبل كدا مش جبتلك موبايل؟
- آه موبايل من اللي بيـ «هوهو» ويغني: «فكهاني وباحب الفاكهة» ويقول: «أهلاً مرحباً».
- مش عاجبك؟ دا بخمسة جنيه بحالهم يا معفنة!
- إنت لو قاصد تخليني أقتلك مش هتفكرني بالذكريات القذرة دي، يا بخيل.

- تعيشي مع بخيل أحسن ما أموت وماتلاقيش اللي بصرف
عليكي.

- هاشتغل رقاصة.

- هتشتغلي رقاصة ازاي بدهون سيد قشطة اللي مغطية هيكال

العظمي دي؟ دا انا بانام جنبك على السرير في مساحة ٢
سنتيمتر مربع.

- أنا كيرفي.

- إنتي كل كيرف عندك ٢ طن.

- بتتريق عليا بعد العمر دا كله، بعد ما أخذتني لحم ورماني
عضم!

- قصدك سفنج، ما هو إنتي استحالة يكون فيكي عضم. تصدقني
بالله، إنتي لما تموتي الدود هيعمل وليمة ويعزم عليها دور
الشرق الأوسط كله.

- طب تصدق انت بالله، ما هتعيش دقيقة واحدة بعد الجملة
دي بالذات!

— سعيد الحظ ومحاسن الصدف —

ملل سيطر على حياته الزوجية، فمحاسن انشغلت عنه بالبرنامج الذي يعرف مواعيد موت الناس، وأصبحت تخرج في الثامنة صباحًا ولا تعود إلا قرب الفجر بسبب تغطيتها لتقارير مع من سيموتون، ومراقبة ردود أفعالهم وتسجيل آخر لحظاتهم في الدنيا وبيثها لايفث على القناة. وهو أصبح بلا عمل بسببها، فاضطر إلى قتل الوقت بتنفيذ الأعمال المنزلية من طهو وغسل مواعين وتنظيف وترتيب الشقة. جاءت ذات ليلة تشتكي من وجع قدمها، فقال لها هازنًا:

- ست السيد تحب أنقع لها رجليها في شوية مياه بملح؟

- لأ شكرًا يا أمينة.

- ما انا بقيت أمينة فعلاً، بقيت أمينة يا ست هانم ومن يوم

ما اتجوزتك وانا عاملة... وانا عامل زي الخدمة اللي انتي

شارياها ورامياها في البيت.

- إنت كمان بقيت بتتكلم زي النسوان أهو. عال عال.

- باتكلم بس؟ أنا باتكلم زي النسوان وباطبخ وباكس وباطبخ
مواعين وهدوم زي النسوان، وانتي؟

- !.....!

- إنتي مافيش مرة بلّيتي ريقى بكلمة حلوة حتى، وقلتي لي تسلم
إيديكي ع الأكل يا حبيبتى، يا دين أمني! تسلم إيدك ع الأكل
يا حبيبي.

- ابتدينا موشح كل ليلة.

- ليلة! إحنا الفجر يا ست هانم، يعني يوم جديد مش ليلة، وهو
انتي هتعرفي الفرق منين، وانتي ليلك نهار ونهارك ليل؟
- دي مابقيتش عيشة دي، إنت نكدي بطريقة لا تطاق.

يجلس على طرف السرير وينطلق في البكاء:

- أنا نكدي! وقدرتي تقوليها؟ دا أنا مستحمل الذل عشانك.
تنظر إليه متعجبة، فيقول:

- طلقني.

تتركه يبكي وتأخذ بطانية من على السرير وتخرج لتنام في الصالة،
فيقرر الانتقام منها. يفتح حقيبتها ويخرج اللاب توب ويقرر حذف كل
الملفات التي عليه، أو استبدال أفلام بورنو بفيديوهات التقارير، حتى
يتم طردها من العمل فتجلس معه في البيت. ينتظر ثواني حتى تجف
دموع عينيه فيستطيع الرؤية أوضح، يتصورها وهي تتعرض للتوبيخ من
رئيسها ف «يرق قلبه الرهيف» ويفكر في التراجع. يتذكر نفسه وهو
يقوم بالأعمال المنزلية مرتديًا جلباب الشغل ورأسه مربوط «بالمندبل

أبو أوية» فتصعب عليه نفسه. يفتح الفيديوها ت قبل حذفها فيشاهد
محاسن زوجته الجميلة التي يحبها وهي تحاور شخصًا أحول، يعلم أنه
هموت خلال ساعات على أقصى تقدير. تمر سيارة يقودها رجل يشبه
الفنان محمد رجب وتصدم الأحول فيسقط ميتًا.

يفتح فيديو آخر فيشاهد حوار الرجل الذي تحدى الموت، مع
زوجته وهو يخبرها أنه يشك في مصداقية البرنامج. لا يتوقف أمامه
كثيرًا فيفتح فيديو ثالثًا ليرى أتوبيس نقل عام يصدم سيدة كانت زوجته
تعاورها. يلفت نظره شيء، فيعيد الفيديو بضع ثوانٍ ويوقفه عند نقطة
معيّنة ويتذكر حديث الرجل الذي تحدى الموت، فتتسع عيناه لدقائق
قبل أن يبتسم ابتسامة من المؤكد أن أحمد زويل ابتسمها حين اكتشف
اختراعه. يترك اللاب ويجري على محاسن:


- اصحي بسرعة.
- فيه إيه؟
- مصيبة، فيه مصيبة.
- الرئيس التيس مات؟
- لأ بعد الشر، مش للدرجة دي.
- تنهض فيضع اللاب أمامها:
- بصي كدا ع الراجل اللي واقف وراكي بيراقب العجوز اللي
هموت، شبه مين؟
- شبه الفنان محمد رجب.
- بالضبط.

يفتح فيديو آخر:

- وسواق الأتوبيس دا شبه مين؟
- شبه محمد رجب برضه!
- الله يفتح عليك، ركزي بقى على سواق الملاكي دا شبه مين؟
- محمد رجب!
- عارفة دا معناه إيه؟
- معناه إن محمد رجب طلع هو عزرائيل.
- !.....
- قريبه طيب؟
- لأ يا غبية، معناه إن فيه ناس ورا موضوع البرنامج دا، والراجل اللي شبه محمد رجب دا هو اللي بينفذ مهماتهم.
- إنت اللي غبي، عشان المهمات كثير، وفيه ناس بتموت في وقت واحد وأماكن مختلفة بعيدة عن بعضها، فمستحيل شخص لوحده يقدر يعمل كدا.
- ما ممكن يكونوا أكثر من شخص!
- بس انت جبت لي دلوقتي واحد بس وعاوز تقنعني إن هو اللي بينفذ كل المهمات، وأنا ممكن أقبل إن محمد رجب هو عزرائيل لكن ما أقبلش الهبل اللي انت بتقوله دا.
- وتركته وعادت لتنام، بينما أخرج هو «الظابط اللي جواه» وعكف على مشاهدة كل الفيديوهات محاولاً العثور على دليل. شخص

أمر بتكرار في الفيديوهات؟ «إن شالله حتى يكون شبه الأستاذ كريم
مميز»، ولكن دون جدوى! في كل الفيديوهات لا يوجد غير شخص
واحد، يبدو طويلاً أحياناً ويقصر أحياناً أخرى، ولكن في النهاية يظل
محمد رجب».

قرر أن يتحرى عن الأمر بنفسه «وآهو منه حاجة يشغل نفسه بيها
ويقل الملل، ومنه يرضي فضوله»، ومن يعلم، قد يصل إلى نتيجة
تكون سبباً في عودته إلى العمل!



أبو بخت مايل

- مالك يا بسيونة؟
- وانت يعني هيفرق معاك مالي؟! ما انت عايش حياتك بالطول
والعرض ومش عامل أي اعتبار للخدمة اللي مرمية في البيت!
- مش ملاحظة اننا ابتدينا وصلة النكد بدري النهاردا؟
- عاوز تقول اني بانكد عليك؟
- مش عاوز أقول، أنا قلت فعلاً!
- آدي اللي انت فالح فيه، لماضة ويس!
- مالك يا ولية؟ أنا مش لسه سايبك من ساعة زي الفل، بنضحك
ونهزر ومافيش حاجة. يا دوب نزلت ع القهوة ورجعت!
- آه ما هو أصحابك أهم مني عشان تسييني وتقعد معاهم ع
القهوة.
- أنا ماليش أصحاب، وبانزل ع القهوة ألم سبارس عشان شغلي
يمشي، وبعدين ما انا مانزلتش من البيت بقى لي أسبوع. وقلت
لك إن السبارس خلصت وهانزل ع القهوة وكنتي موافقة

- يعني لما يسألوكي: اتطلقتي ليه؟ هتقولي لهم: كدا؟
 - مالکش دعوة، طلقني.
 - يا حبيب...
 - طلقني، دا قرار نهائي عشان أنا تعبت.
 - يعني لو طلقتك هترتاحي؟!
 - إيه دا؟ إنت قدرت تقولها؟ ياااااه يا أبو بخت، هان عليك
 تفكر فيها؟
 - يا بنت العبيطة!
 - آه ما انت عايز تطلقني عشان تخلص مني ويخلالك الجو مع
 سعاد، لكن بعينك.
 - سعاد مين؟
 - سعاد الصاروخ ونييلي وهالة وغادة وباتعة و...
 - باتعة؟
 - إحنا هنعيد الحوار من الأول تاني وللا إيه؟
 - ما تقولي لنفسك، عمالة تفتكري حاجات غريبة في وقت
 المفروض إن احنا كنا كويسين مع بعض، أنا مش فاكر مين
 دول أصلاً!
 - آه طبعاً وهتفتكر ازاي، ما هما كتير، إنت اسمك أبو بخت،
 ومعروفة «كل راجل اسمه (أبو بخت) خاين».
 - وهو فيه راجل اسمه أبو بخت غيري أصلاً؟ ثم انتي عرفتي
 المعلومة دي حالاً يعني؟ وللا انا من ساعة كان اسمي محمود

مثلاً فكنتي كويسة معايا، ودلوقتي بقى اسمي أبو بخت فعرفني
إني خاين؟!!

- لأ، لسه قارية ع الفيس إن أي «أبو بخت» خاين.

- اللهم طوّلك يا روح على اللوح.

- أنا لوح؟!!

- إنتي لوشي. رجعتي للفيس تاني ليه يا لوح قلبي؟

- ما انت طول اليوم بره وبترجع على النوم وما فيش أكشن في
حياتنا.

- أيوه أعمل إيه يعني؟ أضربك ببلمة؟

- لأ افتح لي مجال أنكد عليك. صاحباتي ع الفيس عايشين

في أكشن، اللي جوزها بيخونها، واللي جوزها بيكلم نسوان

واللي جوزها بيعط. جوازهم كله شطة وفلفل، وأسباب كتير

تفتح لهم مجال ينكدوا.

- !.....

- وانت كنت دكتور نفسي وعارف إن الست متنا ماينفعش

تعيش من غير ما تنكد.


- يا شيخة حرام عليك، إمتي ربنا ياخدني بقى عشان أرتاح

منك ومن نكدك؟

- خش ع البرنامج وانت تعرف يا أخويا.

- برنامج! برنامج إيه؟

حكمت له الموضوع فأخرج هاتفه وفتح فيسبوك، للمرة الأولى
عمله بالسبارس الذي أخذ كل وقته. ثم فتح البرنامج وملاً استثمارته
بالهانات المطلوبة. ومرت ساعات قبل أن تجيئه النتيجة «سيموت بعد
٢ سنوات وشهر و١١ يوماً»، وسيقوم البرنامج بعمل عد تنازلي يوميًا
للمذكوره.



أبو بخت مايل

بعد ٣ سنوات وشهر و ١١ يومًا

- إنت رايح فين يا راجل ع الصبح كدا؟

- نازل يا بسيونة.

- نازل إيه؟ اقعد مع ابنك شوية دا انت هتموت النهارده وتفارقه!

- على أساس اني لو قعدت معاه مش هاموت يعني؟

- لأ، أقصد مَلِّي عينك منه، وللا هو مش هيوحشك؟

- إنتي ليه محسساني إني مسافر؟ أنا هاموت يا بسيونة. هاموت،

وارتاح من وشك وبني بي إبنك.

- طيب خد بالك من نفسك وانت بتموت يا اخويا.

قال لفظ اعتراض ثم زفر:

- حاضر، هاموت على مهلي.

يتركها وينزل، وأمام باب العمارة التي يسكن بها يستوقفه المخرج

المرافق لمحاسن الصدف:

- صباح الخير.

- لأ.

- هو إيه اللي لأ؟ أنا باقول لك صباح الخير.

- أيوه بمناسبة إيه يعني؟

- بنقولها عادي مش لازم مناسبة!

- صباح الخير دي تقولها لي لما اكون باقضي الوبك إند بنام

ممدد على شيزلونج في جزر المالديف، وانا باراجع أرباح

مجموعة الشركات بتاعتي وماسك في إيدي الشمال سيجر

كوبي تمنه ٢٠٠ دولار، وعلى يميني تجلس فتاة بولندية

توازي في جمالها سكارليت جوهانسون، أو تجلس سكارليت

ذات نفسها.

- !

- وبتأكلني حباية كرينز بيؤها كمبرر عشان تديني فرينش كهي

وهي بتمسح بإيدها على شعري، وبعدها تديني كوباية عصير

برتقان فرينش مع إني كنت أفضل كاس مارتينيز، بس الخمر

حرام زي ما انت عارف.

- !

- إنما انت بدمتك جاي لك قلب تقول صباح الخير لواحد

بائس عاش حياته كلها بيفطر على عربية فول مليانة أكل

ملوث؟ عاش حياته بيجري عشان يلحق يتحشر في أتوبيس

حمولته ١٥ راكب وبيركب فيه ١٥٠ ومضطر يستحمل ربحها

باط وشرابات ووشوش مليانة يأس وإحباط -والله حلو بيت
الشعر دا- عشان يوصل مكان قدر بيشتغل فيه ١٨ ساعة؟

- !.....

- بتقول صباح الخير لواحد عاش عمره مستحمل سماجة
وسخافة ناس تافهة زيك كدا عشان ياخذ سيجارة أو يجمع
عقب؟

- !.....

- بتقول صباح الخير لواحد اخترع شغلانة ومشروع؛ عشان
يعرف يرجع بيته بلقمة لمراته اللي شبه أنثى كلب البحر،
وبامبرز لابنه اللي غالبًا هينتحر أول ما يوصل سن العشرين، دا
لو مامتش من الجوع بعد ما اموت وما يلاقيش حد يصرف
عليه؟

- !.....

- آه صحيح، بتقول صباح الخير لواحد هيموت النهارده؟
- خلاص يا عم، أنا آسف. صباح الزفت على دماغك ودماغ
اللي خلفوك.

- حبيبي تسلم.

- ممكن بقى تسمح للأستاذة تسجل معاك؟

قبل أن يأذن له، تقحم «محاسن الصدف» نفسها بينهما وتسأله:

- أستاذ أبو بخت مايل.

- آه أنا أبو بخت مايل.

- البقاء لله يا افندم.
- ونعم بالله.
- ما علش كلنا هنموت، معاك محاسن الصدف.
- محاسن صدف إيه يا مدام؟ أنا هاموت النهارده.
- يا افندم ما انا عارفة ولسة معزّية حضرتك حالاً.
- هو فيه حد يعزي حد ويقول له محاسن الصدف؟
- حضرتك دا اسمي، محاسن، محاسن الصدف.
- ما هذا العبث يا رب؟! ليه خليت بختي مايل لدرجة إني يوم موتي أقابل مذيعة اسمها محاسن الصدف؟
- تسمح لي أعمل روبرتاچ مع حضرتك؟
- آه طبعاً اتفضلي.
- حضرتك نازل الشارع يوم موتك ليه؟
- إيه السؤال العجيب دا؟ ما انا كدا كدا ميّت يا مدام! ع الأقل لو نزلت هاجيب بامبرز لابني، عشان لو مات من الجوع من بعدي ما يموتش بخراه.
- حضرتك بتشتغل إيه؟
- تاجر سبارس.
- تاجر إيه؟
- سبارس يا مدام، سبارس.
- يلقي المخرج عقب سيجارته على الأرض، فينقض عليها «أبو بخت» ويتقمص شخصية حارس مرمى منتخب شت لاند، ويلتقط السيجارة قبل أن تصل إلى الأرض، فيطفئها بهدوء ويضعها في جواله:

- وبتكسب شغلانة السبارس دي؟
- أهو الحمد لله، بنقدر نجيب مصروف البيت وبامبرز الواد.
- إنت خريج إيه؟
- أنا كنت دكتور عيون وأخصائي طب نفسي وبحاضر الطلبة في كلية الطب، بس لقيت الطب مايبأكلش عيش، فسمعت كلام الرئيس واتجهت للعمل الحر. وأحب أستغل لقائي مع حضرتك وأوجه الشكر لسيادة الرئيس «التييس» اللي أنا عايش لغاية دلوقتي بفضل توجيهاته الحكيمة.
- الرئيس كل توجيهاته حكيمة، فممکن حضرتك توضح لنا قصدك إيه بالظبط؟
- أنا كنت باشتغل حيا لله دكتور، وفجأة العيادة بتاعتي بقت بتنش لما الشعب الشت لاندي اتجه للعلاج الروحاني، فبقيت عاطل لغاية ما سُفت خطاب للرئيس بيحث فيه الشباب ع العمل، وبيشجع المشاريع الصغيرة. قمت فكرت أعمل لنفسي كارير وشغل خاص، والحمد لله نجحت وبقيت تاجر سبارس قد الدنيا.
- يمر بجواره شخص يشعل سيجارة، فيتابعه أبو موة بعينه وهو يكمل:

- ودا كله بفضل سيادة الرئيس. ابن الكلب المعفن.
- ترمقه محاسن بغضب، فيشير ناحية المار ويقول موضحًا:
- شرب نص السيجارة وطفاهما وحطها في جيبه ابن الجزمة!
- إحم، طبعا أعزائي المشاهدين هو مش بيشتم سيادة الرئيس.

- وهو حد يجرؤ يعمل كذا؟

- أعداء الوطن أحياناً ييجرؤوا.

يمر شخص يشبه الفنان محمد رجب وييده سيجارة مشتعل
ويتابعه أبو موة غير منصت لمحاسن التي تكمل حديثها:

- اللي هما أتباع الخاين سيريال كيلر.

يقول بغير تركيز وعينه على الرجل:

- أتباع سيريال كيلر؟

- آه.

يلقي الرجل السيجارة قبل أن ينتهي منها:

- دا راجل محترم والله.

- أفندم؟!!

- وكريم أوي أوي أوي.

تتعجب محاسن، فيضيف وهو ينصرف عنها متجهًا لنصف
السيجارة الملقى أرضاً:

- تخيلي رمى نص السيجارة؟

تفهم أنه يتحدث عن الرجل وليس عن سيريال. ينحني «أبو بخت»
ليلتقط نصف السيجارة، فتمر سيارة ملاكي يقودها رجل آخر يشبه
الفنان محمد رجب، تكاد تصدمه ومحاسن تتابع المشهد ولا تحاول
تنبيهه حتى، كل ما يهمها هو تصوير لحظة موته. لا يفصل السيارة عنه
غير عدة خطوات، يضغط السائق دواسة البنزين فتزيد سرعتها ويعلم
صوتها فيرفع «أبو بخت» نظره ليعلم أن هذه لحظاته الأخيرة، ويستسلم
لمصيره بأن يغمض عينيه. يشعر بشيء يصطدم به، صدمة أقل مما

لوقعها، فتذكر صوت والدته رحمها الله وهي تقول «ساعة الموت ربنا
ببخفف الوجع يا بني»، صحيح أنها قالتها وماتت وهي تصرخ من شدة
الألم، لكن ها هي الأيام تمر وتثبت له صحة مقولتها، فالصدمة لم تؤلمه
كما توقع، فتح عينيه فوجد رجلا يرقد أسفله:

- مين؟ عزرائيل!

- يا عم هافطس يا عم وانت زي البغل كدا.

- !

- أنا سعيد الحظ.

- سعيد الحظ عشان نايم تحت مني؟ إنت شاذ يا ض؟

- أنا حضرة الظابط سعيد الحظ.

- هي الآخرة فيها ظباط؟

- آخرة إيه يا غبي؟ إنت مامتش أصلاً لأنني أنقذت حياتك،

زقيتك من قدام العربية واتدحرجنا سوا ع الأرض لغاية ما

بقينا في الوضع المنيل دا.

ينظر إليه في عينيه بامتنان، ويقرب شفثيه من وجه سعيد ليُقبله:

- لأ بلاش بوس مش ناقصة، وقوم من فوقني عشان احنا دلوقتي

بنتصور وشت لاند كلها شايفانا، فشكلنا مش لطيف.

- أنا مش عارف أقول لك إيه والله.

- ماتقولش حاجة.

- أنا أبو بخت مايل.

-- ماتقولش على نفسك كدا، إنت جميل.

- لأ بجد والله أنا أبو بخت مايل.

- لا مايل ولا حاجة، أنا أنقذتك من الموت أهو فيختك كويس.
- يا عم أنا أبو بخت ماااااايل.
- عشان هتموت النهارده يعني؟ لأ ماتقلقش مش هتموت،
خليني جنبك بس وهتعيش وبختك هيبقى زي الفل.
- أنا اسمي أبو بخت، أبو بخت ومن عيلة مايل.
- هممممم طيب نصيحة مني، ماتقولش اسمك لحد ثاني، وا
أنا اسمي سعيد الحظ ويتكسف أقوله.
- !.....!

من فوق «سعيد» يشاهد «محاسن» تهرول ناحيتهما، فيسعد
قلقها عليه ولكنها تتجاهله وتحدث سعيد:

- سعيد! بتعمل إيه هنا؟
- إزيك يا محاسن؟
- يتدخل في الحديث وهو ما زال راقداً فوق سعيد:
- إنتوا تعرفوا بعض؟
- محاسن الصدف تبقى مراتي.
- إنت سعيد الحظ ومراتك محاسن الصدف؟
- أيوه.
- وعلى كدا اسم ابنكم «اللي في بؤه معلقة ذهب» وبتنكم
«اللي على راسها ريشة»؟

سعيد الحظ

أصبح «سعيد» ملاكًا حارسًا لأبو بخت، لما أنقذه من الموت عدة مرات، كان آخرها عندما دفعه من طريق رصاصة أطلقها قناص، لتخطئه وتستقر في صدر مواطن آخر.

أصر أبو بخت مايل على نقل المصاب إلى مشفى، فتبعه سعيد ليحميه بعد أن تأكد له ما كان قبل قليل مجرد شك. كما تبعتة محاسن لتسجل موته وتبث آخر أوقاته على الهواء.

دخلا المشفى وهما يحملان المصاب، ولفتت نظر سعيد الحظ اللامبالاة التي يتعامل بها الأطباء وطاقم التمريض مع المرضى، فرأى مريضًا يحمل بين يديه عبوة محلول ملح متصلة بوريد مريض آخر، ويتابع بعينه قطرات المحلول وهي تتساقط من العبوة التي تكاد تفرغ، ثم يقول:

- هانت أهى، كلها ربع ساعة وإزازه الجلوكوز تخلص، عارف لو ضحكت عليا وعملت نفسك ميت عشان ماتمسكليش الجلوكوز بتاعي هاعمل فيك إيه؟

-

- ما بتردش ليه؟ هتعمل نفسك ميت زي كل مرة؟ لا يا اخويا،
أنا عرفت خلاص إنك هتموت يوم الاتنين الجاي، فبطل
استعباط.

يحاول مُدعي الموت ألا يفتح عينه ولكن يفضحه احمرار وجهه
بسبب مجاهدته لمنع نفسه من الضحك، قبل أن يفقد السيطرة على نفسه
فيضحك بشدة، ويتبعه رفيقه.

يبتسم سعيد وينقل بصره بين المرضى ليشاهد مريضاً آخر لم يجد
من يحمل له عبوة المحلول فوضعها على السرير، بينما رقد هو على
الأرض بين الأسيرة كي يفتح مجالاً لمرور ماء المحلول داخل خرطومها
يصيح أبو بخت مايل الذي يبدو أنه لم يلحظ شيئاً مما لاحظته
سعيد، أو لعله لاحظ ولم يعبا به:

- إلحقوني، الراجل دا بيموت.

نظرت إليه ممرضة شزراً ثم سألته وهي تلوك قطعة علكة:

- ماذا بك؟ لماذا أنت، لماذا، لماذا إنت عامل دوشة؟

- أبو بخت: ما هذا الخرا؟ إنت بتكلميني كدا ليه؟ وإيه اللي في
بؤك دا؟

- الممرضة: هذه؟ هذه علكة.

- أبو بخت: والله إنتي اللي علكة.

- الممرضة: أتسبني يا هذا؟ عليكمم اللع...

- سعيد الحظ: اتلمي يا روح امك، أنا حضرة الظابط سعيد،
فاتكلمي عدل أحسن لك.

- الممرضة: أنا آسفة يا حضرة الطابط، كنت بتفرج على إم بي سي تو وتأثرت شوية بالترجمة.
- سعيد الحظ: طيب الراجل أخذ رصاصة وهيموت دلوقتي.
- تترك المصاب بين يديهما ينزف، وتمد يدها داخل جيب بنطاله
تخرج هاتفه المحمول وتفتح موقع فيس بوك، ثم تضع الشاشة أمام
وجه سعيد الحظ وتقول:
- الممرضة: لأ مش هيموت، ماتقلقش، إحنا دخلنا ع الفيس بتاعه وعرفنا إنه هيموت كمان أسبوع لسه.
- سعيد الحظ: (لفظ اعتراض).
- أبو بخت: طيب ما يمكن يكون موته بعد أسبوع دا بسبب إهمالكم.
- الممرضة: مش فاهمة؟
- أبو بخت: يعني مش جايز يعيش لو اهتميتوا بيه دلوقتي؟
- الممرضة: إنت هتكفر يا راجل انت؟
- سعيد الحظ (يخرج مسدسه): اتصرفي بسرعة واعملي شغلك بدل ما أقتلك دلوقتي.
- الممرضة (بلا مبالاة): لا ما انا مش هاموت دلوقتي أصلاً، لسه معادي بعد خمس سنين.
- يتبادل سعيد النظرات مع أبو بخت الذي يقول للممرضة برجاء:
- الراجل هيموت دلوقتي، إنتي مش شايفة؟ دا نزف ولا لترين دم.

نهض المصاب بغتة وقال صارخًا:

- المصاب: لسه قدامي أسبوع (ثم فقد الوعي مرة أخرى).
- الممرضة: خلاص بقى ارموه في أي حته لما نخلص الطفل
اللي في إيدينا؟، ينفع يعني أنقذه واسيب الراجل اللي ماله
دا؟

- سعيد الحظ: ماله دا؟

- الممرضة: صباحه اتعور والبرنامج قال إنه هيموت النهارده.
- سعيد الحظ: إنتي بتهزري؟ دا هيموت علشان صباحه فيه واول
واللي واخذ رصاصة هيعيش أسبوع؟
- الممرضة (بغضب): إنت هتكفر زي صاحبك؟ كفار يا لاس
ياهووه، إلحقوني، الكفار دول عايزنني أنقذ الراجل وهو لسه
قدامه أسبوع لما يموت.

تصاعدت صيحات الاستنكار والغضب من الممرضين وهم
ينقضون على سعيد الحظ وأبو بخت مايل، وأحد الممرضين يقول في
غضب:

- هتعرضوا على مشيئة البرنامج؟ خلاص ماعادش في قلوبكم
لا تقوى ولا إيمان؟

أطلق سعيد الحظ رصاصة من مسدسه في الهواء ليتجمد الكل في
ذعر، ثم صوّب المسدس ناحية الممرضة وهو يقول لها:

- قُلتى لي ميعاد موتك إمتى؟

- الممرضة (مرعوبة): كمان خمس سنين.

يتراجع سعيد الحظ وأبو بخت مايل معه ويتحرك الناس نحو هذا
كالزومبي وهم يصرخون:

- الكل: الله حي، الله حي، مدد مدد يا سيدنا البرنامج مدد
مؤمنين أحرار، هنتحدى الكفار.

يركضان والناس خلفهما ويخرجان من المستشفى بأعجوبة.

أبو مودة

كان جالسًا في مكتب الرئيس يتابع معه شاشات تعرض خرائط حرارية لكل محافظات شت لاند، وعلى كل شاشة بضع نقاط حمراء لضيء وتنطفئ برتابة ثم يتحول معظمها إلى الأخضر، معلنا لهم عن وفاة الهدف.

بعد ساعات، اخضرت كل النقاط باستثناء نقطة واحدة، تعجب الرئيس فأمر أبو مودة سكرتيه بالاستعلام عن الأمر، وعاد السكرتير بعد دقائق:

- الهدف دا غريب.
- أبو مودة: غريب ازاي؟ كائن فضائي يعني؟
- السكرتير: لأ، بني آدم عادي بس مايموتش.
- أبو مودة: يا نعم؟
- السكرتير: والله ما يموت بجد.
- أبو مودة: ما انا قلت لك كائن فضائي، قلت لي لأ.

- السكرتير: يا عم بطل فرجة على إم بي سي تو عشان الأناجيري اللي انت عايش فيها دي هتجننك، دا مواطن شت لا تادي عادي، بس مش بيموت.
- أبو مودة: مش بيموت ازاي يعني؟ معاه حصانة؟
- الرئيس: والله ما ادبت حصانة لحد من الفقرا.
- أبو مودة: بس يا ريس.
- ثم يوجه حديثه لسكرتيه:
- يعني إيه ما بيموتش؟ معاه حصانة من عزرائيل يعني وللا إيه؟
- السكرتير: مش عارف، بس رجالتنا حاولوا بكل الطرق، وكان مرة بينجى من الموت.
- أبو مودة: إزاي؟
- السكرتير: أول مرة ظهر شخص من العدم - كأنه ملاك الحارس - وزقه من قدام العربية في آخر لحظة.
- ينقل نظره بين الحضور وهو يكمل:
- اتجهنا لأسلوب «عُزّه واطلع اجري» ويا دوب الراجل بتاعنا قرب منه وطلع المطوة عشان يغزه، قام ظهر نفس الملاك الحارس من ذات العدم، وهاتك يا ضرب في الراجل بتاعنا.
- أبو مودة: وهو عرف منين إنه هيغزه؟
- السكرتير: ما دا نفس السؤال اللي سألته لرجالتنا، وكلهم مقتنعين إن... إن...
- أبو مودة: إن إيه؟ ما تنطق!

- السكرتير: إن الهدف مخاوي جن بيحميه من الموت، دا أنقذه بتاع ١٤ مرة من حوادث مختلفة، ويعرف رجالتنا بمجرد ظهورهم، حتى طريقة حسام حسن عرفها و...
- أبو موة: حسام حسن؟! -
- السكرتير: القناص يعني، القناص بتاعنا طلع فوق سطح بيت من دور واحد - أصله نظره ضعيف شوية فعاوز يبقى قريب من الهدف - ووجه عدسة كلاشينكوفه على الهدف واتجاهل الجن اللي بيحميه رغم إنه كان بيص له جوه العدسة، وضرب الطلقة، قام الهدف نط من مكانه وانقض على عقب سيجارة عشان الطلقة تصيب واحد تاني ميعاد موته كمان أسبوع، بس الحمد لله ماماتش، ورجالتنا راحوا وراه ع المستشفى عشان ينقذوه، أو يدخلوه المشرحة لو مات وبعلنوا موته بعد أسبوع!
- أبو موة: ما يولع بجاز، المهم الهدف المخاوي دا، هنعمل معاه إيه؟
- سكرتير الرئيس: هممممم، أنا عندي الحل.
- أبو موة: إلحقنا بيه.
- سكرتير الرئيس: الشيخ عكموس.
- أبو موة: مين؟
- سكرتير الرئيس: الشيخ عكموس ابن الشهيد الشيخ سعيد البغل، المستشار الروحاني للرئيس بعرو.

- الرئيس: أنا ملاحظ إنني من يوم ما قابلتك يا أبو مونة وأنا
باتعامل مع نفس الناس اللي كان بيتعامل معاهم بفرور
وشكلي كدا هاحصله وآخد لقب «الله يرحمه» قريب.
- سكرتير الرئيس: ماتخافش يا ريس، طالما الهدف دا بيتعمل
بالجن والعالم السفلي عشان ينقذه من الموت ويخرج
البرنامج قدام الشعب، يبقى مافيش حد هيحل المشكلة دي
غير عكموس.

عكموس البغل

في منتصف طاولة الاجتماعات وضعوا «منقد شيشة» بداخله
«كوالح» مشتعلة، وعلى رأس الطاولة جلس «عكموس» بينما وقف
الجميع - بمن فيهم الرئيس التيس وأبو موة- «ركبهم بتخبط في
بعضها» خوفاً. ألقى عكموس حفنة بخور فوق «الكوالح» المشتعلة
فزاد ارتفاع الدخان:

- عكموس: حي، الله حي، اظهر وبان عليك الأمان.
- الجن: هاتشي.
- عكموس: يرحمكم الله.
- الجن: شبيك لبيك جن... هاتشي بين إيديك.
- عكموس: اسمك هاتشي يعني وللا إيه؟ عشان مش فاهم بس!
- الجن: أنا حم... هاتشي جاي أحقق لك أحلام... هاتشي...
- ماعاكش حاجة للبرد؟
- عكموس: نعم؟!!

- الجن: بنادول، كونجستال، كومتركس، أي حاجة للبرد
عشان يظهر إني أخذت دور برد بسبب تغيير الجو.
- عكموس: تغيير الجو ازاي؟!!
- الجن: أنا جاي لك من العالم السفلي، والجو هناك حار نار
شياطين بقي وكدا، وفجأة جيت عندكم في شت لاند اللي
جوها معتدل ممطر شتاء، لطيف مشمس صيفاً، فأخذت دور
برد.
- عكموس: مش فاهم أي حاجة!
- الجن: هابسطها لك. تخيل نفسك في الشتا وقاعد في أوضة
دافية عشان فيها تكييف، وخرجت مرة واحدة للشارع، مش
هتاخذ برد؟
- الرئيس: ما يمكن أكون لابس ثقيل فماخذش برد!
- الجن: أنا جاي بالبوكسر والله عشان انتو استدعيتوني علي
غفلة فماالحقتش أغير هدومي، فبذمتك يعني دا شكل واحد
لابس ثقيل؟
- الرئيس: بصراحة دا شكل واحد شاذ.
- الجن: الله يخليك، من بعض ما عندكم والله.
- عكموس: إنت مين؟
- الجن: أنا حموءة محمأ عبحميء، والشهرة أبو محموء.
- عكموس: وأنا الشيخ عكموس اللي حضرتك، خبرة عشرة
سنين دجل، وورثت المهنة عن أبويا الشيخ الشهيد سعيد
البغل.

- حموءة: أبوك مين؟
- عكموس: الشيخ سعيد البغل.
- حموءة بعدما أطلق لفظ اعتراض: هو مافيش ورايا غيركم يا بني؟ أخلص من أبوك تطلع لي انت؟
- عكموس: إيه دا إنت كنت تعرف بابا؟
- حموءة: بابا؟! فيه بغل يتقال له بابا؟ دا لو عرف انك هتقول عليه بابا ماكانش مات والله.
- عكموس: أيوه يعني انت كنت تعرفه؟
- حموءة: آه كنت أعرف بابا.
- الرئيس: أنا ملاحظ إنني من يوم ما قابلتك يا أبو مودة وأنا باتعامل مع نفس الناس اللي كان بيتعامل معاهم بعروور، وشكلي كدا هاحصله وآخذ لقب «الله يرحمه» قريب.
- أبو مودة: البقاء لله يا ريس، قل لن يصيبنا إلا ما كتب الله لنا.
- عكموس: كنت تعرف بابا منين يا حموءة؟
- حموءة: اشتغلت معاه هو والرئيس بعروور الله يجحمه.
- عكموس: إحم.
- حموءة: الله يحرقه في نار جهنم...
- عكموس: إحم.
- حموءة: الله، الله.
- «ثم غنى محاكيا عمرو دياب في أغنية العالم الله»
- حموءة: الله الله الله. الله الله الله، دا اللي بيا يعلم الله.

- عكموس: إحم.
- حموءة: بتتنحج ليه دلوقتي؟ أنا باغني للأستاذ عمرو أهو،
وللا دا كمان بقى ممنوع عندكم؟
- عكموس: لا دا أنا شرقت بس، قل لي انت ماجيتليش ليه بعد
وفاة أبويا؟
- حموءة: عشان جالي عقد عمل في الخليج.
- عكموس: إنت بتهزر؟
- حموءة: لا والله باتكلم جد، أنا اتشردت بعد وفاة أبوك لغاية
ما جات لي فرصة أسافر.
وبدا يحكي:
- شبيك لبيك، جنك بين إيديك. تطلب إيه؟
- شنو أطلب؟ أنا مستأجر شقة مب نازل بفندق عشان ينزل لي
عامل غرف يقول لي شنو تطلب؟
- بس أنا مش عامل غرف!
- عيل! منو إنت؟
- أنا جن.
- من اللي بتخوف؟!
- لأ، من اللي بيقول نكت.
- هاهاها، هادي قفشات شت لانديين أموت عليها.
- روح موت في بلدك.
- هاهاها، مب قادر رح أموت م الضحك.

- فعلا! الإفيه التسعيناتي دا ضحكك فعلاً؟!
- ضحكني وايد وايد، قول بعد.
- لا مش هقدر عشان مرارتي مش هتستحمل وهتتفجر. أنا جاي أحقق لك أحلامك، نفسك في إيه؟
- أبيك تقول لي نكت وقفشات تخليني أضحك.
- هو طبيعي يطلع لك جن يقول لك تطلب إيه، فتقوم تطلب يقول لك نكت؟! ليه هو انا عفريت حمادة سلطان؟!
- إنت سألت: نفسك في إيه؟ وأنا خاطري أضحك!
- أيوه بس أنا جن مش الخليل كوميدي، يعني قدرني شوية واديني قيمتي. اطلب فلوس كثير.
- عندي فلوس وايبيد مالها حصر.
- همممم اطلب نسوان.
- معي مرتي هيهها جدامك وعندي بيزات أجيب أي واحدة أبيها! ينظر إلى امرأته ويعض شفته السفلى:
- ومرتك برضه عندها حاجات حلوات.
- شنو؟
- همممم ماتشغلش بالك، ممكن تطلب مني صحة.
- بفلوسي أشتري صحة، أنا عندي كل شي مب ناقصني غير راحة البال. بدي أضحك ليروق بالي.
- للدرجة دي انت غني! إنت معاك فلوس كتيير أوي كدا مين؟
- مب صاحي إنت! أنا كويتي، اسمي أبو نواف.

- أوبا، كويتي؟! دا المفروض انت اللي تقول لي شبيك لبيك
- شنو هاذا؟!!
- قول ورايا بس كدا: شبيك لبيك أبو نواف بين إيديك، تطلب إيه؟
- شبيك لبيك أبو نواف بين إيديك، تطلب إيه؟
- عاوز الجنسية الكويتية والنبي، أبوس إيديك اديني الجنسية الكويتية.

- أبو موة: وبعدين؟
- حموة: ولا قبلين، سافرت سنتين كوّنت نفسي وعملت قرشين وقلت أرجع بقى لعيالي، يا دوب نزلت في مطار شت لاند الدولي لقيت نفسي هنا وماعرفش فلوسي راحت فين!
- ثم نظر إلى من حوله وسأل الشيخ عكموس بريبة:
- هو فيه إيه؟ ومين دول؟
- عكموس: دا الرئيس التيس رئيس دولة شت لاند.
- حموة: من بعرور لتيس يا قلبي لا تحزن.
- الرئيس: بتقول إيه؟
- حموة: باقول إن شاء الله البلد في عهد التيس تبقى أحسن.
- الرئيس: أحسن بكتير الحمد لله، إحنا عايزينك في مهمة، خدمة جديدة هتقدمها شت لاند.
- حموة: عيوني.

- أبو موة: الراجل دا عايزين نقتله.
- حموة: أنا ماباقتلش حد، مش من صلاحياتي والله، وأظن إنك عارف كدا يا شيخ مسكوع.
- عكموس: عكموس.
- حموة: سكموع، معكوس، عكس عكاس، المهم انك عارف إني ماينفعش أقتل حد.
- عكموس: أنا فاهم، بس هو مخاوي جن بيحميه. عاوزينك تشغل الجن اللي مخاويه خمس دقائق بس لغاية ما نقتله.



أبو بخت مايل

انقسم الناس في شت لاند إلى نوعين، أغلبهم استقبل موته بأن صلى وعمل خيرًا وأصلح حاله ليقابل ربه بمجموع حسنات يدخله الجنة. وقلة منهم من فعل كل المعاصي والمحرمات من منطلق أنه «مش هيبقى عذاب دنيا وآخره يعني!». وكان أبو بخت من النوع الأخير، فقرر أن يرفه عن نفسه ويستمتع بملذات الدنيا، فأصبح عربيًا يقضي نهاراته مع النساء ولياليه في خمارة. باستثناء اليوم الأخير الذي عاد فيه إلى العمل لكي يوفر أي نقود لابنه، وقابل ذلك الضابط الذي أنقذ حياته، وقال له كثيرًا عن منظمة تقف خلف البرنامج تقتل الناس، باستخدام عزرائيل الذي يشبه الفنان محمد رجب في فيلم كلاشينكوف.

لم يصدق بالطبع كل هذا الهراء، هو يعلم أنه ميت، حتى وإن انقضى النهار وحل المساء فهو ميت ميت. الساعة الآن تقترب من السابعة مساءً، أي أن أمامه خمس ساعات - على أكثر تقدير - سيموت خلالها. وصاحب الحانة وعده بأن يقدم له الخمر يوم وفاته مجانًا، بشرط أن يحضر إلى خمارته! بالطبع لم تكن عزومته تلك نابعة عن كرم

منه، فلا أحد في شت لاند يعطي دون مقابل، والمقابل الذي سيتحصل عليه صاحب الحانة هو تسليط الأضواء على حانته؛ فإن رجلاً يموت على شرب الخمر هو حدث نادر وغريب. وكان قد قرر تجاهل طلب صاحب الحانة لاعتقاده أنه سيموت نهارًا، ولكن ها هو المساء يعجل وما زال حيًّا!

كان متجهًا للحانة وتتبعه السيدة التي يستفزه اسمها - محاسن الصدف - فهي لم تفارقه منذ بداية اليوم كأنها ظله، وبجوارها يسير زوجها - سعيد الحظ - اسم أكثر استفزازًا لشخص مثله، شخص اسمه أبو بخت مايل وسيموت بعد قليل! كانا يتجادلان في أمره، فمحاسن الصدف تؤمن بالبرنامج ككل الناس في شت لاند وسعيد الحظ يصبر على أن الجميع مخطئ، «ماذا لو كانوا كذلك؟».

نفض أبو بخت ذلك السؤال عن خاطره وشغل عقله بأمر آخر. سعيد الحظ ومحاسن الصدف، إذا أنجبا ماذا سيكون اسم طفلهما؟ ابتسم لهذا الخاطر وأخذ يسلي نفسه بتوقع اسم الطفل حتى وصل إلى الحانة، وجلس أمام الساقبي، على يمينه صاحب الحانة وعلى يساره صديقه الوحيد، هذا المخلص الوفي «اللي مايعرفش حتى اسمه إيه» الذي تعرف إليه من تردهما على تلك الحانة فأصبحا صديقين. كان صديقه الوحيد المخلص الوفي «اللي مايعرفش حتى اسمه إيه» يبكيه، وأبو بخت يواسيه، وصاحب الحانة يبتسم للكاميرا التي يحملها المصور التابع لمحاسن الصدف التي ما زالت تتجادل مع سعيد الحظ زوجها.

حموءة

كان متنكرًا في هيئة «الفنان محمد رجب» كما طلب منه «أبو مودة»، دون أن يفسر له السبب، ويقف منتظرًا هدفه أمام الحانة، فهو يخشى أن يدخل تلك الأماكن المشبوهة فتعلم زوجته محموءة بالأمر فتنفخه وتطفى ناره، وهو «ما صدق» أن صالحها، فجلس خارج الحانة يتذكر صديقه الوحيد سيريال كيلر ويتحسر عليه، وفي الوقت ذاته يحسده لأنه لم يرَ ما آلت إليه حال شت لاند. تذكر حياته بالكويت، فرغم كل ما فيها من ذل ومهانة فإنها أفضل من هنا بكثير!

ثم قطع سيل أفكاره المتدفق، ظهور محاسن الصدف وبجوارها الهدف المطلوب من حموءة إلهاؤه، وخلفهما المصور الذي يتابعهما بالكاميرا. كانت محاسن وزوجها في المنتصف بين حموءة والمصور، قبل أن ينادي المصور على محاسن فتهرع إليه. أشار بيده إلى الكاميرا ثم رفع رأسه وأشار ناحية حموءة الذي تعجب من الموقف، فاستخدم قدراته كجني ليسمعه يقول لها:

- دا مش ظاهر في الكاميرا!

- ودا معناه إيه؟

- أنا شفت فيلم رعب كان البطل بيظهر للناس عادي بس ما بيظهرش في المرايات، وفي الآخر اكتشفوا إنه مصاص دماء.

- مصاص دماغ؟

- مصاص دماء، اللي هو دراكولا يعني يا أستاذة.

- أيوه وإيه هيجيب مصاص دماء في شت لاند؟ هي البلد دي عاد فيها حد عنده دم عشان يمصه!

نادت زوجها وأشارت لحموءة:

- بص؟ شايف اللي شبه محمد رجب دا؟

- آه شايفه، بس عامل نفسي مش واخد بالي عشان عاوز أمسكه، وأعرف هو قايم بكام دور في الفيلم دا.

- إنت لسه برضه شايف إن دا فيلم؟

- أنا كنت شاكك بس دلوقتي بعد ما شفته تاني بقيت متأكد، ولا يمكن أسمح له يثدي أبو بخت مايل.

- طيب تعالى أوريك حاجة.

جعلته ينظر إلى الكاميرا، ولما لم يشاهد «حموءة المتشكل في

هيئة محمد رجب» والذي كان يظهر أمامه في الواقع، صرخ:

- عزرائيل!

وسقط مغشياً عليه، وألقى المصور الكاميرا وانطلق مهرولاً بعد أن

بال على نفسه. وأسقط في يد محاسن وشل تفكيرها فلم تستطع أن تقرر

أترك زوجها أم تبقى بجواره!

للحظات لم يصدق حموءة أنه أنجز مهمته بهذه السهولة وبالصدفة،
إياها هو هدفه راقداً على الأرض أمامه. سجد على الأرض ليشكر ربه،
ثم انطلق فاردًا ذراعيه «طيارة» كاللاعب المصري محمد أبو تريكة
بعد إحرازه لهدف وهو يغني «والله وعملوها الرجالة»، وسط نظرات
محاسن المدهوشة من هذا الـ«عزرائيل» الأهل! يقترب حموءة منها
ويقول وهو يمد يده مصافحاً إياها:

- فرصة سعيدة.

- أنت فرصة سعيدة وللا عزرائيل؟

- مش فاهم، أنا باقول لك فرصة سعيدة، عشان سعيد إني
شُفتك، أنا متابعتك.

- لا مش عايزاك تتابعني والنبى، انصرف مش عايزة أموت.

- مش هتموتي، أنا مش عزرائيل ومش جاي أموتك ماتخافيش.

- بحد والنبى مش هتموتني، يا فرصة سعيدة؟

- يا إيه؟

- إنت مش أول ما ظهرت لي قلت لي فرصة سعيدة؟

- أيوة أنا بارحّب بيكي مش باقول لك اسمي.

- آه، آسفة ماعلش، أصل أنا اسمي محاسن الصدف، وجوزي

اللي راقداً قدامك دا اسمه سعيد الحظ، فافتكرت اسمك فرصة

سعيدة.

- لأ، أنا حموءة.

- لأ، مش عايزاك تتحمى.

- !

- أصل هتتحمى ليه؟ إنت شكلك لسه صغير فبدري عليك من
الحمأة!

من بعيد ظهر أبو بخت مايل يسير متطوحًا هو وصديقه الولي
المخلص «اللي مايعرفش حتى اسمه إيه»، فتركها حموءة تحاول إغارة
زوجها ويراقبهما.

يشعر بتأنيب ضمير بعد أن خان ذكرى صديقه «سيويال كبير»
حين ساعد الرئيس التيس ونظامه في التخلص ممن يحمي «أبو بخت
مايل»، فيعود إلى الحانة آملًا أن يجد ما يشغل به نفسه عن التفكير في
خيانتة لصديقه. يطلب من الساقى:

- كوباية آيس مية نار مشبرة.

- إيه؟

- مية نار، بس تكون خارجة من التلاجة.

- مية نار من التلاجة؟!!

- أيوه، وماتجيبها ليش سخنة وتحط لي عليها تلج، عشان التلج

بيسيح وبيخفف مية النار، وأنا عايز أشربها مركزة عشان أنسى.

- لا لو عايز تنسى بقى فأنا عندي اللي ينسيك اسمك ويوديك

في دنيا تانية.

- إيه دا؟

- منقوع البراطيش.

- ودا عبارة عن إيه؟

- هممم خلاصة العلم الشت لاندي الحديث، هتشرب

وتلاقي نفسك في دنيا تانية.

- أنا ماصحيتش من الموت يا حموءة، اللي قدامك دا وهم اتولد
من بنات أفكارك.
- بس انا ما عنديش بنات، ما عنديش أطفال أصلاً غير الواو
محموء ابني!
- يا حموءة يا حبيبي، أنا اتولدت نتيجة علاقة ضميرك مع بنات
أفكارك.
- هو ضميري وبنات أفكاري بيعملوا حاجات قلة أدب في
دماغي من ورايا؟
- افهم يا أعبط العفاريات انت، أنا مجرد وهم، ضميرك وبنات
أفكارك خلقوه عشان يرجع لك عقلك تاني.
- بس انا مرتاح من غيره، فخليهولك مش عايز أرجعه.
- هو إيه؟
- عقلي.
- !?.....
- أصل انا عمري ما استخدمته، دا لسه بكرتونتته والله، ما عرفش
بتستخدموه ازاي أصلاً، ولا أعرف إيه فايدته! دا عضو مالوش
عازة.
- والله انت اللي ما ليك عازة، بس للأسف، لازم ترجع لعقد...
ل... لصوابك.
- إنت اتغيرت من ساعة ما مت يا سريال كيلر يا اخويا وبقيت
بتقول كلام عجيب، عقلك وصوابك، دا انت فاضل تقول لي

ثم يبتعد عن حموءة في الأثير كما ابتعد غسان مطر عن حزالي

- ماتسينيش يا أستاذ غسان، يوه أقصد يا سيريال.

- اعمل الصبح يا حموءة.

- إنت علقت وللا إيه؟

- اعمل الصبح.

واختفى سيريال نهائياً فقال حموءة بغضب:

- يعني مرمطني معاك ومخلي ضميري ينام مع بنات أفكاري

في الحرام عشان يخلفوك، وتيجي تعمل لي فيها الأستاذ

غسان مطر وتقول لي: أعمل الصبح؟ ما كنت بعت لي مقطع

الفيديو دا ع الواتساب وخلاص. إيه هو الصبح؟

يعود سيريال مرة أخرى ويقول:

- افكر أيام ما كنت بطل وبتساعدني ضد الشيخ بغل ويعرور،

وانت تعرف الصبح إيه.

-

- إزاي عايز تساعدهم في قتل الناس البسيطة اللي كنت بتقف

جنبهم؟

- تحويشة عمري صادروها، بعد الغربية والمرمطة في الخليج

وطويل العمر كل شوية يقول لي ذلك لي صواب رجلي.

يرضيك أسيب لهم تحويشة عمري؟

- مين أهم: الفلوس وللا الناس؟

- الفلوس طبعا.

- يا خسارة يا حموءة، يا خسارة.
- خسارة إيه؟! الفلوس ضاعت؟
- بس يا ابن الكلب ضيعت عليا لحظة التأثر، وخرجتني من المود.
- تحب أشغل لك الأستاذ مصطفى كامل يرجعك للمود تاني؟
- اسكت يا حموءة، خليني أقول لك الناهية.
- قول يا سريال يا اخويا.
- اعمل الصبح يا حموءة.
- تاني؟!!
- اعمل الصبح.
- يبتعد مرة أخرى:
- إنت رايح فين وساييني يا سريال؟
- أنا مش سايبك، دا انت بتفوق من منقوع البراطيش.
- ما تسيينيش يا...
- اعمل ال...
- ويقرر أن يعيد أمجاد الماضي وينضم إلى الخير ضد الشر، وينقذ «أبو بخت مايل» ممن يحاولون قتله، وكلها دقائق وينتهي اليوم فيفقد البرنامج مصداقيته أمام الشعب ويفشل النظام.



- أبو بخت: إنت بتعيط ليه دلوقتي؟ ما انت عارف إني هاموت النهارده من أول يوم عرفنا فيه بعض! انجز بقى شوف هتوصلنا ازاي، عشان مش عايز أموت في الشارع كدا ل احسن الكلاب تاكلني!

- الصديق: ماتقلقش، إحنا هنمشي نبص على البلكونات، هتلاقي واحدة ست واقفة، الست دي هتطلع مراتي... هممم أو مراتك، مش هتفرق، المهم إنها أول ما تشوفنا هتلاقيها بتقول اطلد...

تكمل جملته سيدة تطل من الشرفة:

- اطلع يا راجل.

- الصديق: الحمد لله وصلنا بيت حد فينا، أنا وللا هو يا ست؟

- السيدة: إنت مش عارف مراتك يا راجل؟

- أبو بخت: يا ستي الله يكرمك انزلي اختاري جوزك مننا علشان اللخبطة اللي بتحصل كل يوم دي.

- السيدة: يا راجل اطلع وبطل سياح هتصحي الشارع زي كل يوم.

- الصديق: لا ما انا مش هكرر غلطة امبارح تاني.

- السيدة: حصل إيه امبارح يا عرة الرجالة؟!

- الصديق: واحدة ست قالت لي اطلع يا راجل قمت الصبح لقيتها مش مراتي، وأنا ما بحبش الحرام، مش يمكن تطلعي مراته هو؟!

- السيدة: إحنا بنكرر الحوار دا كل يوم من يوم ما اتنيلت على عينك وعرفت سكة الخمارة!
- الصديق: شفتي! أهو دا نفس الكلام اللي الولية الثانية بتقولهاولي كل يوم، والصبح مابتطلعش مراتي برضه.
- السيدة: طيب عايز ايه دلوقتي؟
- الصديق: عايز اتأكد إنك مراتي، إديني أمانة!
- السيدة: همممممم إنت أول ما بتصحى من النوم المغرب - اللي انت بتقول عليه الصبح - بتدخل على التلاجة وترفع لك إزازتين.
- الصديق: أهل الحارة عارفين إني خمورجي، قولي لي حاجة ما حدش يعرفها.
- السيدة: ما أهل الحارة عارفين كل أسرارنا لأنك كل ليلة بتخليني أقول سر عشان تصدق إني مراتك! بطل فضايح بقى واطلع.
- الصديق: لأ إنتي مش مراتي، عشان مراتي مش بتخاف من الفضايح وبتحب تفشي أسرارنا.
- السيدة: طيب، إحنا عندنا ولدين، عصام ومحمود.
- الصديق: لأ إنتي مش مراتي، أنا عندي عصام وعماد، بس الراجل اللي جنبني ده عنده عصام ومحمود.
- يوجه حديثه لأبو بخت مكملًا:
- يلا اطلع لمراتك يا أبو عصام ومحمود.

- أبو بخت: لا يا عم، أنا عندي عصام بس باين، وبعدين مش طالع عشان الولية دي كل ما اطلع عندها تضربني وتترلني.
- السيدة: عشان انت مش جوزي، إنت أساسًا ماتنفعش تبقى جوزي لأنك قصير، وانا مايملاش عيني غير جوزي، أبو طويلة دا.
- أبو بخت: حيرتيني يا ست! هو جوزك أبو طويلة وللا أبو عصام وعماد، عصام ومحم... هو مين أبو مين؟ إنتي مراتي صح؟
- السيدة: يا عم روح الله يسهل لك، إنت بيتك آخر الشارع ومراتك بسيونة، هتلاقها مستنياك هناك بالعصاية اللي بتضربك بيها كل يوم.
- أبو بخت: عرفت اسم مراتي صح.
- الصديق: أنا بدأت أشك إنها مراتي يا جدع.
- أبو بخت: طيب اتأكد الأول بس عشان ماندخلش غلط زي كل يوم.
- الصديق: همممممم العصاية اللي مع مراته نوعها إيه يا ست؟
- السيدة: الشارع كله عارف انها خرزان وبتلسوعه بيها لغاية ما يفوق، وفي الآخر بتتيمه في حضن العمود.
- أبو بخت: هي مراتي، دي حافظاني يا عم. أسيبك انا بقى واطلع لها. يا سلام، فرحة رجوع البيت مش ممكن تتوصف. عقبالك كدا لما توصل بيتك بالسلامة.

- السيدة: بيتك إيه يا اهل؟ أنا مراته مش مراتك، يعني لا يمكن أسيبك تدخل هنا.
- أبو بخت: همممم لأ طالما رفضتي تدخليني تبقي مش مراتي، أنا مراتي بتدخل أي حد ينام عندها عادي.
- الصديق: طيب أنا كدا احترت وما بقيتش فاهم حاجة! الولية دي مرات حد فينا وللا مرات حد تاني معدي جنبينا؟!
- أبو بخت: همممممم إحنا كدا رجعنا لنقطة الشرطة، يووووه أقصد نقطة السنتر، لأ مش دي!
- الصديق: تقصد نقطة ومن أول السطر باين؟!
- أبو بخت: لأ برضه.
- السيدة: اسمها نقطة الصفر، نقطة لما تاخدك منك له.
- الصديق: طالما طلعت بتفهم كدا تبقي مراتي، عشان انت مراتك مابتفهمش.
- أبو بخت: عيب عليك تشتم مراتي يا جدع.
- الصديق: مش باشتمها يا عم، مراتك مابتفهمش فعلاً، عاملة زي اللطخ واسمها بسوني.
- أبو بخت: بسيونة.
- الصديق: مش مهم، روح انت بقي لبسيوني جوزك، وانا هاطلع لمراتي.
- أبو بخت: فين بيت بسوني جوزي، يووووه فين بيت مراتي طيب؟

- الصديق: آخر الشارع، بس اوعى تصحيتها أحسن تضربك
بالعصاية زي كل يوم، وبلاش تنام ع السرير عشان ماتصخبش
فتحي البقال من جنب مراتك، تعالى على نفسك ونام في
الصالة، سيب فتحي في مكانه، الجيران لبعضها برضه.
- السيدة: خلصت نصايح يا موكوس؟! يلا اطلع لي بقى.
- الصديق: طالع آهو، بس خلي الأستاذ نادر ينام في أوضة
الأطفال، قولي له جوزي - اللي هو أنا - جاي ينام جنبي.
- وسار في طريقه يترنح بمفرده وغير شاعر بما يدور من حوله، ولا
بحموة الذي أنقذ حياته أكثر من أربع وعشرين مرة!

حموءة

كان يستخدم إمكاناته المحدودة كجني -سيس وأهبل- في إلهاء رجال كلاشينكوف، فمرة يوهم أحدهم بأن «عنده إسهال ولازم يروح الحمام حالاً»، ومرة يبذل بكلاشينكوف القناص مطواة قرن غزال، ومرة يلهي «محمد رجب» -الذي يقود سيارة محاولاً الاصطدام بأبو بخت- بمزة عارية تخطف نظره حتى يصطدم بأقرب عمود، وكانت الوسيلة المفضلة لحموءة هي أن يسقط أحدهم في حفرة وهمية ترسله إلى العالم السفلي حيث تنتظر محموءة على نار، على نار حرقياً.

ونجح في إنقاذ «أبو بخت»، حتى لم يبقَ على نهاية اليوم ودقات الثانية عشرة إلا نصف ساعة! فنزل رجب أبو موة إلى ميدان الحرب لكي ينجز المهمة بنفسه، وينقذ كلاشينكوف من العودة إلى الفلّس مرة أخرى، والبرنامج والشركة والرئيس ونظامه من الحرج.

وكان حموءة يحتاج إليه حتى يعطيه نقوده التي تَغَرَّبَ لكمي
يجمعها، فلم يؤذه كما آذى سابقه، بل وضعه حموءة داخل متاهة وهمية
وجلس يضحك عليه بجوار بائع فاكهة أمام بيت أبو بخت مايل القادم
في منتصف الشارع. دقيقتان وتدق الساعة الثانية عشرة، وشعر حموءة
بزهو لأنه خدع النظام الحالي كما خدع السابق، فها هو للمرة الثانية نفذ
المهمة المطلوبة منه وسيحصل على نقوده المصادرة التي «شقي بها في
سنين الغربة»، وفي الوقت ذاته لم يفعل شيئاً يكون سبباً في عذاب
ضميره، بل انحاز إلى المواطن المسكين وأنقذه من النظام الغاشم. كافأ
نفسه بـ«صباغ موز» سرقه من الفكهاني المجاور، ونظر إلى ساعته فوجد
المتبقي دقيقة واحدة. فك حبس أبو موة من داخل المتاهة، وجلس
يقشر «صباغ الموز» أمام منزل أبو بخت وهو يتابعه قادمًا باتجاهه.
ووجد أبو موة نفسه يقف بالقرب من حموءة لكن دون سلاح،
فجلس - ما بيده حيلة - بجواره يشاهد أبو بخت مايل وهو يخطو باتجاه
بيته الذي ينبعث منه صوت بالقرآن الكريم.
٢٠ ثانية، والجو هادئ لا يكسر سكونه غير صوت القرآن المنبعث
من بيت أبو بخت.

عشرة ثوانٍ وأبو موة أمامه الهدف لكنه عاجز، فصرخ في حموءة
الذي كان قد انتهى من آخر قزمة في «صباغ الموز»:

- ما تعمل حاجة يا عم، إنت مش جن؟!!

ألقى حموءة بقشرة الموزة أمام مدخل بيت أبو بخت مايل، وهمم
بالصراخ في أبو موة مذكراً إياه بأنه لا يعمل عنده كي يحدثه بهذه

الطريقة، وأن الشرط من البداية كان ألا يتدخل حموءة في حياة إنسان. ولكن قبل أن ينطق، سمع صرخة، فنظر إلى الاتجاه الذي أتت منه ليرى أبو بخت يسقط على مؤخرة رأسه ويفارق الحياة قبل الساعة ١٢ بثنائية! وفي نعل حذائه ظلت معلقة قشرة صباع الموز لثوانٍ قبل أن تسقط أرضاً بفعل الجاذبية.

احتضن أبو موة حموءة المدهوش من بخت «أبو بخت مايل»
المايل وقال له:

- إنت من النهاردا بقيت الراجل الثاني في كلاشينكوف.

ثم يتراجع:

- لأ راجل تاني إيه؟ إنت عملت اللي أنا ماعرفتش أعمله،

فهتكون الراجل الأول وكلنا خدامينك، كلاشينكوف تحت قيادتك هتكون أكبر شركة في شت لاند.

وفي الخلفية يصدح صوت المقرئ: «... أَيْنَمَا تَكُونُوا يُدْرِكُكُمُ الْمَوْتُ وَلَوْ كُنْتُمْ فِي بُرُوجٍ مُّشِيدَةٍ».

كرر حموءة آخر كلمة قالها أبو موة:

- في شت لاند!

ثم همس مؤكداً لنفسه

- في شت لاند، أينما تكونوا يدرككم الموت!

ذات مرة اختفى هدف، وأخفى رجال "كلاشينكوف" الأمر عن رئيسهم، أملين أن يجدوه قبل نهاية اليوم، ولكنه علم بالأمر صدفةً من تقرير بثته المراسلة "محاسن الصدف" التي تغطي معظم الأهداف منذ بداية اليوم حتى الوفاة، وعلم من كلامها، أن الهدف تبخر من على وجه الأرض، كمن قرر أن يهرب من الموت.

وبالطبع استغلت "محاسن" الفرصة وبدأت تغطية حدثها الأكثر إثارة عن: (الرجل الذي هرب من الموت)! وتابع الشعب الشت لاندني كله الحدث بشغف لمعرفة من سيفوز، الرجل أم الموت؟!

وأثار ذلك التصرف ضيق أبو مودة، فأرسل مستعلماً عن مكان الرجل، وجاءت نتيجة البحث سلبية، وهي المرة الأولى التي ينجح فيها شخص في الاختفاء عن أعين الموت، فبضغط زر واحدة كانوا يحددون من يريدون عن طريق الأقمار الصناعية، ولكنهم تلك المرة فشلوا.. كأن الهدف يعيش تحت الأرض!

